

1967



Հայաստանի Հանրապետության
Մշակույթի նախարարություն

ՅԺՆԿ

19367



საქართველოს
აჭარა

ლიბრატურულ-მხატვრული და
საზოგადოებრივ - კოლიტიკური
შურნალი
საქართველოს მხარალთა
კავშირის აჭარის
განყოფილების ორგანო

შინაარსი

წინ ახალი ამოცანები	3
პ. ლორია — ნაპერწყლიდან ავარდნილი ალი (მოთხრობა)	5
ჯ. მათამაძე — ლექსები	22
ნ. მრღვაძე — დაბრუნება (მოთხრობა)	25
ჯ. ჯაშელი — ლექსები	40
რ. ართილაძე — ლექსები	43
ბ. კეჭალაძე — ოცდაათი წლის შემდეგ (მოთხრობა)	45
ზ. გორგილაძე — ლექსები	51
ახალგვინეური თქმულება — ლეგენდა დედაზე (თარგმანი ქ. ჩავლეიშვილისა)	54
ს. მსენინი — ლექსები (თარგმნა გ. ხალუ- ქვაძემ)	58
დღეები და აღმნიშვნები	
ი. ცერცვაძე — გმირთა ხსოვნა უკვდავია	60

10.441.

3

1967

მ ა ი ს ი
ი ვ ნ ი ს ი

აჭარის შურნალ-გაზეთების გამომცემლობა



პრიტიკა და პუბლიცისტიკა

შ. ქურდიძე — მხატვრული ლიტერატურა
 აჭარაში დიდი ოქტომბრის 50 წლის-
 თავზე 63


ი. ლეჟინა — სინამდვილის რომანტიკის მი-
 სადგომებზე 77

მ. მუჰამადოზაძე — სულიერი ნათესაობა . . . 83

ავტარის წარსულიდან

ა. სურბულაძე — აჭარა ოქტომბრის რევო-
 ლუციისათვის ბრძოლაში 88

ბ. ლავინიაძე — აბდულ მიქელაძის ეპის-
 ტოლარული შემკვიდრეობიდან . . . 93




რედაქტორი შოთა ქურიძე

სარედაქციო კოლეგია:

- ნ. ახვლედიანი, ნ. გვარიშვილი, მ. ჯარშანიძე (პ/მგ. მდივანი),
- პ. ლორია, ალ. ჩავლეიშვილი, ფრ. ხალვაში.

რედაქციის მისამართი: ბათუმი, გოგებაშვილის ქ. № 24.

ტელეფონები: რედაქტორის — 33-71, პ/მგ. მდივნის — 33-72.



წინასწარი ამოცანები

მაისის ბოლოს მოსკოვში მიმდინარეობდა სსრ კავშირის მწერალთა მეოთხე სრულიად საკავშირო ყრილობა. ეს იყო უმნიშვნელოვანესი მოვლენა არა მარტო საბჭოთა ლიტერატურის, არამედ მთელი ჩვენი საზოგადოების სულიერ ცხოვრებაში.

ყრილობამ საქმიანად განიხილა საბჭოთა ლიტერატურის განვითარების ძირეული პრობლემები მიმდინარე ეტაპზე. შეაჯამა განვლილი მუშაობის შედეგები და დასახა ახალი ამოცანები, რომელთა განუხრელად განხორციელება თვითეული მწერლის მოქალაქეობრივ-პატრიოტული მოვალეობაა. ყრილობამ ერთხელ კიდევ ცხადყო, რომ ჩვენი მწერლობა ერთგულად ემსახურება მშობლიურ ხალხს, გამოხატავს ხალხის ნებას და იცავს მის სასიცოცხლო ინტერესებს.

კომუნისტური პარტია და საბჭოთა მთავრობა დიდად აფასებენ ჩვენი ლიტერატურის განსაკუთრებულ დამსახურებას კომუნისტების იდელების განხორციელებისათვის ბრძოლაში და ყოველდღიურად ზრუნავენ მისი შეუწყვეტელი წინსვლა-განვითარებისათვის.

„ისტორიის ყველა ეტაპზე — მშვიდობიანი შემოქმედების წლებშიც და ომის წლებშიც, — ნათქვამია სკკპ ცენტრალური კომიტეტის მისალმებაში სსრ კავშირის მწერალთა მეოთხე ყრილობისადმი, — ჩვენი ლიტერატურა იყო გმირული დროის მართალი მატრიანე, ახალი საზოგადოების გამარჯვებისათვის ბრძოლის აქტიური მონაწილე, ახალი აღმშენების ჩამოყალიბების მძლავრი საშუალება“.

ხალხის ცხოვრებაში საბჭოთა ლიტერატურის უდიდესი როლის, მისი თვალსაჩინო დეაწლის აღიარება იყო სსრ კავშირის მწერალთა კავშირის დაჯილდოება ჩვენი სახელმწიფოს უმაღლესი ჯილდოთი — ლენინის ორდენით. მწერლის შრომის, მისი დამსახურების ესოდენ მაღალი შეფასება შთააგონებს და ახალი შემოქმედებითი წარმატებებისათვის აღფრთოვანებს თვითეულ საბჭოთა ლიტერატორს, რომლებიც პარტიულ ხელმძღვანელობაში სამართლიანად ხედავენ ჩვენი მწერლობის შეუწყვეტელი წინსვლისა და აღმავლობის წყაროს.

ჩვენ პირდაპირ და ამაყად ვუწოდებთ ჩვენს ლიტერატურას პარტიულს იმიტომ, რომ მას არა აქვს და არც შეიძლება ჰქონდეს სხვა ინტერესები, გარდა ხალხის ინტერესებისა, რომლებსაც ჩვენი პარტია გამოხატავს. — განაცხადა ყველა საბჭოთა მწერლის სახელით თავის წერილში სკკპ ცენტრალური კომიტეტისადმი სსრ კავშირის მწერალთა მეოთხე ყრილობამ, — ჩვენს ლიტერატურას პარტიულს ვუწოდებთ იმიტომ, რომ

პარტიის პოლიტიკაში ვხედავთ პროგრესული კაცობრიობის სანუკვარ მისწრაფებათა ყველაზე სრულ განხორციელებას. და დღეს მთელი ჩვენი მრავალეროვნული ლიტერატურის სახელით ვამბობთ: „ავირჩიეთ რა ჩვენს იდეალად კომუნისში — ბოლომდე ერთგული ვიქნებით მისი!“.

ღიას, საბჭოთა მწერლები უაღრესად ერთგული არიან დიადი იდეალის — კომუნისშისა და მომავალშიც ყველაფერს გააკეთებენ მისი ხორცშესხმისათვის. ისინი კვლავ და კვლავ დაუცხრომლად იბრძობლებენ ხალხის ცხოვრებასთან ლიტერატურის მჭიდრო კავშირისა და ჩვენი გმირული თანამედროვეობის, ჩვენი საზოგადოების განვითარების მიმდინარე ეტაპის მხატვრული შეცნობისათვის. რათა თავისი თხზულებებით კომუნისშის მშენებლები შთააგონონ დიდი ოქტომბრის იდეების განხორციელებისათვის. აღზარდონ ისინი პატრიოტული და ინტერნაციონალისტური სულისკვეთებით, ხელი შეუწყონ მშვიდობის განმტკიცებას მთელ მსოფლიოში, ყველა ხალხის, მთელი კაცობრიობის განუხრებელ სოციალურ პროგრესს.

ამოცანები, რომლებიც ყრილობამ დასახა ჩვენი ლიტერატურის წინაშე, თვითეული საბჭოთა მწერლისაგან მოითხოვს შემოქმედებითი პასუხისმგებლობის გრძნობის ამაღლებას, ბეჭით შრომას, მხატვრული ოსტატობის სრულყოფას და, რაც მთავარია, კომუნისშის იდეების ერთგულებას, კლასობრივი პოზიციის მკაფიობას, ფართო შეტყვის გაჩაღებას ანტიკომუნისშის მეტაბრეთა წინააღმდეგ, მარქსისშის ყველა ჯურის რევოლუციონისტებისა და ვულგარიზატორების წინააღმდეგ.

მალე საბჭოთა ხალხი მთელ პროგრესულ კაცობრიობასთან ერთად ზეიმით აღნიშნავს დიდი ოქტომბრის სოციალისტური რევოლუციის, მსოფლიოში პირველი სოციალისტური სახელმწიფოს არსებობის ორმოცდაათი წლისთავს. ამ დიადი თარიღის შესახვედრად ჩვენი ქვეყნის თვითეული მშრომელი, თვითეული პატრიოტი ახალ შრომით საჩუქრებს უმზადებს საყვარელ დედა-სამშობლოს. საბჭოთა მწერლებიც არ უნდა ჩამორჩნენ სხვებს და საყოველთაო-სახალხო ზეიმს, სახელოვან იუბილეს შეხვდნენ ახალი შემოქმედებითი წარმატებებით, ახალი თხზულებებით, რომლებშიც აისახება ხალხის გმირული ბრძოლა კომუნისშის გამარჯვებისათვის, მშვიდობის გამარჯვებისათვის.

წინ ნათელი პერსპექტივებია, უაღრესად პასუხსაგები ამოცანებია და ექვი არაა. „საბჭოთა ლიტერატორები ყოველ დონეს იხმარენ, რათა გაამართლონ პარტიისა და ხალხის ნდობა, სამშობლოს უმაღლეს ჯილდოს—ლენინის ორდენს უპასუხებენ იმით, რომ ყოველი დონისძიებით აამაღლებენ შემოქმედებით აქტივობას, თავიანთი შრომით ღირსეულ წვლილს შეიტანენ კომუნისშის მშენებლობაში, მხატვრულ ნაწარმოებებში ასახავენ ხალხის ცხოვრებას, შექმნიან მისი ბრძოლისა და შემოქმედებითი შრომის ფართო სურათს“.

მთელი ნიჭი, მთელი შემოქმედებითი ენერჯია. ჩვენი გულის მთელი მღვწეობარება ისე, როგორც ყოველთვის, მოვანხაროთ ცხოვრებისა და ლიტერატურის, ხელოვნებისა და რევოლუციის კავშირის განმტკიცებას. პარტიის ბრძნული პოლიტიკის განხორციელებას, პოლიტიკისა, რომელიც ჩვენი წინსვლისა და გამარჯვების საფუძველთა საფუძველია.





პაკმენ ლოკია

ნაკურსკლიდან ავარდნილი ალი

მოხუცმა ნელი ნაბიჯით ათავალა ათიოდე საფეხური და მაღალ-
თალიანი შენობის წინ შეჩერდა.

სახლი თეთრი ქვისაგან იყო ნაშენი. განიერი კარ-ფანჯრები ჰქონდა
და მოჩუქურთმებული სარაბახი. მოხუცმა ფასადზე მოფენილი რელიე-
ფური გამოსახულებები შეათვალიერა და თითქოს ნაცნობი ადამიანები
და ამბები შეიცნო:

საბრძოლველად დარაზმული მშრომელი ხალხი, დროშები, ლოზუნ-
გები, დემონსტრაციები, შეტაკებები, ბრძოლები, დაღეწილი ბორკილები,
დამხობილი ტირანია და...

გამარჯვება!

უცნობმა შენობის ღია კარებში შეიხედა.

— მობრძანდით! — მაშინვე შეიპატიჟა იგი ვესტიბიულში თეთრხა-
ლათიანმა ქალმა.

— შეიძლება?! — დინჯად შეადგა ფეხი სტუმარმა და იქაურობა მო-
ათვალიერა. — დიდი ხანია მსურდა აქაურობის მონახულება, მაგრამ...
თქვენი სახელი?

— მერი, ბატონო!

— ჰო, ქალბატონო მერი, მაგრამ ვერ მოვახერხე. — მოხუცმა ვარდი-
სფერი შუქით განათებულ დარბაზს ახედა, — სანამ მუხლებში ძალა
მედგა, მკლავში ღონე და თავი მუშაობდა, საქმეს ვერ მოვცდი. ისინი,
ალბათ...

— ექსკურსანტები გახლავთ. — და თეთრხალათიანმა ქალმაც იქითკენ
მიიხედა, საითაც მოხუცი იცქირებოდა. — თუ ინებებთ და შეუერთდეთ-



ბით, ჯგუფს ჩვენი თანამშრომელი ახლავს და სხვებთან ერთად თქვენს მოისმენთ მის საუბარს.

— გმადლობთ! — მოხუცი ნელა მიბრუნდა. სტენდებთან შეჩერებულ ექსკურსანტთა ჯგუფს მიუახლოვდა და თავის დაქნევით უსიტყვოდ მიესალმა.

ახალგაზრდა ექსკურსიამძღოლი, ეტყობოდა, ამთავრებდა ქვემო დარბაზის ექსპონატთა დახასიათებას. მართლაც, ცოტა ხნის შემდეგ ექსკურსანტები მან ზემო სართულზე მიიწვია. აქ უფრო ჭარბად იყო ფოტოსურათები, ექსპონატები. ყოველ მათგანს სათანადო წარწერა ჰქონდა, მაგრამ ექსკურსიამძღოლი მაინც დაწვრილებით განმარტავდა ყველაფერს.

— აქ, მეგობრებო, საუბარი გვექნება ბათუმის მუშათა კლასის რევოლუციურ მოძრაობაზე, ამ მოძრაობის აქტიურ წარმომადგენლებზე. — და ექსკურსიამძღოლმა ცხრაასიანი და მომდევნო წლების ამბები წამოიწყო. — ეს გახლავთ ის ჯგუფი, რომელიც სათავეში ედგა სახალხო-რევოლუციურ მოძრაობას და იარაღით ხელში გამოდიოდა მეფის მთავრობის წინააღმდეგ. ბევრი მათგანი დაეცა უთანასწორო ბრძოლაში, ბევრმა გაუძლო ციხე-ციმბირსა და კატორღას, მოესწრო დიად გამარჯვებას და სახალხო ზეიმს შეხვდა, მაგრამ მოპოვებული გამარჯვების შენარჩუნებისთვის ბრძოლას შეეწირა. დღევანდლამდე მხოლოდ მცირე ნაწილმა მოაღწია და გვეხმარება.

— ღმერთმა დიდი სიცოცხლე მისცეთ! — გულდაგულ დაილოცა ერთმა დედაკაცმა.

— მაგალითად, — განაგრძო ექსკურსიამძღოლმა. — ეს პიროვნება, — ხელ-ფეხზე რკინის ბორკილგაყრილ შავ წვერულვაშიანი ვაჟკაცის ფოტოსურათზე აჩვენა, — ას წელს მიღწეული მოხუცია. ჩვენგან ცოტა მოშორებით ცხოვრობს. როგორც ამბობენ, ყოჩაღად გრძნობს თავს და ფიზიკურ შრომასაც არ ერიდება.

„გერონტი ხმალაძე!“ ხმამაღლა ამოიკითხა სურათის ქვეშ მიკრული წარწერა ერთმა ახალგაზრდამ.

მოხუცი ფოტოსურათს მიუახლოვდა, დახედა, შემდეგ ჭალარა უღვაშზე გადაისვა ხელი და გაიღიმა.

- სად გიპოვნიათ ეს სურათი? — იკითხა უცნობმა.
- ერთ-ერთი ძველი რევოლუციონერის ოჯახში. — მიუგო ჭალმა.
- თუ გაინტერესებთ, შეგვიძლია გაგიგოთ!
- არა, არ შეგაწუხებთ. მასეთი სურათების შეგროვება, მოვლა და შენახვა მაგდას უყვარდა, — კვლავ ფოტოსურათს ჩააჩერდა მოხუცი.
- მაგდა?! — გაკვირვებით ჰკითხა ჭალმა.
- ივანე მგელაძის მეუღლე... ცოცხალია?
- სამწუხაროდ, არა. ერთი წელი იქნება შემდეგ... იცნობდით?

— მრავალჯერ შეგვიფარებია თავი მის ოჯახში. მისი მადლიანი ხელით დამზადებული კერძიც ბევრჯერ მიმირთმევია... თქვენი სახელი?

— ნანული, ბატონო.

— ჰო, ჩემო ნანული. ძალიან საიმედო ოჯახი ჰქონდა. მახსოვს, ერთხელ საპირველმა ისოდ წითელი ღროშაც კი შევაკერინეთ...

— ის ღროშა ჩვენთან ინახება, ძია!

— რას ამბობთ! მართლა? მამაშვილობას, მიჩვენე ერთი! — სახე გაუბრწყინდა მოხუცს.

— წამობრძანდით! — და ექსკურსიამძღოლმა მოხუცთან ერთად მთელი ჯგუფი იქითკენ გაიყოლია.

სიმეფლისაგან დაცრეცილი წითელი ღროშა საპატიოდ იყო გაფენილი შუშის ვანიერ ყუთში. იქვე მახლობლად, სტენდებზე, მაგდას ფოტოსურათთან ერთად იმდროინდელი მუშა რევოლუციონერების სურათებიც იყო გამოფენილი.

მოხუცი დიდხანს დასცქეროდა ბათუმის მუშების პირველ საბრძოლო ალამს, შემდეგ თავი ასწია, თვალები ცხვირსახოციით ამოიწმინდა და იქ მყოფთ გადახედა:

— იყო იდეა, გვქონდა რწმენა, გვაყვარდა ბრძოლა და ვაჟკაცობა, ვეტრფოდით ძმობას, ერთობას, თავისუფლებას. საგმირო და სასახელო საქმედ მიგვაჩნდა სიმართლისათვის სიკვდილი და თავგანწირვა... აქ სულ ჩვენი ბიჭები ყოფილან. — სტენდებზე მოფენილ სურათებს ჰკიდა თვალი. — ეს ჩვენი კობა! ბევრი რამით ვართ დავალებული მისგან. ეს კი სილვესტრო ლომჯარია უნდა იყოს. ძალიან მომზადებული ვაჟკაცი იყო. ეს ხომ ჩვენი პორფირე... პორფირე...

— ქურიძე. — შეახსენა ექსკურსიამძღოლმა.

— დიახ, დიახ. ქურიძე. არ გამემტყუნება, სიბერე მჭირს, შვილო. ესეც არ იყოს, ნახევარ საუკუნეზე მეტია არ მინახავს ჩემი ძველი ამხანაგები. ეს ხომ ჩვენი თეოფილეა, საკმაოდ გამოცვლილა, მაგრამ მაინც შევიცანი. „თეოფილე გოგიბერიძე“ — ამოიკითხა ერთმა გოგონამ სურათის ქვეშ წარწერა და მოხუცს შეხედა.

— სწორია, შვილო, სწორი. ხომ ვთქვი, შევიცანი-მეთქი. ძალიან გულადი და გაბედული ბიჭი იყო. ერთხელ გენერალ ღრიაგინთან მიიჭრა და ცხენიდან გადმოთრევა მოუნდომა. ეს ოსმან გურგენიძეა, მაგრამ ამ მოხუცს რომ ვერ ვცნობ?

— ნიკო სანაძე. —ახლა მეორე გოგონამ მიაშველა მოხუცს წარწერიდან ამოკითხული.

—აჰ, ნიკო! როგორ ვერ ვიცანი! მემედ უსტი-ოღლი. ჩვენი მემედი. მაგისტანა პირდაპირი და გაბედული ვაჟკაცი მეორე არ ერია ჩვენს რიგებში. მაგის თავგადასავალი რომ იცოდეთ... პირველი ეს იყო, ბარიკადებზე იარაღით რომ გამოვიდა.

— გვიამბეთ, ძიავ, გვიამბეთ! — მოხუცის ირგვლივ შემჭიდროვდნენ ახალგაზრდები. — ძველი ამბების მოსმენას რა სჯობია!

— მართალია!

— სწორია!

ერთმანეთს აყვენენ ექსკურსანტები.

— რასაკვირველია, — თქვა მოხუცმა. — თქვენ კი არა, მეც მომინდა უკან მოხედვა და გარდასულისათვის თვალის შევლება.. დიდი ამბებისა და მოვლენების მომსწრეა, ახალგაზრდებო, ზემი თაობის ადამიანი. ძღრინდელ ათეულ საუკუნეს არ დაუძრავს კაცობრიობა ასეთი სწრაფი ტემპით, როგორც ეს მეცხრამეტე-მეოცე საუკუნემ მოახერხა.

ვესტიბიულში ახალგაზრდა კაცი შემოვიდა.

— დეიდა, აქ მოხუცი კაცი არ შემოსულა? — ჰკითხა მან თეთრხალათიან ქალს.

— კი, შვილო. ზემოთ ავიდა.

ახალგაზრდამ სწრაფად აირბინა ზემო სართულზე.

— ბაბუა გერონტი, — მიმართა მან მოხუცს. — რად გამოგვეპარე?!

— უთქვენოდაც არ გამჭირვებია აქ მოსვლა... მიდი, ნახე, დაათვალიერე. მანამდე მე აქ...

— ვინ არის? — თვალით ანიშნა მოხუცზე ახალმოსულს ექსკურსიამძღოლმა.

— ხმალაძე. — მიუღო ახალგაზრდამ.

— ხმალაძე?!

— გერონტი?!

და ყველამ შეხედა იმ სურათს, რომლიდანაც ხელ-ფეხზე ბორკილდადებული შავ წვერულვაშიანი ვაჟკაცი გამოიყურებოდა.

— ეს თქვენ ბრძანდებით?! — კითხვის ნიშნად ქცეული თვალები მიბრუნდა მოხუცისაკენ.

— მაგრამ დღეს „სიბერე მჭირს“, შვილებო, — თქვა მოხუცმა. ჭაღარა უღვაშზე ამაყად გადაისვა ხელი და იქ მყოფთ გაუღიმა.

* * *

გერონტი ხმალაძე ერთ-ერთი და სიმბოლური წარმომადგენელია ცხრაასიანი და მომდევნო წლების ბათუმის მუშათა რევოლუციური მოძრაობის მოწინავე მოღვაწეებისა. იგი მეცხრამეტე საუკუნის მიწურულში ჩამოვიდა ბათუმში, ერთ-ერთ ქარხანაში დანიწყო მუშაობა და მალე მუშათა წრეში ცნობილი პიროვნება გახდა. აქ შეხვდა იგი მეოცე საუკუნის დაბადებას და ახალი ერის შემოჭრას. მისი თანდასწრებით ჩამოყალიბდა ბათუმის მუშათა რევოლუციური კომიტეტი, მისი მონაწილეობით ეწყობოდა გაფიცვები, დემონსტრაციები, აჯანყებები. მუდამ იგი იღვა მოწი-

ნავე ხაზზე და მშრომელთა განთავისუფლების საქმეს მთელი ძალღონით
ემსახურებოდა.

და ერთხელ, როცა იგი პირველად შეიპყრეს, დააპატიმრეს და ჰკითხეს: — რას აკეთებ? რას ფიქრობ? რას სჩადიხარო? — მან ღიჯად უპასუხა:

— ისეთს არაფერს. აქ მხოლოდ ერთი ნაპერწკალია, იმას ვაღვივებთ, ხოლო როდესაც ჩვენს ქვეყანაში მობნეული ასეთი ნაპერწკლები შეერთდებიან და იელვებენ.. მაშინ კი ნამდვილი საქმე გაგვიჩნდება...

— ჩუმაღ! — ენა ჩაუგდეს, ბნელ საკანში გამოამწყვდიეს, სამართალში მისცეს, მაგრამ...

— უწლოვანია, ჭაბუკია, სამართალში არნამყოფიო და „ჭკუის სასწავლად“ ექვსი თვის ციხე აკმარეს.

ჭკუა მართლაც ისწავლა ხმალაძემ. ციხიდან გამოსულმა უფრო ფხიზლად და ფრთხილად განაგრძო თავისი გზა და.. როცა ნაპერწკლები მოპრავლდა ქვეყნად, ხმალაძეებმაც აიშვეს თავი...

გერონტი კვლავ გაიხსენეს, შეიპყრეს და...

— სხვის ბაღში რომ არ ჩახტესო, ხელ-ფეხზე რკინის ბორკილები დამაყარეს. — ღიმილით თქვა გერონტიმ და საუბარი დამთავრებულად მიიჩნია, მაგრამ აღარ მოეშვნენ.

— დიდხანს ატარეთ ბორკილები? — შეეკითხა ერთი ჭაბუკი.

— რამდენი წლის იყავით მაშინ?

— სად გაატარეთ პატიმრობა?

— მაპატიეთ, შვილებო, თავი შეგაწყინეთ. თუ ერთხანს კიდევ ვიცოცხლე და საშუალება მომეცა, აქაურ ამბებზე დაწვრილებით მოგესაუბრებო. ახლა კი დავიღალე, ნახვამდის.

* * *

გერონტი ხმალაძესთან შეხვედრა და საუბარი დიდი ხანია განზრახული ჰქონდა მუზეუმის ხელმძღვანელობას, მაგრამ არ იქნა და არ მოხერხდა.

თავიდანვე დაუდევარი ბუნების რევოლუციონერი, მუდამ სხვადასხვა საქმით იყო დატვირთული, დიდ ხანს ჩვენს მოძმე რესპუბლიკებში ძოღვაწობდა პასუხსაგებ თანამდებობებზე, ხოლო სამოცდათხუთმეტ წელს მიღწეული მოხუცი ომის ქარიშხლიან დღეებში, როცა ვაჟაკებისაგან სოფლები დაიცალა, რაისაბჭოს ჩაუდგა სათავეში და მართავდა. შემდეგ ოჯახური ამბები; ომში დაკარგული შვილის ცოლ-შვილის პატრონობა, მათი მოვლა და მიხედვა... და როცა ბაღიშები დაზარდა, დააოჯახა და თავი დაადგა...

ბუნების კანონს გვერდი არ შეეცვლება: მოხუცდა, მოიქანცა, მოტყდა და..

„გული არ იშლის ვუღობას,
მაგრამ არ მოსდევს ძალ-ღონე“

და გერონტი ხმალაძეც მიჰყვა ძალ-ღონის ნებას. ბუნების კანონს დაემორჩილა, საკუთარ ოჯახში დასადგურდა და მოსვენებული ცხოვრება განიზარახა. მაგრამ მაინც არ მოასვენეს, გამოუნახეს საქმე და სამუშაო. განსაკუთრებით ახალგაზრდობა დაეხვია და ააწრიალა: შეკრებებზე, საზეიმო საღამოებზე, თათბირებზე, სადაც კი რაიმე ღონისძიება ტარდება, ყველგან უნდა მივიდეს და მონაწილეობა მიიღოს. ზოგან სიტყვით, ზოგან მოგონებებით. ამ საიუბილეო წელს ხომ სულ აღარ ეშვებია. შეკითხვა უამრავი აქვთ ყველგან. მოზრდილებთან კიდევ რაღაცას გახდები, მაგრამ თანქრებმომარჯვებულ პიონერ-მოსწავლეებს ხომ ველარ დააღწევ თავს! იმდენი რამის მოსმენა და ჩაწერა სურთ, რომ პასუხის გაცემა სჭირს.

მუზეუმის ღრდი დარბაზი საზეიმოდ მორთული დახვდა ვეტერან რევოლუციონერს. აქ შეკრებილიყვნენ ძველი რევოლუციონერები, სამოქალაქო და სამამულო ომის მონაწილენი, შრომის მოწინავენი, მუშები და მუშა ქალები, ჭაბუკები, ქალიშვილები, მოსწავლეები, ლიტერატურისა და პრესის წარმომადგენლები. ასეთმა გულთბილმა შეხვედრამ იგი ძალზე გაახარა. ჯერ საერთო საღამო მისცა ყველას, შემდეგ ბოდიში მოიხადა და მისთვის განკუთვნილ სავარძელში ჩაჯდა.

— მაპატიეთ, მუხლებს ვერ ვენდობი. — ღიმილით თქვა მან და სათვალე მოირგო.

— არა უშავს, ეგრე გვესაუბრეთ! — იქ მყოფთა სურვილი გამოთქვა ერთ-ერთმა დამსწრეთაგანმა.

— მაშ, ასე, მეგობრებო.—დაიწყო მან.—თქვენც იცით, ნაპერწკალი, რომელიც ჩვენმა თაობამ ხანძრად აქცია, ძველი მსოფლიოს აღმგველი გახდა. მის ნანგრევებსა და დანაფერტლზე ახალი ქვეყნები აღმოცენდა და... ერთ-ერთი ასეთი ახალი ქვეყნის შვილები ვართ ჩვენც, მისი ერთგული, შემოქმედი და მშენებელი... ესენი ყველაფერი ჩაწერილია დიადი ბრძოლების მატრიანეში. ბევრჯერ თქმულა და მოგისმენიათ ამის შესახებ, ხოლო თუ გსურთ გავიმეორო, რაც უკვე იცით...

— აჯობებს, ჩაუწერელი ამბები მოგვიყვით და ჩავაწერინოთ!—შეჰკადრა ერთმა ახალგაზრდა ჟურნალისტმა, რომელიც თავისი გაზეთის დავალებით მოსულიყო.

— მართალია!

— სწორია!

მოიწონეს სხვებმაც.

— ამ შემთხვევაში უნდა მაპატიოთ, თუ ამბები ქრონოლოგიურად ვერ დავალაგო და თანმიმდევრობა დამერღვეს.

— როგორც გსურდეთ!

— როგორც გენებოთ!
და დარბაზი სმენად იქცა.

* * *

ქარხანაში ერთი მაღალ-მაღალი ახალგაზრდა მოვიდა და სამუშაო ითხოვა.

ადმინისტრაციამ კარგად შეამოწმა: ჯანმრთელი თუ არის, წერა-კითხვა თუ იცისო, კერპი და ურჩი ხომ არ არისო და, როცა ყველა მაჩვენებელი დადებითი აღმოაჩნდა: ჯანმრთელი იყო, გაუნათლებელი, მორჩილი და სანდო, — მუშად მიიღო და ხელფასი დაუნიშნა.

პირველად გერონტი ხმალაძე დაინტერესდა ამ ახალგაზრდა მუშის გინაობით:

— რა გქვია, ყმაწვილო, შენ?

— მემედი. — მიუგო ახალგაზრდამ.

— გვარი?

— უსტი-ოლლი.

— თურქი ხარ?

— თურქი თვითონ ხარ! — გაჯავრდა ჭაბუკი.

— მაშ?

— აქაური ვარ. კახაბრიდან.

— მაშინ ქართული სახელი და გვარი გექნებოდა!

— ქართული გვარი?! — ლოყები შეუჭარხალდა ახალგაზრდას. ნაწყენი შემოხედა ხმალაძეს და თავისთვის რაღაც ჩაილულულა.

ვაწყენინეო, ვაიფიქრა გერონტიმ და ინანა, რომ გაცნობისთანავე დამდურა ყმაწვილი კაცი: ალბათ, შემძულებს და ახლოსაც არ გამეკარებაო. მართლაც, რამდენიმე დღე შორს იჭერდა თავს უსტი-ოლლი. გულჩახრობილი და დაღონებული დადიოდა, მაგრამ ერთ დღეს...

— შენთან საქმე მაქვს! — უთხრა შესვენებისას მან ხმალაძეს და ანიშნა გავცალკევდეთო.

ხმალაძეს სხვანაირად ენიშნა, ფერი ეცვალა: ვაი, თუ რაიმე ცუდი განზრახვა აქვს და სისრულეში მოყვანას აპირებსო, მაგრამ თხოვნა მაინც შეუსრულა.

— შენ მართალი თქვი! — ეუბნება ახალგაზრდა ხმალაძეს. — მე მართლაც ქართული გვარი უნდა მქონდეს... უნდა მქონდეს და მაქვს კიდევ... გუშინ სოფელში ვიყავი და დედამ მითხრა, ჩვენი ქართული გვარი სანაძეაო. თუ მირჩევ, სახელსაც გამოვიცვლი. ოღონდ თურქი არ დამიძახო. გერონტიმ სიყვარულით შვავლო თვალი ახალგაზრდა აჭარელ ჭაბუკს.

— არა, კაცო, განა სახელი და გვარი ამმოვიღებს მშრომელებს ერთმანეთთან?! მათ საერთო ინტერესები ანათესავენ... ხომ ჩვენთან იქნები? ჩვენს წრეში? ჩვენს გვერდით?

ახალგაზრდამ ღიმილით შეხედა:

— არა. თქვენთან რა მინდა, როდტშილდისა და მანთაშევის ნათესავისა და მოკეთეს?! განა არ ვიცი, რად მეკითხები? იმიტომაც ვარჩიე, რომ ვინცაღა და სამსახური, რომ ასეთი ვაჟკაცები მეგულებოდა.

— მომეცი ხელი!

და ორი ვაჟკაცის მარჯვენა ერთმანეთს შერჩა.

იმ დღის შემდეგ უსტი-ოლლი წინაპრების გვარს დაუბრუნდა: ლოცვა-ვედრებაზე აიღო ხელი და სარწმუნოებასაც განზე გაუდგა.

— მემედავ, შენ ჭოვ, რაებს ჩადიხარ?! ღმერთი და მაკმადი დაგივიწყნია, ერთი ხანია ჯამეში აღარ დაიარები, ქართული შაფხა დაგიხურავს, აღარ მარხულობ. ალბათ, აწი ღვინის სმასაც დაიწყებ და ღორის ხორცსაც ჭამ! — უსაყვედურა ერთხელ ხოჯამ და დატუქსა.

— შერე, ამით მე ვის რას ვუშავებ? — შეჰკადრა ვაჟმა.

— ღმერთს ეუბრჩები და მაკმადს დალატობ! — გაცხარდა ხოჯა.

— არა მგონია, ჩემმა ურჩობამ დააკლოს რამე მათ ძლიერებას. — ღმილით უპასუხა ახალგაზრდა მემედმა და ხელი ჩაიქნია. — მე ჩემი გზა და კვალი ამირჩევია, მათ კი თავისი გზით იარონ.

და მეორე დღეს ქართული წესით გაშლილ სუფრაზე მემედმა პირველმა აიღო ღვინით სავსე სასმისი, თავისი ახალი სახელი ადღეგრძელა და თავის სიცოცხლეში პირველად შესვა ქართული ყურძნის ალალი წვენი..

— ნიკო სანაძეს გაუმარჯოს. — დასძახეს სუფრის ირგვლივ შემომსხდარმა ვაჟკაცებმა და „მრავალყამიერი“ წამოიწყეს.

— იმ დღიდან ნიკო სანაძე ჩვენი წრის თვალი და ყური გახდა. — გახაგრძო ხმალაძემ. — ჩვენთან ერთად ჩაება რევოლუციურ მუშაობაში, გაეცნო მოწინავე ადამიანებს, შეისწავლა წერა-კითხვა და ხელი მოჰკიდა თვითგანათლებას.

ამ დროს ბათუმის მუშათა რევოლუციური კომიტეტის საქმიანობა წარმატებით ვითარდებოდა. ეწყობოდა დემონსტრაციები, გაფიცვები, ტერორისტული აქტები, იბეჭდებოდა და ვრცელდებოდა არალეგალური ფურცლები და პროკლამაციები, ჩნდებოდნენ ახალ-ახალი პროპაგანდისტები და აგიტატორები, მაგრამ არც ამ მოძრაობის მტრებს ეძინათ. ამრავლებდნენ ხუნხუზებს, ჯაშუშებს, მოღალატეებს, აძლიერებდნენ პოლიციისა და ჟანდარმერიის რიგებს, აპატიმრებდნენ და ციხეებში ამწყვდევენდნენ საუკეთესო ვაჟკაცებს და ხშირად საიდუმლოებით მოცულ ტერორისტულ ძიებრთავდნენ.

— და ერთხელ კომიტეტის სხდომაზე დაისვა საკითხი იარაღის შექმნისა და მუშათა რაზმების შექმნის შესახებ. — უფრო ღრმად ჩაეფლო გერონტი მოგონებებში.

და ამ სხდომაზე ბევრი საჭირობოროტო საკითხი გაიჩნა. გადაწყდა დიდი დემონსტრაციის მოწყობა და მიტინგების ჩატარება, ხოლო თუ

პოლიცია შეეცდებოდა ძალის გამოყენებას და იარაღს მიმართავდა ძალისთვის ძალა დაეპირდაპირებინათ და იარაღისთვის — იარაღი.

ამ უკანასკნელის შესახებ დიდი სჯა-კამათი გაიმართა: ზოგი შიშობდა, ჩვენ იმდენ იარაღს ვერ შევაგროვებთ, რომ ბარიკადები უზრუნველყოთ, ზოგი სახიფათოდ თვლიდა იარაღით გამოსვლას. მეტი ნაწილი არ უარყოფდა შეიარაღებას, მაგრამ ეჭვობდნენ, იარაღს ვერ ვიშოვიით.

— განა რამდენი თოფი და დამბაჩა დაგვჭირდება პირველი გასვლისას? — იკითხა აქამდე ჩუმად მყოფმა სანაძემ.

— რაც მეტი იქნება, უკეთესია. — წამოიძახეს აქეთ-იქიდან.

— ეს ვიცი, მაგრამ... ასამდე თოფი და დამბაჩა რომ შევაგროვოთ... მერე მტერსაც ავართმევთ რამდენიც გვინდა...

— მაგრამ ასამდე თოფი და დამბაჩა სადღა ვიშოვოთ?

— თუ საჭიროა და ბრძოლა გვინდა, იარაღიც უნდა ვიშოვოთ. ოცამდე შაშხანას მე შევაქუჩიებ! ცოტ-ცოტა ყველამ იშოვოს და...

— კი, მაგრამ, ნიკო, საიდან გაქვს შენ ამდენი თოფის შოვნის იმედი? — ღიმილით შეეკითხა სანაძეს ერთი.

— ქალაქში იარაღი რამ გამოლია! რამდენი ბლაცყვი გოროდოვოთ დაჩერჩეტობს მოფარებულში... ერთს მაგრად ჩაეცხებ თავში და...

ამის თქმაზე ყველას გაეცინა.

— მაშ, როგორ გინდათ, თუ ძალად არ ავართმევთ ვინმეს, ნებით რომელი ბეჩი მოგვიგდებს თავის იარაღს?!

— და შენ გვპირდები ოცამდე თოფის შოვნას? — სერიოზულად გადმოხედა კომიტეტის ხელმძღვანელმა.

— შეიძლება მეტიც შევაქუჩო.

— ღმერთმა ხელი მოგიმართოს! — წამოიძახეს აქეთ-იქიდან.

თითო-ოროლა თოფისა და დამბაჩის შოვნა ყველამ ივალდებულა და დაიშალნენ.

* * *

— პრისტავის ნახვა მინდა! — ბოქაულ ჯაფარიძის ბინის სადარბაზო კარებთან ატუხულ პოლიციელს მიმართა ერთმა ახოვანმა ვაჟკაცმა.

— თქვენ ვინ ბრძანდებით? — წინ გადაუდგა პოლიციელი.

— ამას მას ვეტყვი! შენ შედი და მოახსენე! — მრისხანებით ჩახედა უცნობმა პოლიციელს.

პოლიციელი მრისხანებას დაემორჩილა.

ბოქაული ჯაფარიძე ფრთხილი კაცი იყო. უფრთხილდებოდა თანამდებობას, უყვარდა ცოლ-შვილი, მეფე და მისი ხელისუფლება, მაგრამ ყველაზე უფრო სიცოცხლე და თავისი თავი. აქამდე უღარდელად და მშვიდად ცხოვრობდა, მაგრამ ბოლო დროს რომ ეს ქვეყანა აირ-დაირია და ხა-



ლხი გაურჩდა, მისი მშვიდობიანი ცხოვრებაც შეიცვალა. დიდი ხანია რაც განთქმული ჯაშუში შმიგინი მოჰკლეს, გენერალ დრიაგინს ესროლეს. მართალია, დააცილეს და ცოცხალი დარჩა, მაგრამ... ხომ შეიძლება ჯაფარიძეს უმუხტლოს ბედმა და ტყვია არ ასცდეს?! ამიტომ დადის ქალაქში სამი-ოთხი პოლიციელის თანხლებით. საცხოვრებელი ბინის კართანაც ორი პოლიციელი უდგას.

— ვინ უცნობია?! — მკვანედ ახედა პოლიციელს პრისტავმა.

— ვინაობას არ ამხელს, თქვენო კეთილშობილებავ. — მიუგო პოლიციელმა.

— შემოუშვი! — და ჯაფარიძე ჩაფიქრდა. „ვინმე ჯაშუშია“, გაიფიქრა მან. „ვინ ოხერს უნდა მისი სტუმრობა?“ ჯაფარიძე ერთგული პოლიციელია, მეფის მსახური, მაგრამ ჯაშუშები და დასმენის მიმტანი მაინც არ უყვარს. კარგი არ მოაქვს ამისთანა ხალხთან ნაცნობობასა და კავშირს. ჯაშუშებს საიდუმლო პოლიცია და უანდარმერია ეტანება და უახლოვდება. ბოქაულს კი ქალაქში წესრიგის დაცვა აქვს მინდობილი... მაგრამ თუ მართლა ჯაშუშია მოსული და დასმენა მოაქვს?! თუმცა შესაძლებელია სულ სხვა განზრახვით მოდიოდეს?! — ჯაფარიძემ რევოლვერი ამოიღო და მაგიდაზე გაშლილი გაზეთის ქვეშ შეაფარა.

უცნობი შემოვიდა და თავის დაკვრით მიესალმა.

მასპინძელმა სალამზე არ უპასუხა, ისე შეაჩერდა და სავარძელში გასწორდა.

— მე ბათუმის მუშათა კომიტეტის დავალებით გეახელით, ბატონო პრისტავო. — უკითხავად წამოიწყო უცნობმა.

— ა! ბათუმის კომიტეტის დავალებით? — და ბოქაულმა იარაღის გამოსაღებად გასწია ხელი, მაგრამ...

— თავის შეწუხებას ნუ ინებებთ, ბატონო პრისტავო! — ხელი არ დაძრათ. — ანიშნა სტუმარმა და, როცა ჯაფარიძე ფერწასული გაიყინა, უცნობი უკითხავად ჩამოჯდა სკამზე. — მართალია, პოლიციის მსახური ბრძანდებით, — მშვიდად განაგრძო მან, — მაგრამ ჯერკერობით ჩვენთვის არაფერი დაგიშავებიათ. იმედი გვაქვს, მომავალშიც ასევე დარჩებით. ამიტომ ჩვენც არ გიცქერით ავი თვალით. თუ ამ საქმეშიც ხელს შეგვიწყობთ და დაგვეხმარებით..

— რა საქმეში? რა გნებავთ ჩემგან? — მოიდრიკა ეს თავმოყვარე ვაჟკაცი.

უცნობმა უთხრა დავალებული:

— მუშათა კომიტეტს იარაღი სჭირდება. ტყვია-წამალი. სად უნდა იშოვოს და შეიძინოს, თუ თქვენისთანა სანდო პირებს არ შეაწუხებს? რამდენიმე შაშხანა და მისი საყოფი ტყვია-წამალი... დიახ, დიახ. რამდენხ-

საც შეძლებთ. მეტის მოცემით მეტ ნდობასა და პატივისცემას დაიმსახურებთ.

— ეს, როგორ? მე, მე იარაღი ავიყარო და... არა. ეს როგორ?! მე...

— ნუ ღელავთ, ბატონო პრისტავო! — ამშვიდებს უცნობი. — ამ მოთხოვნის დაკმაყოფილების შემდეგ თქვენ შეგიძლიათ მშვიდად დაიძინოთ, იაროთ და ისეირნოთ ქუჩაში მცველის გარეშე. მოხსნათ პოლიციელი ბინის კარებთან...

— მაგრამ ჩემს სიცოცხლეს...

— დარდი ნუ გაქვთ. — შეაწყვეტინა სტუმარმა. — თქვენი სიცოცხლის დაცვის პასუხისმგებელი ჩვენი კომიტეტი და ორგანიზაცია იქნება.

ბოქაული ჩაფიქრდა.

— შემოიარეთ ხვალ საღამოს. — უთხრა მან არც თუ ისე კეთილად.

— მაგრამ იცოდეთ, ლალატისათვის საკუთარი თავითა და ოჯახით აგებთ პასუხს! — და სტუმარი გამოეთხოვა.

მეორე საღამოს ნიკო სანაძემ ოთხი შაშხანა და ექვსი ღამბაჩა მიიტანა კომიტეტში და ჩააბარა.

ღარბაზში მოწონების ხმა და ტაში გაისმა.

— მაგრამ სანაძეს ამით არ დაუმთავრებია იარაღის შეგროვების საქმე. — განაგრძო ხმაღამემ. — ახლა მან ორი სხვა ახალგაზრდაც გაიყვლია და მათი თანხლებით შერჩეულ პირებს ჩამოუარა.

სამსახურიდან გადამდგარი გენერალი გაკვირვებული შეხვდა მოულოდნელ უცნობ სტუმრებს.

— გვაპატიეთ! — მიმართა მას სანაძემ. — ჩვენ ბათუმის მუშათა რევოლუციური კომიტეტის სახელით გვახელით.

— აჰ, რევოლუციური კომიტეტის! — შეჰკვივლა გენერლის მოხუცმა მეუღლემ და ცახცახი აუვარდა.

— გთხოვთ! — სახლში შეიპატიჟა მასპინძელმა და მეუღლეს ანიშნა, დამშვიდდო. — დაბრძანდით!

სტუმრები სახლში შევიდნენ, მაგრამ დაჯდომამდე უარი თქვეს.

— რა გნებავთ? რით შემიძლია გემსახუროთ?

სხვების მაგივრად ხიკომ უთხრა, რისთვისაც შეაწუხეს მოხუცი გენერალი და უდროოდ სტუმრობისათვის ბოდიში მოუხადა.

— მაპატიეთ, ყმაწვილებო, — თავაზიანად უთხრა მასპინძელმა. — მართალია, სამხედრო პირი ვარ, უკეთ რომ ვთქვათ, ვიყავი, მაგრამ იარაღის ტარება არ მიყვარდა. ერთი პატარა ღამბაჩა მქონდა და სამსახურიდან გასვლის შემდეგ ჩემს დენშჩიკს ვაჩუქე. ასე რომ, ახლა ხელცარიელი ვარ. სხვა რამით თუ შემიძლია გემსახუროთ... — და ცოლისაკენ მიიხედა.

— გვაპატიეთ! — და სტუმრებმა გენერლის ბინა დატოვეს.
— ახლა ვის მივადგეთ? — ქუჩაში გამოსვლისას შეეკითხა ნიკოს
ერთი მხლებელთაგანი

— ვის? ვის და... უბეში რა გაქვს, ასე რომ გამოგბერვია? — თვალი
დაატანა ახალგაზრდას ნიკომ.

— არაფერი. ეს ისე...

მაგრამ სანაძე აღარ ჩაეძია, სწრაფად ჩაუყო ხელი უბეში და იქი-
დან ოქროს ფულებით საფხე ქისა ამოაცალა.

— სად იყო ეს?! ვის მოპარე?! — ისე ამღვრეული თვალებით ჩახე-
და მან ახალგაზრდას, რომ უკანასკნელს ფერი ეცვალა.

— არა, არ მომიპარავს. პატიოსნებას ვფიცავ, ყველაფერს ვფიცავ,
არ მომიპარავს.

— მაშ, სად იშოვე? გამოტყდი, თორემ! — და ნიკომ ჯიბისაკენ
წაიღო ხელი.

— გენერლის მეუღლემ ჩამიღო ჩუმაღ. — გამოტყდა საწყალი ბიჭი.

— მეორედ არ გნახო ჩემთან გავლილი! — უთხრა ნიკომ მას და
მიბრუნდა, გაუფრთხილებლად შეაღო გენერლის ბინის კარი და შივ
შევიდა.

— ჩვენ რევოლუციონერები ვართ და არა მძარცველები! — მოხუც
კოლ-ქმარს გადახედა მან. — სიმართლისა და ხალხის კეთილდღეობისა-
თვის ვიბრძვით. ასეთებისთვის რომ დავდიოდეთ, — ქისა აჩვენა. —
უფრო მეტსაც აღმოვაჩენდით თქვენს ოჯახში... აჰა, ჩაიბარეთ და ნუ
იტყვი, რომ ჩვენ უსამართლოდ ვეჭყევით ვინმეს. — ქისა მაგიდაზე
დადო და გამოვიდა.

ნიკოს საქციელით მოხიბლული მოხუცი გენერლის მეუღლე გამო-
ვიდა აივანზე და გადმოსძახა:

— გაუმარჯოს რევოლუციას!

* * *

რამდენიმე წუთის შესვენების შემდეგ ხმალაძემ კვლავ განაგრძო
საუბარი...

ციხე სავსეა. ბათუმის მუშათა მოძრაობის მთავარი ხელმძღვანელე-
ბის მეტი ნაწილი შეპყრობილია. მაგრამ რევოლუციური მუშაობა მა-
ინც არ წყდება: კვლავ იმართება კრებები და გაფიცვები, კვლავ ეწყობა
გამოსვლები და დემონსტრაციები, კვლავ კლავენ მეფის ჯალათებსა და
გაიძვერებს, კვლავ იბეჭდება და ვრცელდება პროკლამაციები.

ბარცხანა, კახაბერი, ფერია, ქობულეთი უჩინარი ქსელით გადაბმიან
ერთიმეორეს და წამოწყებულ საქმეს აგრძელებენ.

ხუთასამდე ცალი პროკლამაცია დაბეჭდეს ბარცხანის საიდუმლო
სტამბაში. პორფირე ქურბაძე, ივანე მგელაძე, ილია შარაშიძე და კოწია

წულაძე ედგნენ ამ საქმეს სათავეში. ამობეჭდილი ფურცლები დასაჯი-
გებლად გაანაწილეს: რამდენიმე ცალი გაიანე ჩხაიძეს გაატანეს ვაშლე-
ბით სავსე კალათს ამოფარებული; ალექსი თოფურიაშვილი და ესე წულაძემ
ორასი ცალის განაწილება ივალდებულეს, ქობულეთის რაიონში დასა-
რიგებლად ჯემალ ცენტერაძეს გაატანეს ოთხმოცი ცალი, დანარჩენი გი-
გო ბასილაშვილს ჩაულაგეს სურსათით სავსე ჩანთაში და მურღულისა-
კენ გაისტუმრეს.

გიგო ბასილაშვილი მჭედელი იყო, თბილისელი. იგი ბათუმში რკი-
ნიგზის შემოყვანისას ჩამოვიდა. ამ გზის მშენებლობაში მონაწილეობ-
და. შემდეგ მურღულში გადავიდა. სპილენძის მადნეულის მადაროებში
დაიწყო მუშაობა. მადაროელები ყველაზე უფრო იყვნენ დაწაფებული
ახალ მოძრაობას და ბათუმის მუშათა კომიტეტთან მტკიცე კავშირი ჰქონ-
დათ. ერთ-ერთი ყველაზე გაბედული და სანდო მეკავშირე გიგო იყო. არა-
ლეგალური ლიტერატურით მუდამ იგი ამარაგებდა მადაროელებს და ახ-
ლაც მას მიენდო ეს საქმე.

პოლიციას, ალბათ, აღებული ჰქონდა ეჭვი და, როცა ბასილაშვილი
„ლინეიკით“ აჭარისწყალზე ჩავიდა, მოულოდნელად გაჩხრიკეს, პროკ-
ლამაციები უბოვეს, დააპატიმრეს და რამდენიმე დღის წვალების შემდეგ
ციხეში გადაგზავნეს.

— გადმოგცემთ მის ნაამბობს. — ცოტა ხნის შესვენების შემდეგ
თქვა გერონტიმ და უღვაში შეიგრიხა.

„კამერაში ორი პატიმარი დამიხვდა. ერთი ჩემი ნაცნობი, კარგი რე-
ვოლუციონერი, გაბედული ვაჟკაცი, მეორე უცნობი, ჩია ტანის სუსტი
ახალგაზრდა. ჩემი ნაცნობი მაშინვე გაიყვანეს იქიდან და მე უცნობ
ახალგაზრდასთან დამტოვეს. უცნობი შემოგზავნილ ჯაშუშად მივიღე
და ავი თვალთ გადავხედე. ალბათ, მასაც ასე მოვეჩვენე და ზიზლით
შემომხედა, მაგრამ შეკითხვა მაინც არ დაიზარა.

— სადაური ხარ, ბიძია?

— არ არის შენი საქმე!

— რატომ დაგაპატიმრეს?

— თავი გამანებე! — შევეზღვირე მე და ზურგი შევაქციე. ისიც ჩამო-
მეხსნა, მაგრამ რამდენიმე წუთის შემდეგ კვლავ ჩემი ამბით დაინტერეს-
და. არც ერთ კითხვაზე პასუხი არ გავეცი, მაგრამ რომ არ მომეშვა, ზეზე
წამოვიჭერი და საცემრად წავიწიე. ალბათ, შევეტაკებოდით ერთმანეთს,
ხედახედველს რომ არ ჩამოველო და საჭკრეტში არ შემოეხედა.

მას შემდეგ ჩვენ ერთმანეთისათვის ხმა არ გავვიცია. იგი მუდამ კარგ
მოსაკითხს ღებულობდა. გახსნიდა, ამოალაგებდა. ყოველ სავანს ბეჯითად
გაჩხრეკდა, ზოგს ჭამდა, ზოგს გადაყრიდა. მე ვიჭეჭი ზურგშექცევით, მაგ-
რამ მის მოქმედებას ცალი თვალთ ვუჭკრეტდი.



ერთ დღეს ასეთი მოსაკითხის მიღებისა და გაჩხრეკის შემდეგ მოულოდნელად წამოდგა, მოვიდა ჩემთან და მხარზე დამადო ხელი.

ეროვნული
ბიბლიოთეკა

მე მოვიხედე და წყრომით შევხედე.

— ამხანაგო, შენ გიგო ბასილაშვილი ხარ? — მეკითხება იგი. გაკვირვებული შევაჩერდი.

— მურღულში მიმავალი დაგაპატიმრეს?

— ვინ მოგახსენა?! — კვლავ ეჭვით შევხედე მას.

— აი ახლა მივიღე ცნობა ამხანაგებისაგან. შენთან არის და ენდეო.

— კი, მაგრამ ვინ ხარ ასეთი?

— ჩვენნიანი ყოფილხარ, ძმო. ჯულაშვილი გაგიგონია?

— კობა?! შენ შემოგველე, ბიჭო! — წამოვვარდი, მოვეხვიე და გულში ჩავიკარა“.

ამ ეპიზოდს კიდევ უფრო საინტერესო ამბავი მოაყოლა გერონტიმ.

— ქარიშხლიანი ბნელი ღამეა. ზღვა ნაპირისაკენ ერეკება ავარდნილ ტალღებს. ქობულეთის მახლობლად ახლახან გადმოსხეს კაზაკებისა და პლასტუნების მოზრდილი რაზმი.

დასცხეთ, დახოცეთ, გადაწვ-გადაბუგეთ ყველაფერიო, აქვთ ნაბრძანები და მთელი სიზუსტით ასრულებენ.

სოფელ ფიჭვნარში, დიდ შარავზაზე, ერთი ჭაბუკი მიიჩქარის. პერანგის უბე გატენილი აქვს რაღაც ნივთებით, რომელზეც ხშირად შეივლებს ხოლმე ხელს და პიჯაკს ისწორებს.

სიბნელეში პლასტუნების რაზმს შეეჩეხა. არც კი უკითხავთ, ვინ არის და სად მიიჩქარის, ისე ჩასცეს ხანჯალი გულში და, როცა ჭაბუკი ღონემიხდილი იქვე დრმა თხრილში ჩაიკეცა, მიატოვეს და სიკვდილს მიანდეს მისი ბედი.

მაგრამ სიკვდილმა ვერ სძლია ახალგაზრდა ვაჟის სიცოცხლეს. სისხლისაგან დაცლილმა მოახერხა თხრილიდან ამოსვლა და გზისნაპირა მოსახლესთან მილასლასდა.

კეთილი გამოდგა პავლე ძიძიგურის ოჯახი. კარი გაუღეს, შეიყვანეს და დახმარება აღმოუჩინეს.

ვინა ხარ და სადაურიო, მომჯობინების შემდეგ ჰკითხეს და შეიტყვეს, რომ იგი მახლობელი სოფლიდან არის. გენერალ ფონდერლაუცის აგარაკზე მუშაობს აგრონომ გიგო ქლენტთან, მის შვილ თენგიზთან აქვს კავშირი და მის დავალებას ასრულებს.

იმ ღამითაც ასეთი დავალებით მიიჩქაროდა. ბარცხანიდან წამოდებული პროკლამაციები მიჰქონდა სოფელ ლელვაში, ალი სტამბოლიშვილი უნდა ენახა, იქიდან ქაქუთში გადასულიყო და ხასან ზოიძესა და ასლან ქარცივაძეს ხლებოდა. უკანასკნელად წყავროკაში გაივლიდა და ასლან კალანდარიშვილს ჩააბარებდა დარჩენილ ფურცლებს.

„სწორედ ამ ფურცლებმა მიშველაო“, იტყოდა ხშირად ცენტრაჟისინი რომ უბეში არ მქონოდა, ხანჯლის წვერი მეორე მხარეს გადავიდაო“.

დავალემა მაინც შეასრულა ახალგაზრდამ. სიარული იღარ შეეძლო, მაგრამ სანდო პირების მეშვეობით ყველაფერი მოაგვარა.

ამის შემდეგ ცნობილი გახდა ახალგაზრდა ცენტრაჟი.

— ძალიან ბევრი შეიძლება ითქვას და დაიწეროს ამ აღამიანებზე. — წერაში გართული ჟურნალისტებისაკენ გაიხედა ხმალაქემ. — უნდა დაწეროთ, უნდა დაბეჭდოთ მათი ამბავი. ბათუმში ბევრი გაბედული ვაჟკაცი გვყავდა, მაგრამ ქობულეთშიც არ იყო ცოტა. რეჟებ თხილაიშვილი იქაური წითელი რაზმის ჯგუფს ხელმძღვანელობდა. მის რაზმში იყვნენ სულეიმან დავითაია, კოსტა ტულუში, არიფ ჩაუშ-ოღლი, ალექსანდრე ანთაძე, მიხაკო ქარსელაძე, ვანო ფესვიანიძე და კიდევ მრავალი და მრავალი ვაჟკაცი. თვითეულ მათგანზე თითო წიგნი დაიწერება.

— დავწერთ, პატივცემულო გერონტი, დავწერთ! — წამოიძახა კუთხეში ჩამჯდარმა ახალგაზრდამ, რომელსაც სითამამეზე ეტყობოდა, მწერლობას ეწაფებოდა.

— თქვენ მხოლოდ გვიამბეთ ასეთი საინტერესო ამბები და...

— თუ საკმარისად არ თვლით... — გაეღიმა მოხუცს. — ერთ უფრო მხიარულ ამბავსაც გეტყვი და ამით დავამთავროთ.

— გთხოვთ!

— გთხოვთ!

— მინდა ვიამბოთ ლევან გურიელის, ამ ერთ დროს ქებული გვარის შემარცხვენელზე. გაგიგონიათ ლევან გურიელი?

— წაგვიკითხავს, წაგვიკითხავს!

— მე კი ვიამბობთ თქვენამდე მოუღწეველ ამბავს.

— გთხოვთ! გთხოვთ! — კვლავ გაისმა ხმები.

ლევან გურიელმა სწავლა-განათლების მიღება რომ ვერ შეძლო და დაიზარა, მეფის სამსახურში შესვლა გადაწყვიტა და იქ დაწინაურება, მაგრამ არც მეფის მთავრობა იყო იმდენად ბრიყვი, რომ გაუნათლებელი კაცისათვის მაღალი თანამდებობა მიეცა. ამიტომ სხვა რომ ვერაფერი გზა გამოჩნდა, პოლიციაში შესვლა გადაწყვიტა და ვახმისტრი გახდა. ვახმისტრი დღევანდელი სერჟანტის წოდებას უდრიდა, მაგრამ როგორც თავადიშვილს, გუბერნატორიც კი „მისი ბრწყინვალეობით“ იხსენიებდა და ხშირად დიდ წვეულებებზეც იწვევდა. ლევანს არ აკმაყოფილებდა ეს პატივი და ოფიცრის ხარისხისათვის იბრძოდა. ამისათვის დამსახურება იყო საჭირო და ეს დამსახურება მან ჯაშუშობითა და მუშა-რევოლუციონერების დევნითა და შეპყრობით მოიპოვა. მიიღო მეფის წყალობა, დაიმშვენა მხრები „პრაპორშჩიკის“ ეპოლატებით და უფრო გათამამდა.

ხალხი მომთმენი და კეთილია, მაგრამ ლალატს არავის აპატივებს. ერთხელ იანვრის მზიან დილას, როცა მარხილით გოროდოკიდან მოსვლინობდა, ქალაქში შესვლისას დაუხვდნენ წინასწარ მომზადებული ტერორისტები და...

ძალიან ცოტას თუ ეწყინა მისი სიკვდილი. მუშებმა ზეიმი გადაიხადეს. ახალ-ახალი ლექსებითა და სიმღერებით „შეამკეს“ მისი სახელი.

პოლიციამ ფრთები შეისხა, დატრიალდა, დაფაცურდა, მაგრამ მაინც დამაინც თავი არავის გამოუდვია. ისევ მიცვალებულის მიხედვას შეუდგნენ და საკადრისი გასვენების მოწყობა განიზრახეს.

უპირველეს ყოვლისა, ასეთი „ღირსეული“ კაცის ცხედარს ძვირფასი კუბო უნდა შეუკრან და განთქმულ ხელოსანს მიადგნენ.

„ნათესავი გარდამეცვალა და იქ მივდივარ“, — დახვდათ სახელოსნოს კარზე მიწერილი.

„ცოლი მყავს ავად და ვერ ვიმუშავებ“, — მეორე ხელოსანსაც ჰქონდა მიზეზი.

„ცოლოურს მივდივარ ქორწილში და არ ვიქნები“, — დაებარებინა მეზობლისათვის მესამე დურგალს.

მეოთხე ქალიშვილს ათხოვებდა და დაკვეთებს არ ღებულობდა.

მეხუთეს „ისპანკა“ შეჰყროდა და ლოგინში იწვა.

ირბინეს, იარეს, მთელი ქალაქი მოირბინეს, მაგრამ ისეთი ვინმე ვერ იპოვეს, რომ სცოდნოდა კუბოს შეკვრა.

შემდეგ, როგორც იქნა, აღმოაჩინეს ერთი ოსტატი, რომელიც მხოლოდ ურმის თვლებს აკეთებდა და იმას მიმართეს.

— თავის დღეში კუბო არ გამიკეთებია! — კატეგორიული უარი თქვა ოსტატმა და გაუკვირდა, რატომ მაინცდამაინც მე მომადგნენო.

უარი თქვა, მაგრამ არ გაუვიდა. შეპირდნენ, ორმაგად მეტ ფულს მოგცემთო, კარგ მასალას...

ბოლოს და ბოლოს, რა დიდი რამე უნდა ოთხი ფიცრის შეკვრას.

დათანხმდა, დაუთქვა ვადა და შეუდგა საქმეს...

მართლაც არც ისე ძნელი ყოფილა. შუადღემდე გამოკერა გვერდებო, ფსკერი და ის იყო სახურავის შეკვრას შეუდგა, რომ სახელოსნოს კარს ერთი პატარა ბიჭი მიადგა და შიგ შეიხედა.

— გამარჯობა, ბიძია, თქვენი.

ხელოსანმა უსიამოვნოდ გამოხედა:

— საფლავის მჭრელს და მეკუბოვეს მუშაობის დროს გამარჯვებას არ ეუბნებიან. — უთხრა ბავშვს და ჩაქუჩი მოიმარჯვა.

— მერე, თქვენ ხომ საფლავს არა სჭრით! — შეესიტყვა პატარა სტუმარი.

— მაგრამ კუბოს ვაკეთებ, ჩემო ბიძიკო!

— ვისთვის გინდათ, ბიძია, კუბო? — დაინტერესდა ბავშვი.

— ვისთვის? გურიელი გაგიგონია? ლევან გურიელი. პოლიტიკაში რომ მსახურობდა. ვიღაც მადლიანს ჩაუძაღლებია და ახლა მე მაკეთებენ კუბოს მისთვის. გაიგე?

— დიახ, გავიგე.

— ჰოდა, რას იტყვი ახლა? — გაუღიმა ოსტატმა ბავშვს. — ხომ გავაკეთო? როგორ მირჩევ?

— ჰო, გააკეთეთ გურიელისათვის კუბო. ერთი კი თქვენთვისაც გაკეთეთ. — მიუგო ბავშვმა და ისე სწრაფად გაუჩინარდა, რომ ოსტატმა თვალიც ვერ ჰკიდა.

— რაო? ეს რა თქვა ამ საძაგელმა. — ჩაქუჩი ხელიდან გაუვარდა მას. — „შენთვისაც გაკეთეთო“. გასაგებია, ახლა კი ყველაფერი გასაგებია.

წინსაფარი შემოიხსნა, ხელსაწყო იქით-აქეთ მიჰყარ-მოჰყარა, გარეთ გავარდა, დარაბა დახურა და ცარციტ მიაწერა:

„ტიფი შემეყარა, ვიღუპები. შებირებას ვეღარ ვასრულებ“, — და ორი კვირით გადაიკარგა.


— ვაგონს, რომლითაც ლევან გურიელის ცხედარი მიჰქონდათ, ახალგაზრდებმა უკან მკვდარი ძაღლი გამოაბეს და ისე გაისტუმრეს! — დაამთავრა ხმალიძემ საინტერესო ამბების მოყოლა და... — მადლობელი ვარ. ჩემი ასაკის ადამიანს სათქმელი და სალაპარაკო არ დაეღევა.

მოხუცმა თვალელები მილულა და მისუსტებული ხმით განაგრძო:

— უკან გასული წლები და დღეები. წინ ნათელი მზე და მომავალი. წარსულში სახელოვანი გმირების ხსოვნა და სახელებია, მომავალში ახალი ადამიანების დიდი მიზნები და ამოცანები. — თვალელები ფართოდ გააღო და დაუმატა:

— ვაჟკაცს ორი სახელი უნდა ჰქონდესო, ამბობს ჩვენი ილია. ერთი აქ დასატოვი, მეორე თან წასაღებო. მე მუდამ ეს ორი სახელი დამქონდა თან და ვუფრთხილდებოდი. ერთს ვტოვებ, მეორეს, ალბათ, მალე გავიყოლიებ, მაგრამ მიხარია და კმაყოფილი ვარ, რომ ორივე ერთად მიმშვენებს ხსოვნას.

მოხუცი დინჯად წამოდგა, მადლობის ნიშნად თავი დაუკრა ყველას და წელი ნაბიჯით ძველი რევოლუციონერების ჯგუფს გაჰყვა.





ჯემალ ქათამაძე ბაღდადის ზეცა

ვლ. მაიაკოვსკის.

მაისის მინდვრებს ხალიჩად კეცავს
და ბაღებს შვენის ვარდების ფერი.
ღრმა და ლურჯია ბაღდადის ზეცა,
ასე ნათელი და მშვენიერი.

აქ საღლაც ჰყვავის ოცნების ბაღია,
ჟგავილებს ართობს ნიავი ნელი...
საღლაც აქ შენი ბავშვობა დარჩა,
საღლაც აქ შენი ბავშვობა მღერის.

კლდეზე ჩამორბის ცინცხალა ღელე,
დაცვარულ მოღზე ირმები დგანან.
პატარა ბიჭი ყელს მოიღერებ

და მწვანე ტყეში მიჰყვები მამას...

ჩიტის ყელივით წკრიალებს წყარო,
ლაღად დაუსტვენს ბუჩქებში შაშვი,
მიჰყვები ბილიკს, ღელავ და ხარობ
და დიდი მუზა მოვარდა მაშინ.

ხის წვეროებზე ნისლები დადის,
ბაღდადის ზეცა ჰგავს მწვანე ფარჩას...
ვით უკვდავება, დარდი და მადლი
საღლაც აქ შენი სიმღერა დარჩა.

მერე როდესაც მოადექ კავკასს
და სურნელება ყვავილთა გეცა,
თქვი: — ლექსის მადლი აქედან წამყვა,
ჩემი დედაა ბაღდადის ზეცა.

ცა გავსებული ახლა მტრედებით
და გულს ედება სიმღერა ტალღად...
თუ საქართველო არის ედემი,
შენ აქ ედემის ბულბული არ ხარ?!

ბაბუაჩემი

ბაბუა იყო მორწმუნე ღმერთის,
არ გააცდენდა თარავს და ჯამეს,
როცა საწყალი კვდებოდა, მახსოვს,
როცა სიკვდილი ითვლიდა წამებს,
რა მონდომებით,
რა მოწყურებით
სვამდა და სვამდა ათასგვარ წამლებს...
და ჩურჩულებდა რაღაცას თვისთვის
და აღარ სწამდა ხოჯა, თარავი...
ხშირად მეტყოდა: — ცხოვრებით, შვილო,
ჯერ არ გამძღარა ქვეყნად არავინ...
მე გამიკვირდა, ასი წლის კაცი
სიკვდილს ებრძოდა, მკაცრი და ხასი.
მაშინ ვიყავი პატარა ბავშვი
და არ ვიცოდი სიციოცხლის ფასი.

პოეტის გული

რა არის მართლა პოეტის გული,
როგორ განიცდის ტკივილს და ვნებას,
პატარა ვარდის ჰკლავს სიყვარული,
ჩიორა ჩიტის აჰყვება ნებას.
მისი ფიქრების, ოცნების შარა
არ იზომება საზომით, არა.
დიდი პოეტი უდრის დუნიას,
თუმცა პატარა ჩიტის გული აქვს...
და ატირდება, ვით ჩვილი ბავშვი,
კარგი ლექსისთვის თუ ერგო ტაში...
და დღედაღამე იმაზე ფიქრობს,

რადაც მთავარი ვერა თქვა თითქოს.
და ასე მიდის დღეები მისი,
ცხოვრება დიდი, მღელვარე, რთული
და სანთელივით დნება და იწვის
დიდი პოეტის პატარა გული.

ნუ გეშინია

ღია სარკმელში შემოდის ქარი
და სურნელება შემოაქვს ველის
და თმას მიწეწავს, ვით ანცი ქალი,
ქარი ქირქილა და საყვარელი.
ცაზე იშლება ნისლების ფარდა,
ზღვაზე დაეშვა თოლია მშვიდი,
მერე იელვა და მეხი კართან
დაეცა, როგორც ყუმბარა დიდი.
შენ ღია სარკმელს იმ წამსვე ხურავ
და გეშინია მეხის და წვიმის,
შეხედე, როგორ სცივა ბელურას,
შენს ფანჯარასთან წივის და წივის,
გააღე კარგო, ფანჯარა, წვიმის
ნუ გეშინია, ნუ, ნუ სრულიად...
და იმ მეხისგან, ყურიც რომ წივის,
ის სიჭაბუკის დასასრულია.





ნოღარ მოღეზაქე

ღ კ ბ რ უ ნ ე ბ კ

რვასართულიან მშენებარე სახლს კიბე არ ჰქონდა და ისინი ფიცარნაგს შეჰყვნენ. სართულის ყოველ ბაქანზე და ოთახებში სამშენებლო ხელსაწყოები ეყარა. შეუღესავ კედლებს ოთხკუთხა ჭდეები აჯდა და გეგონებოდა, ბრიკეტები ერთმანეთზე უღუღაბოდ დაუწყვიათო.

ღრუბლიანი დღე იყო. მზე მხოლოდ დროდადრო გამოიხედავდა და მშინაც შეუტრევებულ ცაზე წვიმის სუსხი იგრძნობოდა. სწორი ქუჩები და ვეებერთელა კორპუსები ზემოდან თავისებურად ლამაზი ჩანდა. არც ისე შორს, შენობის მიღმა, მოლივლივე ზღვა იშლებოდა და სანაპიროს მწვანე ზოლი გასდევდა.

ისინი ორნი იყვნენ. წინ მიმავალი ორმოცდაათი წლისა იქნებოდა. დაჰმუჭნილი კები, რომელიც თავზე დაუდევრად ეხურა, ჭალარა თმას ნახევრადაც ვერ უფარავდა. გამოხუნებული კომბინეზონი ეცვა, ჯიბეჩამოფლარტული. იგი თავდახრილი მიაბიჯებდა. ოდნავ შეკრული წარბები შინაგან განსჯასა თუ ღრმა ფიქრებს ამყლავნებდა, თითქოს რაღაც საბოლოოდ ვერ გადაეწყვიტა, თითქოს გუნებაში თავის თავთან ვერ შეთანხმებულიყო. და ეს პირქუში გამომეტყველება მის სათნო, თბილ სახეს თოვლის ფიფქით ეფინა. იგი ვერ გრძნობდა უკან მომავალის დაყინებულ მხერას, რომ მის ყოველ მოძრაობას თვალს ადევნებდნენ, როგორც საშიშ, მოსალოდნელი ფათერაკის გარდუვალ წუთებს. თანამგზავრი ორი ნაბიჯით იყო დაშორებული, ზოგჯერ იგი ათი ნაბიჯითაც დაშორდებოდა, როგორც დამნაშავე, რომ შემთხვევისთანავე გაქცეულიყო. მაგრამ თანამგზავრი გაქცევას არ აპირებდა.

— გიმუშავნია ოდესმე? — ჰკითხა ჭალარა მამაკაცმა გაბზარული ხმით.

პასუხმა რამდენიმე წამით დაიგვიანა.

— არა.

ჭალარა მამაკაცმა ჩაახველა, რომ დაეფარა უკმაყოფილო გრძნობა. თანამგზავრს, ვინ იცის, მერამდენედ ეკითხებიან, თუ გიმუშავიაო. დაროცა უპასუხებს არაო, ვერ მიმხვდარა, რატომ მაშინვე დადუმდებიან და ისეთი შეგრძნება იპყრობს, თითქოს დანაშაული პირველად ახლა ჩაედინოს.

როცა კანტორიდან გამოვიდნენ, იგი შეცბუნებული იყო; რა ძალამ მოიყვანა აქ, რა ძალამ აიძულა თავისი სურვილის წინააღმდეგ ემოქმედა. იგი არ ტყუოდა, როცა თქვა, არ მიმუშავიაო, მუშაობას არც აპირებდა. როცა მოსწავლე იყო, ცხოვრების გზას არ აცდესო, შეიბრალებს და საშუალო სკოლა დაამთავრებინეს. მაგრამ საშუალო სკოლის დამთავრებიდან ერთ წელსაც არ გაველო, რომ დამნაშავეის სკამზე აღმოჩნდა...

მას შემდეგ ხუთი წელი გავიდა.

მამა გარდაცვლილიყო, დედას მუშაობა ღამის დარაჯად დაეწყო, უმცროსი და საშუალო სკოლას ამთავრებდა. ოჯახს სიანხლე ოდნავაც არ ეტყობოდა; ორი რკინის საწოლი, ძველი მაგიდა და სამი სკამი, მაგიდის გარშემო რომ იყო შემოწყობილი, ისევ ისე ელავა, თითქოს მისი წასვლის შემდეგ არავინ შეხებოდეს. კედლებს ალაგ-ალაგ წვიმის ჩამონაყონი შავი ზოლები გავლებოდა. როცა კარები დაუკითხავად, ფეხისკვრით გააღო; დედა კუთხეში დაბალ სკამზე იჯდა და თავის ბამბის ქურთუკს კემსავდა. სახეზე არც გაკვირვება და არც სიხარული გამოხატვია — შვილს ცივად, ეჭვით შეხედა. ამ მომაკვდინებელ დუმილში რამდენიმე წამმა გაიარა. იგი კარებთან გაქვეავებული; ენადაბმული იდგა და ამ ხუთი წლის მანძილზე პირველად შეეკუმშა გული, პირველად იგრძნო, რაღაც შორეული და თანაც ახლობელი ტკივილი.

— ჩამოდი, გოგი?! — დაარღვია სიჩუმე დედამ.

— როგორც ხედავ.

დედის ხმაში გამოხატული ღმობიერება უეცრად ცივმა, უტყვმა მზერამ შეცვალა.

— რას აპირებ? — გაისმა მისი მზერასავით გამჭოლი ხმა.

იგი არ ელოდა ამ კითხვას, არ ეგონა, დედა თუ ნახვისთანავე ამას ჰკითხავდა. რას აპირებს?.. ამ კითხვაზე არასოდეს გაუცია პასუხი. შეიძლება ეს გარეშეს ეკითხა და არა დედას. შინისაკენ მომავალი, არავითარ სინდისის ქენჯნას არ გრძნობდა. მართალია, ბიჭების შესახებ არაფერი იცოდა, მაგრამ ისინი ხომ ქალაქში იქნებოდნენ და ხმას უბატონოდ ვერაზინ გასცემდა. როცა ვაგონიდან გადმოვიდა, თვალი სადგურის ბაქანს მოავლო, თითქოს დამხვდურს ეძებსო. მაგრამ ქუჩაში ისე გავიდა, არავინ მოსალმებია. მისი ძველი შარვალი, გახუნებული ტილოს ხალათი, გაუპარსავი სახე და გაკრეჭილი თავი, ავადმყოფური გამომეტყველება და თვალების თავხედური ტრიალი გამვლელებს აეჭვებდა. მიაბიჯებდა მარტო

და სახლები, გაზონებში ქარდაკრული ყვავილები და ტოტებგაშლილი ხეები თითქოს ხელს ჰკრავდნენ, ახლოს არ იკარებდნენ და, როგორც გამვლელები, ისინიც გზას უთმობდნენ.

დედა ახლა თვალებით ეკითხებოდა, რას აპირებო.

მან ჩემოდანი კუთხეში დააგდო და კარებში გაიღალა. გარეთ ისეთი შთაბეჭდილება შეექმნა, თითქოს უცხო ქალაქში, უცხო ქუჩაზე იყო. ქუჩას ორივე მხარეს მაღალი სახლები გასდევდა. იქ, სადაც წინათ ფეხსაცმლების შემკეთებელი ჯიხური იდგა, მინისკედლებიანი მაღაზია გაეკეთებინათ. იმ ჯიხურში იყრიდნენ ბიჭები თავს, ისხდნენ და ლაყობდნენ, ქალიშვილებს გაუქირდავს არ გაუშვებდნენ. აი ის ადგილი, სადაც ძველი შენობის სარდაფში ჩაძვრებოდნენ და ნახევრად ბნელში კამათლებს აგორებდნენ. ახლა აქ ხუთსართულიანი საცხოვრებელი სახლი წამოუჭიმავთ. სახეშეცვლილი ჩანან ადამიანებიც, თითქმის ყველა უცნობია. ფეხით შემოიარა მთელი ქალაქი, გაიხსენა ძველი ადგილები, ათვალეიერებდა ვიტრინებს, ხედავდა პირმოცინარე ქალ-ვაყებს, მაგრამ ნაცნობთაგანს არავის შეხვედრია. ვილაცამ შემთხვევით მხარი გაჰკრა და იგი ზამბარასავით მოიმართა, მაგრამ... ეს რომ წინათ მოსვლოდა, ალბად, შეაკვდებოდა კიდევ. ახლა თავს ძალა დაატანა და მგზავრს მხოლოდ თვალი გააყოლა.

— გოგი, — უცებ დაუძახეს მას და დაძაბული სხეული მოეშვა. — როდის ჩამოდი, გოგი?

იგი ხელმარცხნივ შებრუნდა. მაღაზიის წინ თენგიზი იდგა.

— დღეს.

მათ ერთმანეთს მხოლოდ ხელი ჩამოართვეს. გოგი მოხვევას აპირებდა, მაგრამ თენგიზი უკან გადაიწია, მოერიდა, რომ ისინი ერთად არავის დაენახა, თითქოს შერცხვა კიდევ.

— ჩვენი ბიჭები სად არიან? — ჰკითხა გოგიმ.

— ბიჭები?..

თენგიზმა მხრები აიჩეჩა, ფერმკრთალი ლოყები წამოწნო.

— გივი ციხეში ზის.

— არ გამოსულა?! — გაკვირვებით შესძახა გოგიმ.

— არა. თამაზი სწავლობს, მესამე კურსზეა. თემურმა ცოლი მოიყვანა, მგონი, მეთევზედ მუშაობს, კარგა ხანია არ მინახავს.

— შენ?

— მე?...—თენგიზმა თვალი მოარიდა და განზე გაიხედა, — ინსტიტუტში ვსწავლობ.

გოგიმ თავი დახარა, ბრაზისაგან ლოყებზე ალი მოედო, მაგრამ ვერაფერი თქვა და, როცა შებრუნდა, ჩაესმა თენგიზის ხმა, „ნახვამდის!“ მან მხოლოდ თვალი გააყოლა მიმავალს. იმედგაცრუებული, დამბლადაცემუ-



ლივით უსუსური იყო. იგი საშინელმა განცდამ შეიპყრო ეგონა, დადგა სამაგიეროს ზღვევინების ყამი. არავის არ აპატიებს მოტყუებას და სიტყვის გატეხას... იგი ქუჩის კუთხეში გაჩერდა, აქეთ-იქით გაიხედა, მაგრამ გაოგნებული ვერაფერს ხედავდა. გადასასვლელზე ავტომობილები მისრიალებდნენ. მის გვერდით ხალხი შექუჩულიყო. იგი ზინლით განერიდა ხალხს და მაშინაღურად მიაჩერდა მოპირდაპირე შენობას. აქ წინათ ორსართულიანი სახლი იდგა პატარა ეზოში. რკინის რიკულებიანი ჭიშკარი ქუჩაში გამოდიოდა. ეზოს ბოლო კუთხეში, ქუჩის პირას, წყლის კიოსკი იდგა. გოგი აეყუდებოდა წყლის კიოსკთან და სივარეტის კვამლში გახვეული იცდიდა. როცა სკოლაში გაკვეთილები მთავრდებოდა, ნელი ნაბიჯით მომავალ გოგონას შენიშნავდა და მაშინვე საფარიდან გამოვიდოდა. გოგონა მისი დანახვისას ნაბიჯს აუჩქარებდა და ეზოში გაუჩინარდებოდა. ბევრჯერ უფიქრია, გაეჩერებინა იგი, ან ისეთ ადგილას დახვედროდა, რომ გოგონას დამალვა ვერ მოეხერხებინა, მაგრამ ყოველთვის გამბედაობა ღალატობდა.

-- ნეტავ, სად არის იგი? -- უნებლიეთ გაიფიქრა მან.

ნაფიქრი მწვავე და მტკივნეული იყო, უფრო კი მოულოდნელი. გაბოროტებული გულის კუნჭულში აციმციმდა მკრთალი შუქი, გაანათა მის შიღმა ბნელი და უსასრულო სივრცე და, ვით ამომავალი მზის სიკაშკაშე, ისე აელვარდა დაკარგული იმედი. იგი თითქოს უგრძნობლად იდგა, მაგრამ წამით შეჩქრილებული გული გამალებით მუშაობდა. ახლა მას აღარ ამოქმედებდა შურისძიების ცეცხლი, არც სამაგიეროს ზღვევა. თვალწინ ედგა ხალხმრავალი ქუჩა, ქუჩის გასწვრივ ხის მესერი და მზის მოლივლივე სხივებში გახვეული ღოყაფაკლებული გოგონა. თითქოს იგი მოდის, რომ შეხვდეს, მოესიყვარულოს. იმავე წამს, როცა ეს მოჩვენება ხელშეახებდად იხილა, გულზე ჩაქუჩივით დაჰკრა სამაგიეროს ზღვევის წადილმა...

მეორე დღეს ქალაქის მილიციიდან უწყება მოუვიდა. გოგი ადრე დილით ადგა, მაგრამ სახლიდან ჯერაც არ გამოსულიყო. წასასვლელი არსად არ ჰქონდა და არც არავინ ჰყავდა გულის მესაიდუმლე. როცა საწოლში იყო, დედამ ისევე ჰკითხა, რას აპირებო. გოგის პასუხი არ გაუცია. ეს კითხვა ახლა თავად დაუსვა საკუთარ თავს და უწყება ხელში ნაღვლიანად შეატრიალა, თვალეებში უნდობლობა და ფარული გესლი გამოეხატა. იგი დანაშაულს არ გრძნობდა. იცოდა კიდევ, რისთვის გამოიძახეს მილიციაში, მაგრამ არ უნდოდა პირი ეჩვენებინა, რომ ვინმეს ემორჩილება. ქალაქის მილიციის უფროსის კაბინეტში დაუკითხავად შევიდა. კარებთან შედგა და კარის ამყოლს მიეყრდნო. სიამაყე დაკარგა და უხერხულ მდგომარეობაში აღმოჩნდა. მილიციის უფროსმა მშვიდად, მრავლისმეტყველად შეხედა. სახეზე ნაკეთი ოდნავადაც არ შერხვეია, პაპროსის ნაფაზი მთელი ძალით დაარტყა, კვამლი ბოლქვებად გამოუშვა და



თეთრ, მღვრიე კვამლში გაეხვია. გოგი გაუნძრევლად იდგა, უწყების ცისფერი ფურცელი ჯიბიდან ამოაძრო, შენიშნა, ჯიბეში დაჭმუჭმნოდა და მოერიდა მისი გამოჩენა.

— რას აპირებთ? — ჰკითხა მილიციის უფროსმა. პაპიროსი საფერფლეზე დარეკა და გასწორდა. — მუშაობას როდის იწყებთ? — დასძინა მცირე ღუმილის შემდეგ და ხელი ისევ საფერფლისაკენ წაიღო.

გოგი გაშეშებული იდგა. იგი რატომღაც მკაცრ შეხვედრას ელოდა. პასუხისათვის რამდენადმე მოემზადა კიდევ, მაგრამ მილიციის უფროსის ხმაში სიმკაცრე ოდნავადაც არ ეტყობოდა.

მილიციის უფროსი პასუხს ელოდა.

— რა თქმა უნდა, პატივცემულო უფროსო, — დაარღვია ღუმილი გოგომ.

— ვნახოთ, — თქვა მილიციის უფროსმა და სკამის საზურგეს მიეყრდნო, — ვნახოთ, — გაიმეორა მან.

— მაგრამ სად დავიწყო, განა მე...

— ნუ გეშინიათ, სამუშაოზე მიგიღებენ, მიმართეთ მშენებლობის ტრესტს.

გოგი ვარეთ ლოყააწითლებული გამოვიდა. ბრაზი ახრჩობდა. ვერ გრძნობდა, რომ ხელეები მომჯილა და აქეთ-იქით ისე იყურებოდა, თითქოს ჩხუბი სურსო. გამვლელები თვალში არ მოსდიოდა, მათი ზომშიმი, ხმაური, სახეზე გაფენილი ღიმილი აღიზიანებდა. ქუჩა ფართოა, ქალაქი დიდი, იგი არავის კითხავს რას აპირებს და ნურც მას ეკითხებიან რამეს, ნურვინ უყურებს ეჭვის თვალთ. სიბრაზისაგან ნაბიჯს აუჩქარა, თითქოს უნდა გაეცალოს აქაურობას, ხალხის ფეხის ხმა კი უკან მისდევს, მათ ღიმილს ვერსად ემალება. მათი ხმაური — ჩუმი და ზოგჯერ გულის მომაკვდინებელი, დაძაბულ ნერვებზე შხაპუნა წვიმასავით სცემს. გოგი ჭადარს მიეყრდნო, წამით შეისვენა. ეზოდან ალუბლის ხეს ტოტი გადმოეყო, ხოლო ტროტუარზე ჩარიგებული ჭადრები წყნარად შრიალებდნენ. ქუჩის თავში საწიგნებებიანი გოგონები გამოჩნდნენ, თეთრი ბაფთები თავზე პეპლებივით ასხდათ, პატარა ფუნთულა თითები მეღნით გასვროდათ. სახეზე უმანკო ღიმილი გაჰფენოდათ და ტუტუნებდნენ. მერე მათი ყრბამული ძლიერმა ხმაურმა შთანთქა — უფროსკლასელი ვაჟები შუა ქუჩაში გადადიოდნენ, ხორხოცობდნენ. გოგი გულგრილად იდგა. უცებ სისუსტე იგრძნო, მუხლები მოეკვეთა. შენიშნა, ცისფერკაბიანი ქალიშვილი მოდიოდა. მოაბიჯებდა თავდახრილი. გოგის თითქოს ეცნო იგი, თითქოს მას ძალზე ახლობელი სახე ჰქონდა, მაგრამ ვინ იყო იგი? ქალიშვილმა მხრებზე აწეწილი თმის ტევრი ხელის ნელი მოძრაობით გაისწორა და სწორედ თითების ეს ნაზი მოძრაობა, მისი ღუმილიანი გამომეტყველება საცნაური გახდა. ხუთი წლის შემდეგ ისევ ხედავს მას. როგორ არ ჰგავს იგი სუსტ,

გამხდარ გოგონას, რომელსაც ხან თმა ჰქონდა აწეწილი, ხანაც ფეხსაც-
მლის ქუსლები მოღრეცილი.

ქალიშვილმა გვერდით ჩაუარა. გოგის სახეზე იდუმალი სიბრაღული
ეხატა, მიანერდა მოწყენილი თვალით ისე, როგორც ამ ხუთი წლის წი-
ნათ, და ვერ მიმხვდარიყო, რა უფრო ძლიერი იყო. წარსულის გახსენება
თუ მკაცრი სინამდვილე. ერთი გულით ქალიშვილის შეჩერება, გამოლა-
პარაკება დააპირა, მაგრამ როგორც წინათ, ახლაც ფეხი ვერ მოიცვალა.
ავტობუსში მგზავრს ფულს უშიშრად წაპნიდა, ქალებთანაც თავი მოჰქო-
ნდა, ხოლო სიტყვის დაძვრა უჭირდა ამ ერთ ციკქნა გოგონასთან. იღვა
და უყურებდა მიმავალს. გვერდით ბაფთიანმა გოგონებმაც ჩაუარეს. იგი
ვერ იტყოდა, რა გრძნობამ გაიღვიძა მასში. ეს გრძნობა უცხო იყო, მაგ-
რამ საკუთარ სახეზე რომ შეეხედა, ალბათ, მიხვდებოდა, რომ თვალებში
მშობლის სითბო ედგა.

და სკოლიდან მოსულიყო და მეცადინეობდა. დედა სადილს ამზადე-
ბდა. გოგი დამნაშავესავით დაჯდა მაგიდის კუთხეში. მერე სახლიდან აღარ
გასულა, აღრე დაწვა. დედა შელამებისას წავიდა. შვილს კარებთან მოუ-
ხედა, გოგის არ დაუნახავს მისი მზერა, მაგრამ იგრძნო, დედა კარებთან
იდგა. შემდეგ ნელი ნაბიჯით გამოემართა და უსიტყვოდ სასთუმალთან
სამმანეთიანი დაუდო, თავშალი გაისწორა და წავიდა. გოგიმ ფულს დახე-
და, ჯიბეში კაპიკი არ უჭყიოდა — რაც ფული ჰქონდა, გზაში შემოეხარ-
ჯა. იმედოვნებდა, ჩამოსვლისთანავე ფულს ბიჭებთან იშოვიდა, მაგრამ...
ფულს მხოლოდ თითებით შეეხო, უნდოდა აეღო, ვერ გაბედა, თი-
თქოს ვიღაც უთვალთვალეობდა და ალებისთანავე ხელზე წაეტანებოდა.
რა ჯობს, ფული ხელუხლებელი დაახვედროს დედას, თუ... ბოლოს გადა-
წყვიტა ფული აეღო და გაიფიქრა, დავხარჯავ, შემდეგ კი ორმაგად გადა-
ვუხდიო. მაგრამ ფული მაინც არ აუღია, ბალიშის ქვეშ შესწია, რომ არ
გადმოვარდნილიყო. ალბათ, დედამ შეატყო, ჯიბეში კაპიკი არ მოეძეოდა.
დღეს სადილზე, როცა დედა მაგიდას აწყობდა, გოგიმ კერძს თვალი ვერ
მოსწყვიტა. პირზე მომდგარი ნერწყვი სულს უხუთავდა, მუცელში რაღაც
საშინლად წვავდა. ეტყობა, ფერი დაეკარგა, თორემ საბრალო დედა
არ ეტყოდა, ჭამეო. გოგიმ მაინც ვერ გაბედა პურის გატეხა. მხოლოდ
ახლა მიხვდა თავის უსუსურობას: სხვის ხელზეა შეჩერებული და მოწყა-
ლებასავით ელოდება, როდის ეტყვიან, ჭამეო.

იგი იწვა და ფიქრობდა. ოთახში ბნელოდა და ფანჯრიდან ღამის ცო-
ალი შემოდინდა. დას ეძინა, და ოთახის მყუდროებას მისი მშვიდი სუნ-
თქვა არღვევდა. დედა ახლა მალაჩიის წინ ზის ქურთუქში გახვეული და,
ალბათ, თვალები ებლიტება. გოგი კი თბილ საწოლში მოკალათებულა და
ძნელად ნაშოვნ ფულს ართმევს. კედლისაკენ გადაბრუნდა, რომ არ ეფი-
ქრა. მას არასოდეს უფიქრია და ფიქრი ეჯავრებოდა. ახლა ხელ-
შესახებად ხედავდა ყველაფერს. ხვდებოდა კიდევ მის საიდუმლოებას.

რა იოლი ყოფილა დანახო საკუთარი თავი, შეხედო შენს ყოველ დღეს და იცოდე მისი კარგიც და ცუდიც. არა, არ სურს იფიქროს, მაგრამ ვიღაც აიძულებს, ვიღაც ჩასაფრებია და წყლის ნაკადივით ესერის ფიქრებს.

კმარა! მოთმინების ფიალა აივსო. მან იცის, რა გააკეთოს და როგორ იმოქმედოს. თავი დაანებონ, მისი საქმეა იმუშავებს თუ არა. მარტო კაცი თავს ყველგან გაიტანს. ადამიანების კმაყოფილი სახე და ღიმილი გულს უკაწრავს. ვისაც სურს, იგი დატკებს მათი მშვენიერი ღიმილით.

გათენებისას ჩასთვლიმა და მაშინაც ოთახში დედა შემოვიდა. ბავშვებს ძილი არა დაეუფრთხორო, კარი ფრთხილად შემოაღო, გაიხადა ქურთუკი და გოგის ნაღვლიანი თვალით დააცქერდა, ყელთან საბანი შემოუკეცა და თმაზე შეუმჩნევლად გადაუსვა ხელი. გოგის არ ეძინა, მხოლოდ თვალი ჰქონდა დახუჭული და დედის მოძრაობა არ გამოპარვია. არ ფიქრობდა შეეხედა, მაგრამ რაღაც შინაგანმა ძალამ შეატოკა, მერე კი თვალიც გაახილა.

დედა მაშინვე გასწორდა.

— მოხვედი?! — თქვა გოგიმ და უძილობისაგან შეშუპებული თვალი მიპყრო.

— ჰო! — ყრუდ მიუგო დედამ და საწოლს გაშორდა. დადლილობისაგან მისავათებული მაგიდას დაეყრდნო. სახე მკაცრი ჰქონდა, თვალები — ცივი.

გოგიმ გვერდი იცვალა; გულალმა დაწვა და ჰერს მიაჩერდა. სახეზე იდუმალი ფიქრები ეხატა. ზოგჯერ მკაცრად მოკუმული ტუჩებიც შეუტოვდებოდა. თვალი ჰერისათვის არ მოუშორებია, ნელი, ნაღვლიანი ხმით თქვა:

— დედა, ფულს მალე დაგიბრუნებ!

— არა, შვილო, ფული შენ გქონდეს, არ მინდა, მაგრამ... — დედას ხმა გაეზარა, — სამუშაოს უნდა მოჰკიდო ხელი. რას იტყვის ხალხი. მე სამშენებლო სამმართველოში ვიყავი, ვთხოვე, სამუშაო მოგვენ.

გოგიმ ეჭვით გადახედა.

— შვილო, გზას ნუ აცდები, კარგად დაფიქრდი, რას სჩადიხარ!

„რას აპირებ“, მოესმა დედის ლაპარაკში მილიციის უფროსის ხმა. ინსტინქტურად თავი გააქნია, რომ ეს ხმა ყურთასმენიდან მოეშორებინა. მაგრამ წამით ჩამოვარდნილ სიჩუმეში გუგუნევით გაისმა ხალხის ხმაური, ავტომობილების გრიალი, თითქოს მთელი ქალაქი აქ შეგროვილიყო, ფანჯრის წინ. გუგუნი შემოდინდა ფანჯრისა და კარების ღიობებში, აწყდებოდა კედლებს. იგი გრძნობდა, რომ ეს იყო მოჩვენება, მაგრამ მაინც გაქცევას ცდილობდა. ხალხის ხმაური არ წყდებოდა, დიდი და პატარა, მოხუცი და ახალგაზრდა, ყველა ქუჩაში გამოსულიყო. გოგი კი მირბის და გაიძახის: „თავი დამანებეთ, მომეშვით!“ მაგრამ მის ყვირილს ყურს არავინ უგდებს, ხელი გაუშლიათ, გზას უღობავენ. და ეს საშინელი წარმოდ-



გენა უეცრივ შეიცვალა; ახლა სკოლიდან მომავალ გოგონებს ხედავს, თმებზე ბაფთა პეპლებივით ახით, მათი სიცილი მზის ათინათს ჩამოგავს. მოლიან, მოაბიჯებენ და ისევ ხედავს... ცისფერკაბიან ქალიშვილს; ჯერ პატარას, შემდეგ მხრებზე გაფენილი თმის ტევრით. გოგის უნდა დაუძახოს, გააჩეროს, მაგრამ ქალიშვილი ხედაც არ უყურებს... შენდება და ინგრევა ეს წარმოდგენები, ძალა არ შესწევს თვალი გაუსწოროს ყოველივე ამას.

— დედა, — წამოიძახა შიშით მან, მაგრამ ვიდრე რამეს იტყოდა, ხმას დაუწია, — დედა, წავალ, ვიმუშავებ...

როცა სამშენებლო სამმართველოდან გამოვიდნენ, მხოლოდ მაშინ მიხვდა, რომ უცნაური რამ გააკეთა. არ სჯეროდა, თუ სამუშაოს დაწყება ითხოვა. ეგონა, დაცინვით ან უარით შეხვდებოდნენ მის თხოვნას, ჰკითხავდნენ, უმუშავნია თუ არა, მაგრამ ეტყობა, დედას ყველაფერი უთქვამს. სამშენებლო სამმართველოს უფროსმა მშვიდად მოუსმინა, მერე თავი ასწია და ასევე მშვიდად უთხრა, განცხადება დაწერეთო, თანაც ელექტროლილაკს თითი დააჭირა. ოთახში ჯერ საქმის მწარმოებელმა ქალმა შემოიხედა, სამშენებლო სამმართველოს უფროსმა რაღაც ანიშნა და ცოტა ხნის შემდეგ კარი ჭალარა მამაკაცმა შემოაღო. გოგი ამ დროს განცხადებას წერდა. დაელოდნენ, ვიდრე განცხადებას დაწერდა, მერე ჭალარა მამაკაცმა ხმადაბლა უთხრა, წავიდეთო.

ისინი სულ მაღლა ავიდნენ. ერთ მხარეს ამოყვანილი კედელი ფრთამოტეხილი ფრინველივით გამოიყურებოდა. მუშები ერთ კუთხეში მოკალათებულნიყვნენ და ისვენებდნენ. თითქმის ყველა ახალგაზრდა იყო. ჭალარა მამაკაცის დანახვისას ფეხზე წამოდგნენ. გოგის ქვეშ-ქვეშ შემოხედეს, ცნობისმოყვარედ. ჭალარა მამაკაცმა ორი მათგანი განზე გაიხმო და რაღაც უთხრა. ამ დროს რახრახი გაისმა და ვეებერთელა ამწე ამოძრავდა. ქვევით ვილაც ჩაქუჩს მძლავრად სცემდა, ვილაც რკინას ადულაბებდა, ვილაც მღეროდა. ეს კლდესავით მღუმარე შენობა უეცრად გამოცოცხლდა. ჭალარა მამაკაცი ისევ გოგისთან მივიდა. ამწემ მათ რახრახით გადაუარა თავზე და კაუჭზე წამოგებულ ბაგირს ჰაერში მიარხევდა.

— ფრთხილად იყავი, ფათერაკს არ გადაეყარო! — უთხრა ჭალარა მამაკაცმა გოგის და მკლავზე ხელი მოჰკიდა. — შენ დღეს აქ იმუშავებ, კარგი ბიჭები არიან, — თვალი შემპარავად შეავლო და დასძინა, — მოწინავე ბრიგადაა, სირცხვილი არ ჭამო. თუ რამ დაგჭირდეს, მე აქ ვარ, — ბოლო სიტყვები მშობლიური სიტბოთი თქვა და წავიდა.

გოგი ერთხანს გაშეშებული იდგა. ცოტა არ იყოს, ეჭვი შეეპარა, ნათლად დაინახა, რომ მათთან ვერ გაძლებდა. სჯობს ახლავე გაეცალოს აქაურობას. ის იყო, წასვლას აპირებდა, რომ მაღალმა სუსტმა ბიჭმა ხელი დაუქნია, აქ მოდიო. გოგის ბრაზი ყელში მოეხვინა. ნამდვილად აიგლო

ამოდენა კაცი ბავშვი ჰგონია. ჰმ! არ იციან, ვინ არის იგი, თორემ... მა-
ლაღმა სუსტმა ბიჭმა ახლა ხმამაღლა დაუძახა, აქ მოდიო. გოგი უნებლი-
ეთ გაემართა მისკენ, შემოუარა დაწყობილ ბრიკეტებს და მის წინ
გაჩერდა.

— ბრიკეტები გადმოვიდე, — უთხრა ბიჭმა და ბრიკეტის დასაწყობი
ადგილი უჩვენა. მერე გადაიხარა და ამოყვანილი კედლის სისწორეს დააკ-
ვირდა. მერე თავისი ნახელავით კმაყოფილმა წაუღიღინა. გოგის ტუ-
ჩები მოეკუმა, თვალები ანთებოდა და რაღაც მღვრიე ბურუსში იყო გა-
ხვეული, და ამ ბურუსში მხოლოდ მაღალ სუსტ ბიჭს ხედავდა; იგი გაექა-
ნება, ყელში წვდება და ძირს ჩვარივით ისვრის. შესცქეროდა და ბოროტი
აზრები ტვინს უღრღნიდა. განაზრახის შესრულებისათვის მხოლოდ წამი
იყო საჭირო, მაგრამ...

— რას ელოდები? — უთხრა ბიჭმა.

გოგის ამ სიტყვაში მეგობრული ტონი ენიშნა, თუმცა ძალზე შორე-
ული და მჭრქალი, მაგრამ მაინც მეგობრული. სწორედ ამ ტონით ეძახ-
დნენ წინათ მას ბიჭები და მასში რამდენადმე მორჩილება იგრძნობოდა.
ეს უპირატესობა მას ლმობიერს ხდიდა. ახლაც ამ მეგობრულმა ტონმა
დაიმორჩილა — მოკუმული ტუჩები გახსნა, გონება გადაეწმინდა და, თი-
თქოს მზეს გამოეხედოს, ისე განათდა ყველაფერი. დაინახა, ბიჭები უსიტ-
ყვოდ მუშაობდნენ, არც ქვისა და არც ვედროს აღებას თაკილობდნენ. მა-
ლაღმა სუსტმა ბიჭმა ხელები შარვალზე გაისვა და გოგისაკენ შებრუნდა.

— ცუდად ხომ არ ხარ? — ჰკითხა მან.

— არა! — თავი ჯიქურ გააქნია გოგიმ.

— წამოდი, — მკლავზე ხელი მოჰკიდა ბიჭმა, — შეუძლებელი არა-
ფერია, წამოდი.

გოგი თანახმა იყო გაჰყოლოდა, მაგრამ სიჯიუტე ვერ დაძლია. ბიჭი
გრძნობდა, რომ ეს ახალბედა უცნაურად გამოიყურებოდა, მასში ორი
კაცი იყო, ორი ერთმანეთის მოწინააღმდეგე. ხელი, რომელიც მის მკლავზე
ედო, არ ჩამოუღია, არც მეორედ უთქვამს, წამოდიო. დაელოდა, ვიდრე
დამშვიდდებოდა. გოგიმ ამ ყურადღებაში თავისი მოქმედების გამარ-
თლება დაინახა და მორჩილად გაჰყვა.

— აი ეს ბრიკეტებია გადმოსატანი, — უთხრა ბიჭმა კუთხეში დაწყობილ
ბრიკეტებზე. ბრიკეტები ორიოდ მეტრზე იყო გადასატანი. გოგის
სახეზე ჯიუტი, უკმაყოფილო გრძნობა გამოეხატა. არასოდეს უფიქრია და
ვერც წარმოიდგენდა, თუ ბრიკეტის გადაზიდვა მოუხდებოდა. ბიჭი კედელთან
მივიდა, ხის ვეებერთელა ყუთიდან დუღაბი ამოიღო და ამოყვანილ
კედლის პირს დაასხა. მერე ზემოდან ბრიკეტები დააწყო. გოგი მისი მუ-
შაობით გაერთო. თანაც გული ბრიკეტების გადასატანად ეწეოდა. აქეთ-
იქით გაიხედა, ნაცნობთაგანი არავინ იყო. ბიჭმა ბრიკეტს ძებნა დაუწყო.
მაგრამ რომ ვერ ნახა, გოგისათვის არც შეუხედავს, თავად მოიტანა ბრი-
კეტი. გოგი ელოდა, ბიჭი კვლავ ეტყოდა, ბრიკეტი მოიტანეო, ბიჭს კი



არაფერი უთქვამს და გოგიმ უნებლიეთ ბრიკეტი ბრიკეტზე დაადო, დადო ხარა და, როცა ორივე ერთად აიღო, წაიბორძიკა. არ ეგონა, ასე მძიმე თუ იყო.

— რას შვრები! — შესძახა მაღალმა ბიჭმა.

— არაფერია, — ძლივს მიუგო გოგიმ.

— მოიცა, — უთხრა ბიჭმა და ზედა ბრიკეტი ხელებშუა ააცალა, — თავს რატომ იკლავ, თითო-თითო გადმოზიდე.

გოგიმ მყისვე სიმსუბუქე იგრძნო და წინააღმდეგობის გაწევა არ უფიქრია. შემდეგ რამდენიმე ბრიკეტი თითო-თითოდ გადაიტანა. ბოლოს, ბრიკეტი ბრიკეტზე ისევ დადო და ორივე ერთად აიღო. მაღალმა სუსტმა ბიჭმა ისევ დაუძახა, რატომ შვრებიო. გოგის ყურადღება არ მიუქცევია. ბიჭებმა ერთმანეთს გაკვირვებით გადახედეს. გოგიმ ბრიკეტები მაღალი სუსტი ბიჭის გვერდით დადო და ხელები შარვალზე გაისვა. სახეზე სიამაყე ეტყობოდა.

— ახალია, — თქვა ერთმა.

— ღონიერი ჩანს, — დასძინა მეორემ.

— ზარმაცი არ უნდა იყოს, — დაასკვნა მესამემ.

გოგიმ შინაგანი ძალა იგრძნო. კიდევ ერთხელ გადაიტანა ორი ბრიკეტი ერთად. მერე აქოშინებული გულის დასამშვიდებლად წამით შეჩერდა და დააკვირდა მაღალ სუსტ ბიჭს, რომელსაც კედელი ამოჰყავდა. გოგის წარმოდგენა არ ჰქონდა სახლის მშენებლობაზე. ამოყვანილ, სწორ კედლებს ჩვეულებრივ მოვლენად თვლიდა. თურმე... მაგრამ თავისი მორჩილება გულზე მინც ხენჯად აწვა. ვინმე ამხანაგთაგანი ბრიკეტით ხელში რომ დაენახა, ალბათ, გაშოტავდა მიწაზე. ამ ფიქრმა მოულოდნელად გაუელვა თავში და იგრძნო, თითქოს შეუფერებელ რამეს სჩადიოდა. ბოლო ბრიკეტი უხალისოდ გადაიტანა და ბიჭებმაც შეისვენეს. გოგი მათ ახლოს ჩამოჯდა, ფიცრის თავში. სიგარეტს მოუკიდა და დაყინებით ეწეოდა. ბიჭები ლაყბობდნენ, ერთმანეთს ამხანაგურად აქილიკავებდნენ, იცინოდნენ. ამ ხნის მანძილზე გოგისათვის არ შეუხედავთ, არც არაფერი უკითხავთ, თითქოს მათ გვერდით არ მჯდარიყოს. სიგარეტს კიდევ უფრო დაყინებით დაეწაფა. როცა ისინი ხორხოცობდნენ, ერთმა მეორეს ხელი გაჰკრა და ეს უკანასკნელი გოგის დაეჯახა. გოგი შექანდა და, რომ არ წაქცეულიყო, იატაკს ხელით დაეყრდნო. სიგარეტი პირიდან გაუვარდა და ბიჭები კიდევ უფრო ახორხოცდნენ. გოგი ადგა, ხმა არ გაუღია, თვალები ბრაზით აენთო და სახე გაუჰარხალდა.

— რა უსინდისო ხართ! კაცი კინალამ მოკალით, — თქვა მწითურმა, რომელიც აქამდე ბაიყუშვით იჯდა.

— რა მოხდა მერე! — აგდებულად მიუგო წამბიძგებელმა.

— როგორ თუ რა მოხდა!

გოგი გაალმასებული იყო, ფეხები გაჩაჩხა, აი ერთ მათგანს დაავლებს

ხელს და ქუჩაში ისვრის. მაგრამ მაღალმა სუსტმა ბიჭმა, რომელმაც ნიშნა გოგის აფორიაქებული სახე, მხარზე ხელი დაჰკრა, გვაპატიე; უნებლიეთ მოგვივიდაო, უთხრა მან. გოგიმ ხელი ჯიქურ მოიშორა და გაბოროტებით ზურგი შეაქცია, თითქოს რაღაც დიდი უბედურება მომხდარიყო. ბიჭები დუმდნენ. ზოგმა მუშაობა დაიწყო. შემდეგ მათ სხვებიც მიჰყვა. გოგი ისევ პირშეკრული იყო.

— თემურ, — დაუძახა მწითურს მაღალმა სუსტმა ბიჭმა, — გადმოიტანე ბრიკეტი.

გოგის უეცრივ გული შეუქანდა, ასე ეგონა, მკერდში რაღაც ჩაწყდა. თემურს ცეცხლმოდებული მზერა გააყოლა. უძლურის სიბოროტემ შეიპყრო, ნეტავ ხელიდან ბრიკეტი გავარდნოდა, ან რაიმე ხიფათი მოსვლოდა. მაგრამ თემურმა ბრიკეტი სწრაფად გადაიტანა და გოგის შეხედა — შენს გასაკეთებელ საქმეს მე ვაკეთებო, ამბობდა მისი თვალები. გაპარხალებული გოგი გაფითრდა და თითქოს საქანელაზე მდგარიყო, ისე შექანდა. აშლილი გონება წინდაუხედავად უბიძგებდა, გადაედგა ნაბიჯი. მერე ამ იღუმალ ბიძგს უნებლიეთ აჰყვა და ისე სწრაფად გადმოიტანა ბრიკეტი, თითქოს ვიღაცას ეჯიბრებო. მუშაობის დამთავრებამდე ერთხელაც არ შეუსვენია და არც ხმა გაუღია.

მუშაობა დამთავრდა. ზოგი კომბინეზონის გამოსაცვლელად წავიდა, ზოგიც ხელ-პირის დასაბანად. გოგის ყურადღებას არავინ აქცევდა. კიბეზე დაეშვა, ჯერ ფრთხილად, შემდეგ კი ფეხების ბრახა-ბრუხით. ქუჩაში სიმსუბუქე იგრძნო და ნაბიჯს აუჩქარა. ქუჩაში გავლა ჭირდა, გოგი მხრით მიარღვევდა ზღვა ხალხს. გახსენებაც არ უნდოდა, რომ დღეს ბრიკეტებს ეზიდებოდა. არა, ამას ვერავისთან იტყოდა და ქვეშეუცნობლად კმაყოფილი იყო. არც მალულად გავლას ფიქრობდა და არც ვინმესთან შეხვედრას ერიდებოდა; ვისაც რა უნდა, ის ჰკითხო, მას უკვე სათქმელი აქვს, ვერავინ დაძრახავს. მასში იშვა რაღაც ახალი, რომელსაც გრძნობდა, მაგრამ ვერ აეხსნა. ხელშესახები გახდა წარსული, მისი აუტანელი ტკივილები. თურმე ადამიანებისა ეშინოდა, ეს ფართო ქუჩები ვიწრო ეჩვენებოდა და ვეებერთელა კორპუსები — პატარა.

მას აღარ სურს მარტოობა, აღარ სურს განერიდოს ხალხმრავალ ქუჩას და გვერდი აუაროს ნაცნობს. სიამოვნებით გავა შუა ქუჩაში, გამლის ხელებს, ქარს პირს მიუშვერს და გახელებულივით ირბენს, იყვირებს, მან უკვე იცის რა არის სიხარული. გზა! არ შეუძლია ნელა იაროს, არ შეუძლია აბობოქრებული სული დაიოკოს. ასე ჰგონია, თავაწყვეტილი მირბის კიდეც, ხალხი ულოცავს გამარჯვებას, ახალი დღის დასაწყისს. ასე ჰგონია, შეუძლებელი შეძლო!... ტანში აყრყოლებს, სუნთქვა უჭირს, კანკალებს და ვერ გრძნობს, რომ მის არსებობას ვერავინ ამჩნევს. ნეტავ, სად არის ხელჩანთიანი გოგონა, მისი დანახვისას ეზოში რომ ჩაიპარებოდა. ახლაც ზომ აღარ დაემალება?!. უეცრად საყვირისა და მუხრუჭების ძლიერი ხმა



ჩაესმა. შედგა. როცა მძღოლის ყვირილი გაიგონა, მხოლოდ მაშინ მიხვდა რომ მის ფეხებთან „ვოლგა“ დამუხრუჭებულყო. გოგი გამოერკვა, შერცხვა, და ეს სირცხვილი ისე აღებეჭდა სახეზე, თითქოს სირცხვილთან თანშეზრდილი ყოფილიყო. ჩვეულებრივ გადაჭრა ქუჩა და ახლა უკვე სირბილით გაემართა შინისაკენ.

ეზოში ბავშვები თამაშობდნენ, მეზობლის ქალი აივანზე სარეცხს ფენდა. იქით მოხუცები კიბეზე ჩამომსხდარიყვნენ, დამღრალი ხელები ჯოხზე ჩამოეყრდნოთ და ბაასობდნენ. გოგიმ ჩქარი ნაბიჯით ჩაუარა მათ და კიბე აირბინა. კარები დახურული იყო, არც არავითარი ხმა არ გამოდიოდა. წამით შედგა, რომ ძალა მოეკრიბა, შინაგანი ალტკინება დაეშოშმინებინა და კარი ფეხით შეაღო; დედა მაგიდას აწყობდა და პურს ჭირდა. გოგის დანახვისთანავე ორივე შეცბუნდა, ეტყობა, მის მოსვლას არ ელოდნენ. გოგიმ მათ ეჭვიან მზერას პირი მოარიდა და მტვრიანი პერანგი გაიხადა. ოთახში სიჩუმე დამკვიდრდა, არც ერთმა არ იცოდა, რა ეთქვა. დედამ წვნიანი თეფში მაგიდის ცარიელი კუთხისაკენ გასწია და შვილს ეჭვით შეხედა.

— მოდი, ჩვენთან ერთად ისადილე, — უთხრა მან.

გოგიმ ტანი შეარხნია, თითქოს სიცივე იგრძნო, და წვნიან თეფშს გადახედა.

— ჰო, მოშიებული ვარ, დღეს პირში ლუქმა არ ჩამიდგია. დედას ხმა გაებზარა.

— სად იყავი მთელი დღე?

— სად?.. — ორაზროვნად თქვა გოგიმ და მაგიდას მიუჯდა. დედისთვის არ შეუხებდავს, არ უგრძნია მისი დაჟინებული მზერა, თეფში თავისკენ მისწია და პური გატეხა, — მშენებლობაზე, სადაც გამიშვი.

— მაშ, იყავი?!

— ჰო, ცოტა გამიჭირდა, მძიმე სამუშაოა. მაინცაღამაინც არც ხალხი მომეწონა, კინაღამ გამოვიქეცი.

— არა, შვილო, ჭკუით მოიქეცი, შეეჩვევი მათ და...

გოგიმ მხრები აიქნია, ვნახოთო.

— შეუჩვეველი ხარ, ჯერ მუშაობა გაგიჭირდება. აბა შენ იცი, სიბერეს თუ არ ჩამიშხამებ. ახალგაზრდა ხარ, ყველაფერს მოესწრები. ოჯახში შენ უნდა იყო მამის მაგიერი. შენს დას შენს მეტი ვინ ჰყავს. მას სწავლა უნდა. შენც ისწავლი, თუ კი მოინდომებ!

— ჰო, ნანამ უნდა ისწავლოს!

ეს ხმა ზარის წკრიალივით გაისმა. მოულოდნელი რამ იყო, ვერავინ მიხვდა, ვინ თქვა ეს. ნანა ძმას თვალს არ ამორებდა. იგი მუდამ პირქუში, უხეში ახსოვს, ერთხელაც არ მოფერებია, ვერ იტყოდა, რა იყო ძმის სიყვარული. იგი არ ჰგავდა მისი ამხანაგების ძმებს, მას არასოდეს უკითხავს.

უჭირდა თუ ულხინდა. თავს დამცირებულად გრძნობდა, როცა ჰქვია ღმერთს.
დნენ, ძმა თუ გყავსო.

— გოგი, მე შენთვის ახალი პერანგი ვიყიდე, — უთხრა მან დაბალი ხმით.

— მართლა?!

— ჰო, დედას აქვს შენახული.

— ძალიან კარგი.

— დედა დაბადების დღისათვის გინახავს. — იგი ისე ლაპარაკობდა, თითქოს ხელში დედოფალას ესიყვარულეზაო.

გოგომ თეფში მოასუფთავა, გასწორდა და სველი ტუჩები ქალაღდის ხელსახოცით მოიწმინდა. რა მცირე დრო გავიდა დილიდან მოკიდებული და ამ მცირე დროში რა დიდი ცვლილება მოხდა. დილას თავს დამცირებულად გრძნობდა, საკუთარ ჭერქვეშ ყოფნა ესირცხვებოდა, არ ფიქრობდა, რა ბედი ეწეოდა საკუთარ დედასა და დას. და აი იგი უფლებამოსილი მამაკაცი გახდა; ოჯახი მისი საზრუნავია. მტერსაც და მოყვარესაც მან უნდა გასცეს პასუხი. აქამდე ერთხელაც არ დაინტერესებულა ავეჯი შეეძინა, ოთახი მოეწყო და სტუმარს დახვედროდა; თუ ვინმე არ შეაწუხებდა, მასაც ეს უნდოდა. თურმე რამდენი რამაა ოჯახში გასაკეთებელი და ეს ყველაფერი მან უნდა გააკეთოს. მამაკაცი ის არის და ეს საქმეც მას ეკლება.

ეს ფიქრი სასიამოვნოც იყო და მწარეც. ალბათ, რაც ამ რამდენიმე წამში გაიფიქრა, მის შესრულებას წლები დასჭირდება. არა, ფიქრს არ აჰყვება, ყველაფერს შეძლებისდაგვარად გააკეთებს. იგი გრძნობდა, რომ დედა და და სიყვარულით შემოსცქეროდნენ. დაწოლის წინ ფეხი დაათბილვინეს, საწოლი გაუსწორეს და, ვინ იცის, რამდენჯერ ჰკითხეს, კიდევ ხომ არაფერი უნდოდა. დედამ წასვლისას შუბლზეც აკოცა.

გოგის თვალი არ მოუხუჭავს, უნდა გათენდეს, იყოს დილა, ადგეს და სამუშაოზე წავიდეს, ყველამ დაინახოს, რომ მუშაობა სურს, აქვს ბევრი ფიქრი და მიზანი. რატომ ასე ნელა გადის ეს დრო? ჰგონია, შუაღამეს გადასცილდა. მაგრამ არა, ჯერ ნანა არ დაწოლილა, ისევ წიგნს კითხულობდა. უცებ საწოლი უხეში, აუტანელი გახდა, თითქოს სხეულის ქვეშ ჭიანჭველები დაბობღავდნენ. მას აღარ შეუძლია ამდენი ლოდინი, არ უნდა ძილი, არც ამდენი ფიქრი. კმარა! ისედაც ბევრი დრო დაკარგა!

და ხედავს, ავტობუსში შედის, ხალხი ერთმანეთს აწყდება, ფეხზე დასადგომი ადგილიც არაა. იგი მაინც მიძვრება, თვალები დასისხლიანებული აქვს, სახე—აშლილი. მას უკვე იცნობენ და გზას უთმობენ, ჯიბეებზე ხელს იკიდებენ. გოგი მოხერხებულ ადგილას ჩერდება, თანაც ხელჩანთებს, ჩემოდნებსა და ჯიბეებს ათვალიერებს. ყურადღებას არ აქცევს

მგზავრების ზიზლიან თვლებს. იცის, შიშისაგან ხმას ვერ ამოიღებენ გვერდით ბერიკაცს გადახედა, ეტყობა, სოფლელი ვინმეა; მაღალსაწილურს ორივე ხელით ჩაფრენია და უაზროდ გამოიყურება. გოგამ ხალათის ჯიბეში ორ მანეთს მოჰკრა თვალი. დიდი არაფერია, მაგრამ ცოტას ცოტა მიემატება. ბერიკაცს გვერდით ამოუდგა, ხელი ნელა გააცურა მისი ჯიბისაკენ...

გოგი საწოლში ტყვიანაკრავივით შეხტა. მიმოიხედა, კარგა დიდი დრო გასულიყო. ოთახში გულისგამაჩუყებელი სიჩუმე იდგა. თავი შეაქნია, რომ მუმლივით დახვეული ფიქრი მოეშორებინა. უნდოდა, მაგრამ თვალიდან ვერ იშორებდა ამ საშინელ მოგონებას.

ღამე გატყდა. აღგომა ცისკრის მოსვლას დაასწრო. უძილობისაგან შეშუპებულ სახეზე ცივი წყალი შეისხა და სამუშაოზე წაუხეხებლად წავიდა. დილის ნისლში გახვეული ქუჩები თანდათან იღვიძებდა. დღეს უკვე საშიში არაფერი აქვს, იცის რა უნდა გააკეთოს და არავის არ გამოეჯიბრება, არავის არ ათქმევინებს, მუშაობა არ შეუძლიაო. გოგამ ფიცარნაგი სირბილით აიარა. ბიჭებს შინაურულად, ხმადაბლა მიესალმა, ხალათი გაიხანდა და ბრიკეტების გადმოტანას შეუდგა. ბიჭები რატომღაც არ ჩქარობდნენ, ზოგს ტანზე ჯერაც არ გამოეცვალა, ზოგიც სიგარეტს მშვიდად აბოლებდა. ცოტა ხნის შემდეგ გოგამ მათი ეჭვიანი მზერა იგრძნო, ეტყობა, შეატყვეს, რომ თავის გამოჩენა სურს.

ერთი საათის შემდეგ ბიჭებმა შეისვენეს, გოგიც გაემართა მათკენ და აი უცებ გაიგონა, ნაცინარიო. რა თქმა უნდა, ეს სიტყვები მას ეკუთვნოდა. აი თურმე რატომ უყურებენ ეჭვით, რატომ არიდებენ პირს. მაშ, ყველაფერი გაუგიათ! ერთი გულით გაქცევა დააბირა, შეიძლება სხვას. მაგრამ მათ არ უნდა გაკვირვებოდათ. როცა ბიჭებმა მუშაობა განაგრძეს, გოგი გაშეშებული იდგა: იმედგაცრუებული და განადგურებული. მას არავინ ავალებს ბრიკეტის გადაზიდვას. რა საშინელებაა, როცა გინდა ტოლებთან საერთო ენა გამოიხატო, ყველასთან გულთბილად იყო, გაუზიარო შენი ფიქრები, როცა გულში არავითარი ბოროტება არ გიდევეს და მაინც უნდობლად გიყურებენ, გინდა და ვერ გაგიმყდვენებია შენი კეთილი სურვილები, ცდილობ და ვერ მიახლოებიხარ მათ. ნუთუ არ იციან რა არის მარტოობა, ყველასაგან მოძულება? რატომ ერიდებიან, რატომ გაურბიან? იგი არაა პირფერი, არ ეხერხება ერთი თქვას და მეორე გააკეთოს, მოვიდა გულწრფელი გრძნობით და ასე გულწრფელი იქნება მუდამ.

მაგრამ გოგის გულისთქმა არავის ესმის. გრძნობს, ამ ვეებერთელა მშენებარე კედლებში იგი მარტოა. რა გულით აიღოს ბრიკეტი? გაუცრუვდა მთელი იმედები. რა თქვას შინ?... რაკი ერთხელ აცდა გზას, ასე გზააბნეული უნდა იაროს?... წავა სახლიდანაც, იგი საკუთარი სინდისის წინაშე მართალი იქნება, მას სურდა სწორ გზას დადგომოდა, მაგრამ ამის საშუალება არ მისცეს.

ადგილს მოწყდა, თვალაჭრელებული კინდამ კედელს მიეხალდა და როცა ფიცარნაგზე დაეშვა, მხოლოდ მაშინ მოჰკრა თვალი ბიჭების გოცებულ მხერას. მაგრამ გვიანდა იყო, იგი მთელი სისწრაფით ჩარბოდა ფიცარნაგზე, თითქოს ვიღაც მოსდევდა უკან. ჩქარა, ჩქარა... მაგრამ იგი ქვემო სართულის ბაქანზე წამით შედგა და შიშისაგან კინდამ დაიყვირა, ჩათეთილი ლოყები აეფაკლა, ხელები მოწყვეტით დაუშვა და კედელს მიეკრა. მის წინ ჭალარა მამაკაცი იდგა.

— საით, გოგი?

გოგიმ ხმა ვერ გაიღო და თვალეში შეაჩერდა.

— ხომ არაფერი მომხდარა? — დინჯად უთხრა ჭალარა მამაკაცმა.

გოგი ისევ დუმდა.

— წამოდი, საქმე მაქვს, — მშობლის სიტბოთი უთხრა მან. გოგიმ წინაღმდეგობა ვეღარ გაუწია, უნებლიეთ დაემორჩილა ამ ხმაში გამოხატულ იდუმალ სიტბოს. როცა ზემოთ ავიდნენ და ბიჭებს შეხედა, ტანში გააყრუოლა, მუხლები მოეკვეთა. ახლა იგრძნო, რომ არ უნდა წამოჰყოლოდა, ბიჭები ყველაფერს იტყოდნენ. ჭალარა მამაკაცი ბიჭებს მიესალმა, მერე მიუახლოვდა მაღალ სუსტ ბიჭს და გოგისაკენ ნახევრად შებრუნებულმა უთხრა:

— გოგი კარგი ბიჭი ჩანს, მოწაფედ აიყვანე. — თვალი ეჭვით მოჭუტა, — სირცხვილს არ გვაჭმევს, კარგი კალატოზი დადგება. აბა შენ იცი.

გოგიმ კრინტი ვერ დაძრა. ჭალარა მამაკაცი სხვებს მიუბრუნდა, რაღაც უთხრა მათ და ფიცარნაგს დაჰყვა.

— ვინ არის იგი? — ცოტა არ იყოს, ხმამაღლა იკითხა გოგიმ.

— ყოფილი მუშაა, ახლა ჩვენი ტრესტის პარტიუროს მდივანია.

— ჰო... — აღმოხდა გოგის და დაძაბული სხეული მოეშვა, იგრძნო, რომ ჰაერი არ ყოფნიდა, ფეხქვეშ იატაკი შეერყა.

— გოგი, მოდი აქ, — დაუძახა მაღალმა სუსტმა ბიჭმა.

გოგი ნელი ნაბიჯით გაემართა მისკენ. დილის ნისლი მთებს გადაეყარა და ამოწითლებული ცისკიდური ელავდა. შენობების მიღმა მთვლემარე ზღვაზე ოქროსფერი სხივები ლიცლიცებდნენ. ამწე რახარახით მისრიალებდა. ქვემოდან ისმოდა ერთმანეთში არეული მშენებლების ხმა, ვიღაც რკინას ადუღაბებდა, ვიღაც მღეროდა, ვიღაც იძახდა. გოგი იდგა მაღალი სუსტი ბიჭის გვერდით და ელოდა რას მეტყვისო.

ჯამალ ჯაყელი

გ ე მ ი „ რ ო ს ი ა “

ზღვისპირა ქუჩა!
ეშვება ტრაპი...
და დგას ქათქათა გემი „როსია“.
ზეციდან მოჰქუხს ფირუზის შხაპი
და ოქროსფერი მზე — ტაროსია.

და ჟღერენ ხმები ზღვისა და მიწის
და ცისარტყელა გამა-ზოლია.
მზის დაფიონი ჩახჩახებს, იწვის
და ალისფერად ღებავს თოლიას.

ჩაევილი ქუჩას და გაეშლი ხელებს,
ვწვდები იალბუჯს და ამაყ ანძას.
მზე ზღვაზე იმკის აქოჩრილ ველებს,
ტალღებზე ანთებს ოქროსფერ ხანძარს.

შემდეგ ძნასავით აკონავს სხივებს,
ჩაეშვება და ბრიზებს მობერავს,
ცა გადმოთესავს ვარსკვლავთა მძივებს
ზღვისა და მიწის შესამკობელად.

ჩაევილი ქუჩას.
ისე ახლოა
ახლა ეს გემი, მიწა და ზეცა...
„როსია“ თითქოს ჩემი სახლია,

მისდევ ტრაპსა და სიმაღლეს ვკეცავ
და ერთგან ვხედავ მთებს გოლიათებს
და მეორეგან—რუსეთის ველებს.
და როს ცისკარი ამოინათებს,
მიწაზე ფერებს რომ აამღერებს,
ჩავეჭიდები გემბანის კიჩოს
და შემართების საოცარ გზნებით
მოვწყდები ადგილს და ჰერი, ბიჭო! —
მივექანები ცისფერი გზებით.

გზას გაუმარჯოს თბილსა და ცისფერს . . .

ბევრი რამ მრჩება გემბანის გაღმა,
ბევრს ვაგვიანებ, ბევრიც ადრეა.
ბევრჯერ შხუილით მომეჭრა ტალღა,
სამუშზე მკერდი შემიჯანდრია.
გამოუწეწავს, როგორც ფაფარი,
თმები ჭაღარა, იქნებ სვიანი,
მომისმენია, როგორც ზღაპარი,
სევდა კრწანისის და ბასიანის.
მაგრამ ყოველი არის წარსული
და მისი მოსჩანს მხოლოდ საპირე.
ორღანის ქედი გადაპარსული
მიმზერს და სალამს არც კი ვაპირებ.
რა ვუყოთ მერე, თუ ვაგვიანებ
ანდა ადრეა, ბევრიც, ეგება.
გზებს შემოდგომა ანაგვიანებს,
ხმელი ფოთლები ფეხქვეშ მეგება.
მამასადამე, ვარ მოგზაური,
ფერთა სულეზად იქცნენ იანი —
და ყოველ კუთხით მხვდება ზღვაური
ანდა მუსონი,
ანდა ფიონი.
ბევრსაც ველევი, ბევრიც მეღევა
და ანძასავით გრიგალი მარხევს.
ყოველდღე მიწა ახლად მეძლევა,

ყოველდღე ზეცას თვალებით ვამხელ.
 და მე ვტრიალებ ახლა მორევად,
 სიკვდილის შემდეგ მიწამ იცოდეს —
 ახლა ძნელია ჩემზე მორევა,
 რაკი შენ ხელი გამომიწოდე.
 და მე მოვდივარ
 და ისე მკაცრად,
 რომ ვერაფერი შემატრიალებს.
 შენ მე მიწამე ნერვულ კაცად.
 მე შენ გიწამე მემატრიანედ!
 ბევრი რამ მრჩება ნაპირის გაღმა,
 ბევრიც დაკარგვით გარიყულია.
 შემომელეწა მრავალი ტალღა
 მაშინ, როდესაც მრავალს სწყურია.
 იყო გვალვა და მაინც არ დავშრი,
 როგორაც შენი სული არ დაშრა.
 მე ბავშვობაში ვიყუი ბავშვი
 და დიდობაშიც დაფრჩევი ბავშვად;
 და ამ ბავშვური სულით და გულით
 მოვარღვევ სივრცეს ღრუბლის ქულიანს.
 გპოულობ, მაინც ხარ დაკარგული,
 მპოულობ, მაინც დაკარგული ვარ.
 მაგრამ მე ისევ გიპოვი ისე
 და არ იქნება ვიცი გვიანი...
 გზას გაუმარჯოს თბილსა და ცისფერს,
 რომელზეც გხვდება ადამიანი!.



ჩვენს პათილავსა


ზღვანო, მიყვარხარ

ზღვანო, მიყვარხარ ზღვა გულით,
ზღვანო, მიყვარხარ სხვა გულით,
შენი საამო ზღვაურით
და უნაპირო ნაპირით,
ეს სიყვარული დავმალო,
შემდეგ შეგხედო რა პირით.
ვეცადე, ბევრჯერ ვეცადე
მეც მევლო ზღვაში მხარულით,
გცოდნია ზღვა დარდიცა და
გცოდნია ზღვა სიხარულიც.
განებიერებულს შენს მკერდზე
შიშველ ბეჭებზე მზე მწვავდა,
გულში ჩაკრული მყოლოდი
მეწადა, გულით მეწადა,
მაგრამ მიხმობდა თავისკენ
ჩემი ზეცა და... მიწა და...
ერთი პატარა ასული
ისიც თავისკენ მიწვევდა.
ქარში, დარში თუ ავდარში
მისი თვალების მზე მწვავდა,
თურმე იმასაც ვეწადე,
თურმე გულსაც ის ეწადა.
მან შემაყვარა ძალუმად
ჩემი ლამაზი მიწა და,
მისი თვალების სითბოთი
ზამთრის ყინვისგან მიცავდა,

აღბათ, ძალიან ვუყვარდი
მიცადა, ბევრი მიცადა..
და იმ პატარას ამქვეყნად
მართლაც ზღვა გული ჰქონია,
რომ თითისტოლა ასულმა
გაჯობა ამ დიდ გოლიათს.

* * *

სამყარო ხომ ვრცელია იმოდენად
ჩვენი სურვილები ათასჯერ ვრცელია,
ძნელია ცხოვრება მარტო იმედებით,
უიმედობა კი ათასჯერ ძნელია.
სულის სიმარტოვე გუნებას გვიძძიმებს,
სიმხნევეს ვიკრებთ და მეგობრებს ვუხმობთ,
ხომ ასე ძნელია სხეულის სიცივე,
სულის სიცივე კი გვაშინებს უფრო.
გრძელია მანძილი დღემდე დაძლეული.
მაგრამ დასაძლევი ათასჯერ გრძელია,
ხომ ასე ძნელია შიმშილი სხეულის,
სულის შიმშილი კი ათასჯერ ძნელია.
ლამაზი სახეები წამით აგვანთებენ,
ლამაზი სული კი ცეცხლს გვიჩენს უქრობს,
სულის სიმახინჯეს ვუძღვნით ანათემას,
ხოლო სხეულისას ავიტანთ უფრო.
სამყარო ხომ ვრცელია იმოდენად,
ჩვენი სურვილები ათასჯერ ვრცელია,
ძნელია ცხოვრება მარტო იმედებით,
უიმედობა კი ათასჯერ ძნელია.





გიორგი კეჭალაძე

ოცდაათი წლის შემდეგ

გოგიმ ჯიბეში პაპიროსი მოძებნა, მერე ფანჯარასთან მივიდა და მოუკიდა.

ავადმყოფი უძრავად იწვა და ჰერს მიშტერებოდა.

— უცნაური ბუნება აქვს ადამიანს, — თქვა მან, — შემოდი თუ არა, მაშინვე გავიფიქრე, აბა გაბედულად თუ მოვა-მეთქი საწოლთან...

— ჰო, — გაიცინა გოგიმ, — არც ისე ადვილია ტიფიანის საწოლთან გაბედულად მისვლა.

ერთხანს ორივენი დუმდნენ. გოგი კვლავ ფანჯარასთან იდგა და პაპიროსს ეწეოდა.

— ლაღო გახსოვს? ხელაძე ლაღო, ჩემთან რომ მუშაობდა საგარეუბნო კოლმეურნეობაში. მას ერთხელ ყბაყურა ჰქონდა. მითხრეს, გადამდებიაო. მე მაინც თამამად მივედი მასთან და საკოცნელადაც კი წავიწიე. მან მაშინვე მომარიდა სახე, მაგრამ უნდა გენახა, რა უსაზღვრო სიხარულმა გაუელვა თვალებში. ასე, ალბათ, ვერაფერი გაახარებდა მას იმ წუთს.

— დიმიტრი მგელაძემ თქვა, ლაღო ჩვენთან „წერა-კითხვაში“ ინსტრუქტორად გადმოვიყვანოთო.

— ალბათ, ჩემს ადგილზე, არა? უფროს ინსტრუქტორად.

— რატომ? მაგ ადგილზე შენ თვითონ იმუშავებ.

მიშა დუმდა.

— წუწუნი არავის უხდება, — თქვა გოგიმ, — მით უმეტეს შენ... მალე მორჩები და კვლავ ჩვენთან იმუშავებ. მორჩა და გათავდა.

მიშას არც ახლა უთქვამს რამე. იგი კვლავ ჰერს შეჰყურებდა უძრავ თვალებით.

— რაზე ფიქრობ? — ჰკითხა გოგიმ.

— ვცდილობ წარმოვიდგინო ის დრო, ოცდაათი წლის შემდეგ რომ დადგება. ავად გახდომის შემდეგ სულ ამაზე ვფიქრობ. უცნაურია, არა?

— არც ისე, — თქვა გოგომ, — შენ გიყვარს ასე შორეულ მანძილზე ოცნება, — დაუმატა მან ღიმილით, — ოცდაათი წლის შემდეგ მე ორმოცდაცამეტი წლის ვიქნები, შენ ორმოცდაათისა. უმჯობესი არაა, რომ ოცდაოთხის ვიყო, შენ კი ოცის?

— მე მაინც ოცის ვიქნები, — თქვა მიშამ, — მე სულ ოცი წლის ვიქნები.

გოგი დუმდა.

— ოცდაათი წლის შემდეგ ცოტა ვინმეს თუ ემახსოვრება ბათუმის საგარეუბნო კოლმეურნეობა „ახალი წამოწყება“. აქ მაშინ მრავალსართულიანი სახლები იქნება წამოჭიმული, იქნება ფართო, ლამაზი ქუჩა. ვიღას გაახსენდება მაშინ ჩვენი „წერა-კითხვის“ საზოგადოება. ვინღა იქნება აჭარაში წერა-კითხვის უცოდინარი... მაშინ სადღა ნახავ აჭარაში ჩადრიან ქალს...

— უფრო მეტიც, — თქვა გოგომ, — აჭარა, გურია, სამეგრელო, აფხაზეთი დაფარული იქნება ჩაის პლანტაციებით, მანდარინის, ლიმონის და ფორთოხლის ბაღებით.

— მამაჩემი უკვე მოხუცი იქნება, — განაგრძობდა მიშა, — დედაჩემიც... ისინი მარტონი იქნებიან. ვინ იცის, როგორ გაუძნელდებათ ამხელა მანძილის მარტო გავლა. დიდი ღროა ოცდაათი წელი.

— შენ თურმე ისევ წუწუნებ, — შეაწყვეტინა გოგომ, — მე კი მეგონა ოცნებობდი.

— გოგი, ნუ მიჯავრდება, თუ ძმა ხარ. წინათგრძნობა მაქვს ასეთი, საშინელი წინათგრძნობა, რომ ამ ტიტს ვერ გადავიტან. მენანება, ვერ წარმოიდგენ, როგორ მენანება. ჯერ რა მიცხოვრია ამქვეყანაზე... ჯერ რა გავაკეთე. რა სახსენებელია ის, რომ ერთ წელს კოლმეურნეობაში ვმუშაობდი, ერთ წელსაც ჩვენს „სოცკულტურაში“. სულ ეს არის ჩემი ბიოგრაფია.

გოგომ ნამწვი გადააგდო. მერე ახალი პაპიროსი ამოიღო და მოუკიდა. საწოლისაკენ მოიხედა. დაინახა, რომ მიშას თავი მოსკენ მიებრუნებინა და მწარედ იღიმებოდა.

— კოლმეურნეობაში შენ ბევრი გცემს პატივს, — თქვა გოგომ, — განსაკუთრებით ახალგაზრდები, შენ ხომ მათი ბორის ძნელად ხარ. არც ჩვენთან ყოფილხარ გულსელდაკრეფილი. შენი თაოსნობით არ ჩამოყალიბდა წერა-კითხვის უცოდინართა საზოგადოების 37 უჯრედი?...

მიშამ მწარედ გაიცინა.

— დიდებული ბიოგრაფი ხარ, ჩემო გოგი, რა მშვენივრად ჩამოთვალე ჩემი ღვაწლი... მე ჯერ არაფერი გამიკეთებია, არაფერი! გესმის თუ არა, არაფერი არ გამიკეთებია. მე ახლა ვიწყებდი ცხოვრებას.

— შენ ახლა იწყებ ცხოვრებას და გააკეთებ ათასჯერ მეტს, მაგრამ შენს ასაკში ჩვენ არცერთს არ გაგვიკეთებია ამდენი რამ...

* * *

პატარა ოთახში ხუთი ისხდნენ. თხელი მაღალი ბიჭი, რომელიც ბუხართან იჯდა, სწრაფად არიგებდა ბანქოს.

— ბედი გწყალობს, ლადო, — თქვა ერთმა, რომელმაც ეს ხელიც წააგო, — ბანკი გაგიმდიდრდა.

— თუ გაგიგეს შენმა კომკავშირელებმა, რომ ჩვენთან კარტს თამაშობ, ბედის წყალობა მაშინ ნახე, — გაიცინა ვიღაცამ.

— ლადო რა კომკავშირელია... ასეთი კომკავშირელი ჩვენ ყველანი ვართ.

— თქვენი მდივანი, — თქვა ერთმა, რომელიც ფანჯარასთან ახლოს იჯდა, — მიშა კვაჭაძე, მგონი, აქეთ მოდის. თავს უშველე, ლადო.

ლადომ გულგრილად განაგრძო ბანქოს დარიგება.

— ოჰო, თურმე არც კი ეშინია, — თქვა ფანჯარასთან მჯდომმა.

— არ მეშინია, — თქვა ლადომ მშვიდად.

დერეფანში ფეხის ხმა გაისმა. მერე კარი გაიღო და ოთახში მიშა შემოვიდა.

ლადოს არც აუხედავს.

— ოცდაერთია? — იკითხა ახალმოსულმა.

— ოცდაერთია, — მიუგო ვიღაცამ.

მიშა ახლოს მივიდა და ლადოს გვერდით ჩამოჯდა ბუხრის კიდეზე.

— მეც მომეცი კარტი.

ლადომ ჩამოარიგა ბანქო. მეხუთე მიშას მიაწოდა, მეექვსე თვითონ დაიდო წინ.

ყველა აგებდა. სწრაფად იზრდებოდა მოთამაშეებს შორის თავშეყრილი ფულის გროვა.

მიშას რიგი იყო. მან ხმადაბლა თქვა:

— ბანკი მომეცი...

ლადო წამით შეეყოყმანდა. მერე ბანქო გაუწოდა.

— შენთვის, — თქვა მიშამ.

ლადომ ორი ბანქო ზედიზედ აიღო. მერე მესამეც და ბოლოს ოთხივე ძირს დაყარა.

— წავაგე, — თქვა მან და ფული მიშას მიუხვეტა.

— ოცში ვიყიდე, — უჩურჩულა მიშას, — ოცში...

— ვიცი, — ჩურჩულითვე მიუგო მიშამ და ადგა. მერე მოთამაშეები მოათვალიერა და ხმამაღლა განაგრძო:

— ამ თვის შემდეგ კლუბში პიესა უნდა დავდგათ. კარტის მოთხოვნა მაშეებზეა. კარგია, რომ შეგხვდით. თქვენზე უკეთეს შემსრულებლებს ვის ვნახავ. აქ 230 მანეთია. ამ ფულს სცენის მოწყობაში გამოვიყენებთ. თუ პიესის დადგმაში მონაწილეობა არ გინდათ, ფულს ახლავე დაგიბრუნებთ. მოთამაშეები გოცებით შეჰყურებდნენ მიშს.

დილაადრიან იგი უკვე ლადოს ბინაზე იყო.

— სად ვიშოვო ახლა პიესა, — თქვა მან მაშინვე, — ეს რა ხათაბა-ლაში ჩავივდე თავი.

— პიესა? — გაუკვირდა ლადოს.

— ჰო, პიესა... პიესა სასწრაფოდ უნდა ვიშოვო და ის ბიჭები ღრამ-წრეში უნდა მივიღოთ. ამის შემდეგ კი ხელიდან ვეღარ დამიძვრებიან. წუხელ მთელი ღამე ამაზე ვფიქრობდი. მეტი გზა არა გვაქვს, პიესა შენ უნდა დაწერო.

— რას ამბობ, მიშა! მე სად შემიძლია პიესის დაწერა?!

— შეგიძლია. ლექსებსა და პატარ-პატარა მოთხრობებს ხომ წერ? კომკავშირელები ყველანი დაგეხმარებით... თუ უარს იტყვი, გაგცემ, იმ ვაჟბატონებთან კარტს რომ თამაშობდი.

* * *

— გახსოვს, გოგი, პიესის ამბავი რომ მოგიყევი? საწყალ ლადოს ერთ კვირაში გამოვაცხოვინეთ პიესა... არც ისე ცუდი გამოვიდა. მთელი სოფელი სიცილით კვდებოდა, სცენაზე რომ დავდგით. ის ბიჭებიც შესანიშნავად თამაშობდნენ.

— ლადო ნიჭიერი ბიჭია, — თქვა გოგიმ, — შეიძლება მისგან მართლა გამოვიდეს მწერალი.

— ეჰ, ბევრია ნიჭიერი ხალხი აჭარაში... გახსოვს ის გოგონა? ლეილა ანთიძე. ჩადრიანი ჩუმად რომ დადიოდა ჩვენს უჯრედში წერა-კითხვის შესასწავლად. მერე გაუგეს და სცემეს კიდევ სახლში.

— როგორ არა, — თქვა გოგიმ ღიმილით, — ლეილა მერე სახლიდან გაიპარა... ახლა თბილისში სწავლობს. ლეილა განათლებული ქალი იქნება.

— ნეტავი ცოლი მაინც შემერთო, — ნაღვლიანი ღიმილით თქვა მიშამ, — მამაჩემი მებრალება... შვილიშვილი ეყოლებოდა და ისე აღარ დაიტანჯებოდა, ალბათ...

— ისევ დაიწყე წუწუნი, — შეაწყვეტინა გოგიმ, — მამაშენი კიდევ მოესწრება შვილიშვილებს.

— ვეღარ... ვეღარ მოესწრება.

* * *

გოგის აქამდე წამითაც არ უფიქრია იმაზე, რომ არსებობდა სიკვდილი, დაუნდობელი და მკაცრი, ცივი და დაუნდობელი სიკვდილი. მას ვერც



კი წარმოედგინა, რომ შეიძლება მიშას ვერ გადაეტანა ეს ავადმყოფობა. ვერ წარმოედგინა, რომ იქნებოდა ჩვეულებრივი დღე, ღამე, იქნებოდა სიცოცხლე, იქნებოდნენ მიშას ამხანაგები და მეგობრები: გოგი გეგეშიძე, ლადო ხელაძე, იქნებოდა ლურჯი ზღვა და ბათუმი. შეუღრეკელი გოგონა ლეილა ანთიძე, რომელიც ახლა სწავლობდა წერა-კითხვას, ახალი ცხოვრების ანბანს, გაბედულად მიიწევდა სინათლისაკენ, ებრძოდა წარსულის სიბნელესა და უმეცრებას, როგორც მთელი აჭარა, როგორც მთელი ჩვენი ხალხი... მას ვერ წარმოედგინა, რომ იქნებოდა ყოველივე ეს და არ იქნებოდა მიშა. მას არც უფიქრია ამაზე...

და ახლა ამ საშინელმა წინათგრძობამ, მიშას რომ დაუფლებოდა, შეაძრწუნა იგი.

გოგი შეშფოთდა, აწრიალდა. მთელ სხეულზე, თითქოს უთვალავმა ჰიანჭველებმა დაკბინესო, განუწყვეტელი ჩხვლეტა იგრძნო. შეშინებულმა მიიხედ-მოიხედა, თითქოს მშველელს უნდა მოუხმოსო. დიახ, მშველელს ეძებდა ახლა გოგი, ეძებდა ადამიანს, რომელიც განკურნავდა მიშას ამ საშინელი წინათგრძობისაგან, დაიხსნიდა სიკვდილის კლანჭებისაგან, მოაცილებდა ამ დაწყევლილ ტიფს.

— ცუდად ხომ არა ხარ? — ჰკითხა მიშამ, — ფერი დაკარგული გაქვს...

— არაფერია, არაფერი, — თქვა გოგიმ და ოთახში სიარული დაიწყო, — არაფერია...

— მიხვალ დღეს თბილისში? — კვლავ ჰკითხა მიშამ.

— მივდივარ. საღამოს მატარებელზე. სამი-ოთხი დღის შემდეგ დავბრუნდები და ფეხზე უნდა დამხვდე, იცოდე, ფეხზე.

გოგის მოეჩვენა, რომ ყალბი ხმით ლაპარაკობდა. იგი დარწმუნებული იყო, რომ მიშა მიუხვდა, რამ შეაშფოთა წელან. ოთახში უხერხული სიჩუმე ჩამოვარდა.

— ამას წინათ, — თქვა მიშამ, — სოფელში მივემგზავრებოდი. სადგურზე ჩვენს ქალიშვილებს შევხვდი — თეოს, ლიანასა და რუსიკოს. თამროს დღეობაში მიდიოდნენ თურმე. შემომიჩნდნენ, თუ არ წამოხვალ, სამუდამოდ დაგემდურებიო. წასვლა მაინც არ შემეძლო. იქვე პატარა აჭარელი ბიჭი იღვა და იებს ყიდდა. მე მივედი მასთან და ორი თაიგული გამოვართვი. იები გოგონებს ჩავაბარე, ეს ერთი თაიგული თამროს მიუტანეთ, მეორე კი თქვენ გაიყავით-მეთქი. მაშინვე შემირიგდნენ და ერთი ღერი ია უკანვე დამიბრუნეს და უბის წიგნაკში ჩავიდე. ის წიგნაკი ახლა ბუხრის თაროზე დევს ჩემს სახლში...

გოგი აღარ დადიოდა ოთახში. იგი საწოლთან იდგა და თვლებში შეჰყურებდა მიშას.

ავადმყოფს გაეღიმა.

— შენ გიკვირს, ალბათ, რატომ მიყვება ამ უმნიშვნელო ამბავსო
ძალიან უმნიშვნელო ამბავია, მაგრამ ვერ წარმოიდგენ, როგორ მენატრება
ახლა ის ია, იის ერთადერთი ღერი, ჩემს სახლში რომ დევს ბუხრის თარო-
ზე, ვერ წარმოიდგენ...

* * *

გოგი ოთხი დღის შემდეგ დაბრუნდა. შინ არც შეუვლია, ქუჩაში
იების თაიგული იყიდა, ჯიბეში ჩაიღო და პირდაპირ მიშას სანახავად გაე-
შურა. კარებზე დააკაკუნა და, როცა გაუღეს, ძლივს შეიტანა ფეხები
ოთახში. თაიგული ბუხრის თაროზე შემოღო. მიშას არ დაუნახავს იები.
არც სხვა ვინმეს დაუნახავს ისინი. თვითონ გოგიც ძალიან ცოტა რამეს
ხედავდა და ამჩნევდა მაშინ. იგი ხედავდა მხოლოდ ავადმყოფის საოცრად
შეცვლილ სახესა და მის მშობლებს იაგორსა და პუბის, ფერდაკარგულნი
და შეშფოთებულნი უმწეოდ რომ დაბორილობდნენ ოთახში. მეტს ვერა-
ფერს ხედავდა. არც დამახსოვრებია რამე ამის გარდა.

* * *

მე მაგიდასთან ვიჯექი და აუჩქარებლად ვფურცლავდი გაცრეცილ
ქაღალდებს, წიგნებსა და რვეულებს. მოხუცი კაცი ჩემს გვერდით იჯდა,
ქალი კი ფეხზე იდგა და ცრემლიანი თვალებით ზევიდან დაჰყურებდა ამ
ფურცლებს.


უცებ მაგიდაზე რომელიღაც ბალახის გამხმარი ღერი დავარდა. ის
იყო, ბალახი უნდა ამეღო და საფერფლეში ჩამეგდო, რომ ქალმა დამასწ-
რო, ფრთხილად აიღო და თქვა:

— ეს ია ოცდათორმეტი წლისაა...

— ჰო, — დაუდასტურა კაცმა და მე შემომხედა, — ოცდათორ-
მეტი წლისაა.

— მიშას კი ორმოცდათორმეტი წელი უსრულდება, — თქვა ქალმა,
— ორმოცდათორმეტი...

წამით გაოცებით შევავლე თვალი მოხუც ცოლ-ქმარს. უცებ ვერც
კი მივხვდი, რომ ეს მიშას შეუხსრულდა ორმოცდათორმეტი წელი, მიშა
კვაჭაძეს, რომელიც გარდაიცვალა ოცდათორმეტი წლის წინათ, ოცი წლის
ასაკში.



ზურაბ შოკრიძე

ბავშვი დაბიდა

მარმარილოში
დატორტმანდა როგორც ჰაერი
მიქელ-ანჯელო, ვერონეზი და რაფაელი.
მინდვრის მუსიკით...
და ბოჰემის მთვრალი ფოთლები,
ფარშავანგების ჭვანგებს მოჰყვა გული ბოდლერის.
და მარტის ტოტებს...
როს რძისფერი ზვირთით ვმოსავდი,
ტყეების თავზე წრიალებდა სული მოცარტის.
ორღანობეზე ნაღვერდლოვან თოვლის მთოველი,
მთაწმინდის მთვარეს დაეძებდა თვით ბეთჰოვენი.
როს მწარე მწუხრი ბობოქრობდა ქარის კალთებით,
მზისკენ გარბოდნენ ვან დეიკის მწვანე ლანდები.
და მადონების სიზმრის მსგავსი ფრთების ტლაშუნით,
შემოაშენეს იბერიას სული ბავშვური.
მერე „მერანის“ თვალთა სევდამ ზეცა დაბინდა
და გაჩნდა ბავშვი, ნაღვლიანი, შორი დაბიდან.
მოვარდა ბავშვი!.. ნაწვიმარი კვირტის თვალებით
მოჰყვა მინდვრები... ყვავილები... ლურჯი ჭალები.
და დემონების მაღალ მუზებს, მკლავდაკვალთულმა,
ასწავლა სუნთქვა და ცახცახი მხოლოდ ქართულად.
და ზვიად ფუნჯებს...
კვარტლიანი ქონის ხარებამ
მისცა ქართული სისხლისა და მზის მცხუნვარება.
ქრისტეს წუხილით...

და მგზნოვარე თვალთა გიშერიც
 ცვრიან ბალახზე დადიოდა სულ ფეხშიშველი.
 კლდეებზე ჰვრებდა
 დაბმულ რაინდს, ტინის ტანიანს,
 მერე ტყეები მოსძახოდა — „ამირანია!“
 გრგვინავდა ურო...
 მქუხარება არა პირველი,
 პალოზე ისევ ნებივრობდა ლურჯი ფრინველი.
 ჯაჭვის ყდრიალი ჰგავდა ხანძარს ელვის ტანიანს,
 ტყეები ისევ გუგუნებდა — „ამირანია!“
 ლოცვით დაღალულ
 და დაქანცულ ქალთა სურნელი,
 სევდა, ვით სევდა და ტკივილი განუკურნელი.
 ნამქერს მიჰქონდა...
 ცას მიჰქონდა ტოტი ვერხვისა,
 ბედი, რომელიც მას ჰქონდა და სხვას არ ეღირსა.

* * *

ასე დამთავრდა ეს სინორჩე...
 ასე დავსრულდით...
 სხვა ტყეებს, გორებს გადუფრინეს თეთრმა ქორებმა.
 არ შეიძლება დავიწყება წრფელი წარსულის,
 არ შეიძლება განმეორებაც.
 დარჩნენ სიზმრები და მთხოველი დარჩნენ თვალები,
 შორი მინდვრები... ყვავილები... ნისლის ნამქრობა,
 არ შეიძლება დაბრუნება იმ მხურვალების,
 არ შეიძლება თურმე ჩაქრობაც.
 ფხიზელ გონებას შეეჩვია სულის თამაში,
 მზეს შემოდგომის მოაქვს ნაზი წვა და დაზრობა,
 არ შეიძლება დაბრუნება იმ სილამაზის,
 არ შეიძლება ულამაზობაც.
 მთვარის რონინი... მდუმარება... სევდა ფარული,
 კიდევ ფოთლებში თავანკარა ნამი წკარუნობს,
 არ შეიძლება დაბრუნება იმ სიყვარულის,
 არ შეიძლება უსიყვარულოდ!...
 ასე დამთავრდა ეს სინორჩე, ასე დავსრულდით,
 შემოინახა რაღაც ძვირი მწვანე კორდებმა...
 როგორ კარგია გახსენება წრფელი წარსულის
 და ისიც, რომ ის არ მეორდება.

დაანთეთ დროზე!..

აანთეთ დროზე!..

თორემ ასაკი მიაგავს ლტოლვილს.
როგორ ყვარდა ყვავილი თოვლზე
და ნაკვალევში დნებოდა თოვლი.
ბობოქარ ბურანს ვაზის თუ ნუშის,
თოვლის მსუბუქი სიზმრები ეყოთ,
ტყეებს ესმოდათ სიმღერა გუშინ,
ტყეებს მტირალი შემორჩათ ექო.
ფერფლად ქცეული ფანტელის სევდას
ნიბლიას თვალი ტიროდა რტოზე,
მთელი სიცოცხლე გეძებნათ ნეტა
და ვერ გებოვნათ ყვავილი თოვლზე.
სულს უხსოვარი დროიდან სდევდა
მთხოველი მზე და ფხიზელი „არა“,
სინაზის სევდა, სინორჩის სევდა,
მიუწვდომელი მარად და მარად.
დაიფშვნა სისხლში ზარების ზავით
მზე მღვრიე, ფიცხი, ჭარბი და ავი,
როგორ არ მსურდა და მაინც ჰგავდი
თოვლზე ამოსულ თვითნიერ ყვავილს.
ძველი და მძიმე შემოაქვს ფიქრი
ტყეების თავზე გაფრენილ ქორებს,
რომ მოგუნდავე ლანდების რიგი
ამოეფარა გაკვალულ გორებს.
კიდევ ამოვა ყვავილი თოვლზე,
კვალის გარეშე დადნება თოვლი,
ვინღე მოვა და სიხარულს მოგცემს
სხვეწზე მიჩვეულ ჩიტოვით მოვლილს.
დაანთეთ დროზე!

აანთეთ დროზე!

თორემ ასაკი მიაგავს ლტოლვილს.
როგორ ყვარდა ყვავილი თოვლზე
და ნაკვალევზე დნებოდა თოვლი.



ლეგენდა დედაზე

ახალგვინეური თქმულება

უხსოვარ დროს — ღრმა მოხუცებიც რომ არ მოსწრებიან, — როცა დიდი და მძლავრი მდინარე ფლავი ბებრებს ახალგაზრდობას უბრუნებდა, ახალ გვინეაზე ცხოვრობდა ერთი ქალიშვილი, სახელად დანდაი. იგი ულამაზესი და ყველაზე მხიარული იყო კუნძულის გოგონათა შორის. ყველას ნიბლავდა დანდაი, განსაკუთრებით მაშინ, როცა ტოლებთან ერთად ცეკვავდა ხმელი ბალახის ქვედატანიითა და შავ თმებში ჩაწნული დაქლაქა ყვავილებით. სიმღერისა და ტამტამის უღერის ტაქტზე წკარუნობდნენ ტახის ეშვის ლამაზი მძივები და ბრჭყვიალა რგოლები, ხელებსა და ფეხებზე რომ ეკეთა დანდაის.

ერთხელ, როცა დანდაი დაიღალა და ჩამოჯდა, მასთან მივიდა მოხუცი ბუინახი. დედაბერს ხალხი პატივისცემით და შიშით ეკიდებოდა. ამბობდნენ, მას ესმისო ფრინველთა და ნადირთა ენა, ესაუბრება ქარსა და წყალსო.

— შენ ახლა იცინი, დანდაი, — თქვა ბუინახმა. — რა თქმა უნდა, შენ ახალგაზრდა და ლამაზი ხარ. მაგრამ ყოველთვის ასე როდი იქნება. ერთ დროს მეც ვიყავი ლამაზი. წლები მაგ მუქ თმებზეც ჩამოთოვს, აღარ იკიფებს შენი შავი თვალები, სახეს კი ნაოჭები დაგიფარავს. რაღა გავაგრძელო, ისეთივე იქნები, როგორიც მე ვარ ახლა: ბებერი და უსახური.

დანდაიმ გადაიკისკისა:

— მერე რა, ჩვენი კეთილი მდინარე ფლავი ახალგაზრდობას დამიბრუნებს. შენც ხომ ისარგებლე მისი სიკეთით.

— ჰო, — ამოიოხრა დედაბერმა, — ჩემმა მეორე ახალგაზრდობამაც ჩაიარა, ხოლო ფლავი მხოლოდ ერთხელ გვიბრუნებს მას.

— დანდაი! უ-უ-უ! დანდაი! — ეს მაიკასი ეძახდა გოგონას, კუნძულის ყველაზე ლამაზი, ყველაზე გაბედული, მამაცი და შრომისმოყვარე ჭაბუკი.



ის იყო ცეცხლისა და ახალგაზრდობის დღესასწაული იზეიმეს, რომ დანდაი მაიკასიმ შეირთო. ახლა იგი აღარ ცეკვავდა ტოლებში, აღარ ეცალა გრუზა თმების ყვავილებით შესამკობადაც. ოჯახი ლერწმის ქონში ცხოვრობდა. ცოლ-ქმარი ერთად მუშაობდა მიწოდვად, ერთად ზრდიდნენ ბავშვებს.

დანდაი ექვსი შვილის დედა იყო. იყო... რადგან უფროსი ბერი-ბერის გადაყვა, მეორე შხამიანმა გველმა შეიწირა, მესამე — აზობოქრებულმა მდინარემ, მეოთხე ჯუნგლებში დაიბნა და დაიკარგა, მეხუთე კი ტყის ხანძრისას გაიგუდა. დარჩა დანდაის ერთადერთი — ყველაზე უმცროსი შვილი ლეიტუკი. დანდაის იგი გაგიჟებით უყვარდა და თან დაჰყავდა, უმღეროდა მშვენიერ სიმღერებს.

ერთხელ მაიკასი ჯუნგლებში პალმას ჭრიდა, წაქცეული ხე დაეცა და შინ აღარ დაბრუნებულა. მას შემდეგ დანდაი დილიდან საღამომდე მარტო მუშაობდა ყანაში. სწრაფად და შეუმჩნევლად შეეპარა დანდაის სიბერე. ეს მან პირველად მაშინ დაინახა, როცა გამჭვირვალე ჭის წყალში იხედებოდა, შავი თმები გაჭალარავებოდა, სახე კი დანაოჭებოდა. „მაღე წავალ კეთილ მდინარე ფლაისთან და ვთხოვ დამიბრუნოს ახალგაზრდობა, — გაიფიქრა დანდაიმ, — ვეტყვი რაოდენ ძნელია ჩემი ცხოვრება, ვეტყვი, მინდა ჩემმა შვილმა მნახოს ისეთი, როგორიც წინათ ვიყავი. იგი ხომ უფრო შეიყვარებს ახალგაზრდა და ლამაზ დედას.“

ლეიტუკი ექვსი წლის რომ გახდა, დანდაი სამოგზაუროდ მოემზადა, გახსნა ქოქოსის კაკლის გამხმარი ნაჭუჭი, რომელშიც ეწყო მისი ახალგაზრდობის სამკაულები: ტახის ეშვის მძივი და დიდი ბრჭყვიალა ბეჭდები. დანდაიმ გადაწყვიტა თან წაეღო ისინი.

— მიდიხარ, დედა? — გაკვირვებით ჰკითხა ბიჭმა, — მე არ წამიყვან?
— არა, ამჯერად ვერა, შვილო, — იღუმალად ჩაუჩურჩულა დანდაიმ,
— დამელოდე და დავბრუნდები.

ლეიტუკმა თავი დაუქნია.

— პალმის ქვეშ დაგელოდები, დედა!

ძნელი იყო გზა მდინარემდე, რომელიც შორს, კუნძულის სიღრმეში მიედინებოდა. დანდაიმ უდაბნო გადაჭრა. დაღლილ ფეხებს ბასრი ეკლები უკაწრავდა. მერე გადაიშალა ბნელი ჯუნგლები, რომლის გაუვალ ბარდებში ნადირთა ბილიკები მიიკლაკნებოდა. მხოლოდ მეორე დილას შორეულ ცივ ნისლში ალაპლაპდა უზარმაზარი მდინარე. დანდაი ნაპირთან გაჩერდა. იგი ძლივს სუნთქავდა.

— ო, წმიდაო მდინარე ფლაი, — წაიჩურჩულა მან, — მე მოვედი შენთან და ისმინე ჩემი ვედრება!

დანდაიმ გაიძრო ხმელი ბალახის ქვედატანი, ნაპირზე დადო ქოქოსის კაკლის ნაჭუჭი და შავი ნაზი ხელები მდინარისაკენ გაიშვირა. განთიადის პირველმა სხივმა გაუბრწყინა გამხდარი სხეული, ქარმა აუწე-

წა ჭალარა თმები. დანდაიმ წამოიწყო სიმღერა, რომელსაც დიდი ხნის წინათ მღეროდა.



და ექოს შორს მიჰქონდა ამ სიმღერის ხმა.

— ო, კეთილო მდინარე ფლაი, — ჩურჩულებდა იგი და ნელა ეშვებოდა მომწვანო წყალში, — შეხედე ჩემს ტანჯვას, შეხედე, როგორ ვიღვრები ცრემლად, შეხედე ჩემს ჭალარა თმებს. შეხედე, შეხედე და მაჩუქე ახალგაზრდობა, მდინარე, წმიდაო და ძლიერო!

მდინარე ფლაი უცებ გაძუქდა, ახმაურდა, მალა აზიდა მწვანე ტალღები და შთანთქა დანდაი. მალე ტალღები უკუიქცა და ნაპირზე გამოვიდა ახალგაზრდა მზეთუნახავი, ბადალი რომ არ ჰყავდა მთელ კუნძულზე. იგი შეჩერდა, შეხედა თავის გამოსახულებას წყალში და სიხარულით დაიყვირა:

— მადლობა შენ, ფლაი! მადლობა თქვენც, მწვანე ტალღებო! — დანდაიმ შორს გატყორცნა ჯოხი, რომლითაც შორი გზა გამოიარა მდინარემდე, და ქურციკივით მკვირცხლად გაიქცა მშობლიური სოფლისაკენ. ეკლიანი კატუსები გზას უთმობდნენ მას, ხმელი ბალახი ფეხქვეშ ეფინებოდა. ლეიტუკი ქოხის გვერდით, ზღურბლთან, პალმის ჩრდილში თამაშობდა.

— შვილო ჩემო, შვილო ჩემო!

ბავშვი შესახვედრად გაექანა.

— დედა! დედა!

მაგრამ მყისვე შეჩერდა იმედგაცრუებული და ნაწყენი:

— მე დედაჩემი მეგონე.

დანდაი დაიხარა შვილისაკენ.

— ეს ხომ მე ვარ, შვილო! შენ დედა ვერ იცანი.

ლეიტუკი მწარედ ატირდა.

— წადი, გამეცალე, მე არ გიცნობ შენ! არავინ იყო დედაჩემზე ლამაზი ამქვეყნად. მას ჰქონდა თეთრი თმები და წვრილი ნაოჭები სახეზე.

— დაწყნარდი, შვილო, და დამიჯერე: მე ვარ შენი დედა! კეთილმა მდინარემ ფლაიმ დამიბრუნა ახალგაზრდობა. შემხედე, განა არ გიხარია, რომ ახალგაზრდა და ლამაზი დედა გყავს?

ახალგაზრდა დანდაის დაბრუნების ამბავმა მთელი სოფელი მოირბინა. ისევ ისე, როგორც დიდი ხნის წინათ, სიმღერისა და ტამტამის ხმაზე დანდაი ცეკვავდა გოგონებთან ერთად. ლეიტუკი იქვე იჯდა, მაგრამ სულ ზურგს აქცევდა დედას და ტიროდა. დანდაის გული ნაღველით აევსო. მას ხომ მხოლოდ ლეიტუკისათვის, მხოლოდ მისთვის უნდოდა ყოფილიყო ახალგაზრდა და ლამაზი.

და დანდაი ისევ წავიდა მდინარე ფლაისთან, ისევ მთელი დღე და
ღამე იარა რუხ უდაბნოსა და ბნელ ჯუნგლებში. ისევ მივიდა ნაპირზე, ვა-
იხადა ხმელი ბალახის ქვედატანი და ჩაეშვა ცივ მომწვანო წყალში.
როცა წყალმა მხრები დაუფარა, დანდაიმ თქვა:

— მე, შავი დანდაი, გმადლობ, დიდო მდინარევ, ფასდაუდებელი
ახალგაზრდობის დაბრუნებისათვის! მაგრამ უკანვე გიბრუნებ მას,
ბრძენო ფლაი. შვილის სიყვარული სილამაზესა და ახალგაზრდობაზე
ძვირფასია. ო, მდინარევ, მაპატიე, მაგრამ მომეცი ისევ ჩემი სიბერე!

გამუქდა ბრძენი მდინარე ფლაი, ახმაურდა და მისმა ტალღებმა ისევ
შთანთქეს დანდაი. როცა ტალღები უკუიქცა, მდორე მდინარის შუაგუ-
ლში იდგა მოხუცი ჭალარა ქალი, ყელზე მიძვითა და ხელზე ელვარე
ბეჭდებით.

— მადლობა შენ, მდინარევ! წაიღე ესეც ჩემს სილამაზესთან და
ახალგაზრდობასთან ერთად. — და დანდაიმ წყალში ჩაყარა მიძვიები და
ბეჭდები.

როცა დანდაი თავის ქონში დაბრუნდა, მის შესახვედრად მზიარული
ლეიტუკი გამოეჩანა.

— დედა, რახანია არ ჩანდი!

— შვილო, — ჩურჩულებდა დანდაი, — შვილო ჩემო!

მას შემდეგ მდინარე ფლაი არავის უბრუნებს ახალგაზრდობას.

თარგმანი მ. ჩავლიშვილისა.





სკრები ასანი

ძ რ ო ხ ა

დაჩაჩანაკდა, კბილები დასძვრა,
 რქებზე ატყვია წლები რგოლებად.
 მას მეხრე ბევრჯენ მოექცა მკაცრად
 და ემძიმება მოსაგონებლად.

ხმაურს ვერ იტანს, ისე მხდალია,
 თაგვის ფაჩუნსაც უფროხის ბებერი.
 თეთრფეხა ხბოზე ჯავრმა დალია,
 ის არის მისი სადარდებელი.


პირმშოს ალერსი აღარ აღირსეს,
 პირველ სიხარულს დაუხშეს კარი
 და ვერხვის ძირში მალალ მარგილზე
 აფრიალებდა ტყავს ნიავექარი.

შვილის ხვედრი ხომ მოელის მასაც,
 მალე მისწვდება უწყალო ხელი,
 გამოუნასკავს კისერზე ბაწარს,
 რომ მერე დანით გამოსჭრან ყელი.

მიწას ჩაასობს რქებს გამწარებით
 და ვიდრე თვალი დაიბინდება,
 დაესიზმრება თეთრი წარაფი
 და მწვანე მდელის აბიბინება.

თუმცა წყურვილი სხვას მოუკალი,
მაგრამ მე დამრჩა, მე დამრჩა ჯერაც
შუშისებური შენი თმის კვამლი,
შემოდგომური დაღლილი ცქერა.
ო, შემოდგომის დღეთა მოსწრებაჲ!
რა არის მასთან ყრმობა, ზაფხული.
ყავხარ პოეტის ახალ ოცნებას
ორგზის წარმტაცად წარმოსახული.
გული არასდროს ყალბი არა მაქვს,
ამპარტავნობას ამიტომ ვწყევლი
და შემძლია ვითხრა თამამად
ხულიგნობაზე ავიღე ხელი.
ლოთიფოთობას ხარკს აღარ ვუხედი,
აღარ ვიქნები აწ თავისნება.
გული დაითრო სხვაგვარი ლუდით
ძარღვებში სისხლის გასაფხიზებლად.
მეც ფანჯარაზე მომიკაკუნა
ტირიფის ტოტმა, ოქრო რომ მოსავეს,
თითქოს მამცნო, რომ ბედმა მარგუნა
შევხვდე სექტემბრის უბრალოდ მოსვლას.
ახლა ბევრ რამეს ანგარიშს ვუწევ,
აღარ ვარ კერპი და მემამბოხე.
სულ სხვანაირად ვუცქერი რუსეთს,
სასაფლაოებს და ნაცნობ ქოხებს.
თვალს ეფარება ფერთა ფერობა
და ყველგან ვხედავ ღვთიურ წყალობას,
და მჯერა, შენ ერთს — დას და მეგობარს
ძალგის პოეტის თანამგზავრობა.
მხოლოდ შენით და შენთვისღა შევძლებ,
რომ ერთგულების ვისწავლო ფასი.
შენთვის ვიმღერებ დაბინდულ გზებზე
და ხულიგნობის მიტოვებაზე.

თარგმნა ბიორბი სალუჰვაძემ.





იასონ ხარხვაძე

გმირთა სსრკნა უკვლავია

დიდ სამამულო ომში, როცა წყდებოდა ჩვენი სოციალისტური სამშობლოს ყოფნა-არყოფნის საკითხი, კომუნისტური პარტიის ცენტრალურმა კომიტეტმა და საბჭოთა მთავრობამ გადაწყვიტეს წითელი არმიის ეროვნული ნაწილების და შენაერთების შედგენა ყველა მოკავშირე რესპუბლიკაში.

1942 წელს საქართველოში შეიქმნა რამდენიმე დივიზია, რომლებსაც სხვადასხვა დროს მეთაურობდნენ გენერლები: ვ. ძაბახიძე, გ. ყუფარაძე, გ. ყურაშვილი, პ. ჩხობაძე, ი. სილაგაძე, მ. ხუბულური, ვ. ლისინოვი.

სამამულო ომის პერიოდში ქართულ დივიზიებს, სხვა მოძმე ერების შენაერთებთან ერთად, საბრძოლო ამოცანის სასახელოდ შესრულებისათვის არაერთხელ დაუმსახურებიათ უმაღლესი მთავარსარდლობის მადლობა.

დიდი სამამულო ომის პირველ ხანებში მოქმედ არმიაში მხოლოდ ერთი—224-ე ქართული მსროლელი დივიზია იყო. 1942 წელს ყირიმის ფრონტის სხვა ნაწილებთან ერთად მას მეტად მძიმე და სასტიკ ბირობებში მოუხდა ბრძოლა. მიუხედავად მტრის ჭარბი ძალებისა, სადესანტო ოპერაციების დროს დივიზიის შემორებმა არნახული სიმამაცე და სამშობლოსათვის თავდადება გამოიჩინეს. ბევრმა მათგანმა ყველაზე ძვირფასი—სიცოცხლე შესწირა ჩვენი ქვეყნის თავისუფლების დაცვას.

ქერჩი-ფეოდოსიის სადესანტო ოპერაცია იყო პირველი დიდი ოპერაცია, რომელიც 1942 წელს განახორციელა საბჭოთა არმიის ნაწილებმა.

1942 წლის 27 თებერვალს განთიადისას 17-კილომეტრიან ვიწრო ყელში, რომელიც მდებარეობს აზოვისა და შავი ზღვების

შუა გაიხსნა ყირიმის ფრონტის არტილერიის მძლავრი ცეცხლი. არტილერიას მხარს უჭერდა ავიაცია. 224-ე დივიზიის ნაწილებმა გაარღვიეს მტრის თავდაცვა, შეიჭრნენ გერმანელთა ზურგში და გააფთრებული ბრძოლებით აიღეს სოფლები ჯანტორა, პარპაჩი, ტულუმჩაი და სხვ. სოფელ ჯანტორის აღებისას დივიზიის მეზობლებმა აღმოაჩინეს გერმანელების მიერ ნაწამები და კოცონზე დამწვარი წითელარმიელის — ზუგდიდელ გრიგოლ სხულუხიას გვამი. როგორც ცნობილია, გ. სხულუხიას სიკვდილის შემდეგ სსრ კავშირის უმაღლესი საბჭოს პრეზიდიუმის ბრძანებულებით საბჭოთა კავშირის გმირის წოდება მიენიჭა.

პიტლერელთა წინააღმდეგ ბრძოლაში მამაცობისა და გმირობის უჭკნობი მაგალითი უჩვენეს 224-ე დივიზიის კომუნისტებმა. ბევრი მათგანი ბრძოლის ველზე გმირთა სიკვდილით დაეცა. მათ შორის იყვნენ 143-ე პოლკის გულადი და მამაცი კომისარი აკ. გიორგაძე, პოლკის მეთაური ა. ლევკოვიჩი, ათასეულის კომისრები და ასეულების პოლიტბელები: ბორის ნეფარიძე, დავით მგელაძე, ივანე კასრაძე, ალექსი რუხაძე, დავით ბრეგაძე და სხვ.

1942 წლის მაისში დივიზიის მეთაური პოლკოვნიკი ვ. ძაბახიძე მძიმედ დაიჭრა. ჭრილობების მოშუშების შემდეგ იგი კვლავ სამშობლოს დამცველთა რიგებში ჩადგა და მალე საქართველოში მყოფ 406-ე დივიზიის მეთაურად დანიშ-

ნეს. მაგრამ მას არ ასვენებდა ყირიმის ბრძოლის საშინელებანი და გული იქითკენ მიუწევდა.

1944 წლის იანვრის პირველ რიცხვებში 414-ე ანაპის სახელობის ქართული მსროლელი დივიზია ქერჩის ნახევარკუნძულზე გადაიყვანეს. დივიზიის ნაწილები მოგერიებით ბრძოლაში ჩაებნენ. მაშინ მას მეთაურობდა პოლკოვნიკი (ამჟამად თადარიგის გენერალ-მაიორი) გ. ყურაშვილი, რომელიც ავადმყოფობის გამო თბილისში გადაიყვანეს. 1944 წლის 4 თებერვალს დივიზიის მეთაურად დაინიშნა გენერალ-მაიორი ვ. ძაბახიძე. 414-ე ქართული დივიზიის შემადგენლობაში ჩაირიცხა 224-ე მსროლელი დივიზიის მეზობლებისა და მეთაურების ერთი ნაწილი. ახლა დივიზია უკვე სევასტოპოლთან მომწყვდეულ მტერს უტევდა. ქერჩის ნახევარკუნძულიც თავისუფალი იყო, ნახევარკუნძული, სადაც 1942 წლის თებერვალ-მაისში 224-ე დივიზიის სამკვდრო-სასიცოცხლო ბრძოლები გაიმართა.

414-ე ანაპის სახელობის წითელდროშოვანი დივიზია, რომელმაც მძიმე კლიმატურ პირობებში 1942 წლის აგვისტოდან დაწყებული უთანასწორო ბრძოლებით გაიარა მთელი ჩრდილოეთ კავკასია, კრასნოდარის მხარე, ტამანის ნახევარკუნძული, ქერჩის სრუტე, ყირიმის მიწა-წყალი და გმირ ქალაქ სევასტოპოლის განთავისუფლებით დაავირობინა თავისი სახელოვანი საბრძოლო გზა, არაერ-



თხელ იყო მოხსენიებული უმაღლესი მთავარსარდლის ბრძანებებში.

1943 წლის 9 ოქტომბრის ი. ბ. სტალინის ბრძანებაში ნათქვამი იყო, რომ გერმანელი დამპყრობლებისაგან ტამანის ნახევარკუნძულის განთავისუფლების საქმეში დიდი საბრძოლო დამსახურებისა და განსაკუთრებით ქალაქ ანაპის აღებისას ბრწყინვალე სამხედრო ოსტატობის გამოჩენისათვის 414-ე ქართულ მსროლელ დივიზიას მიენიჭა ანაპის სახელწოდება. ამავე დროს, 22 საათზე მოსკოვი მხურვალედ მიესალმა ტამანის ნახევარკუნძულის განმთავისუფლებლებს — 224 ქვემეხის ოცი საარტილერიო ზალპით. შემდგომში დივიზია დაჯილდოებულ იქნა წითელი დროშის ორდენით.

მთელ საბჭოთა ხალხთან ერთად ქართველი ხალხი ღრმა პატივისცემს ომში დაღუპულთ და ყველაფერს აკეთებს მათი ხსოვნის უკვდავსაყოფად.

სევასტოპოლში, საპუნ-გორაზე ქართველი მეომრების ძმათა სასაფლაოზე აღმართულია 12,5 მეტრი სიმაღლის ობელისკი. ობელისკის წინ დადგმულია ქართველი მეომრების ბრინჯაოს ქანდაკება, შესრულებული სკულპტორ ტიტე ზინხარულიძის მიერ. ძეგლის წინ ვარდ-ყვავილებით შემკობილი სა-

ფლავის ლოდები აწყვია რომელზეც ამოკვეთილია ქართველ ვაჟკაცთა გვარები.

1961 წლის 21 ივნისს ობელისკის საზეიმო გახსნას ათი ათასზე მეტი კაცი დაესწრო. საქართველოდან წარგზავნილ დელეგაციაში შედიოდნენ საქართველოს უმაღლესი საბჭოს თავმჯდომარე აკადემიკოსი ვ. კუპრაძე (დელეგაციის ხელმძღვანელი), 414-ე ანაპის სახელობის დივიზიის ყოფილი მეთაური გენერალ-მაიორი ვ. ძაბახიძე და სხვ.

ყოველწლიურად სევასტოპოლის განთავისუფლებისა და ფაშისტურ გერმანიაზე გამარჯვების დღეს — 9 მაისს სევასტოპოლის მოსახლეობა და შავი ზღვის ფლოტის მეზღვაურები და ოფიცრები ძმათა სასაფლაოზე აღმართულ ობელისკთან სახალხო მიტინგს მართავენ. მათ ტრადიციად გაიხადეს ამ დღეს პატივი სცენ მშობლიური ქალაქისათვის გამირულად დაღუპული მეგობრების ხსოვნას.

მადლიერი ქართველი ხალხი არასოდეს არ დაივიწყებს იმ ქართველი ვაჟკაცების შეუპოვარ მაცობას და თავდადებას, რომლებმაც საკუთარი სისხლით დაწერეს თავისი უკვდავების ისტორია და ხალხში უჭკნობი სახელი დაიმკვიდრეს.



შოთა ქაჩია

მხატვრული ლიტერატურა აჭარაში
დიდი ოქტომბრის 50 წლისთავზე

დიდი ოქტომბრის სოციალისტური რევოლუცია მოასწავებდა ძირეულ გარდატეხას ჩვენი ხალხის ცხოვრებაში. ექსპლოატაციისაგან გათავისუფლებულ მშრომლებს პირველად მიეცათ შესაძლებლობა სრულად გამოევიწყებინათ შემოქმედებითი უნარი და ენერჯია. ლიტერატურაში და ხელოვნებაში მოვიდნენ ახალი ადამიანები — ხალხის ღვიძლი შვილები და თან მოიტანეს ახალი იდეები, ახალი თემები, ახალი სიტყვა. მათ შექმნეს ძირითადი ბირთვი იმ მწერლობისა, რომელიც ისტორიაში შევიდა პროლეტარული ლიტერატურის სახელით და მიზნად ისახავდა ხალხის უანგარო სამსახურს, მისი ძირეული, სასიცოცხლო ინტერესების გამოხატვასა და დაცვას.

მართალია, პროლეტარულ მწერალთა ერთი ჯგუფი (ს. ეული, ნ. ზომლეთელი და სხვ.) ჯერ კიდევ რევოლუციამდე მოღვაწეობდა, მაგრამ ქართული პროლეტარული ლიტერატურის ნამდვილი აღორძინება დაიწყო მხოლოდ საბჭოთა ხელისუფლების გამარჯვების შემდეგ, როცა შეიქმნა პროლეტარულ მწერალთა ასოციაცია და დაარსდა ამ ასოციაციის ყოველთვიური სამხატვრო-სალიტერატურო ქუ-

რნალი „ქურა“. ეს ყურნალი მთელი ხმით აცხადებდა, რომ პროლეტარიატის დიქტატურის ხანაში ჭეშმარიტი პოეზია შეიძლება იყოს მხოლოდ პროლეტარული, კომუნისტური და ამ რევოლუციური კლასის დიქტატურის გატარების როლის შემსრულებელი.“ ამიტომ იგი თავის უმთავრეს ამოცანად თვლიდა ყოფილიყო „პროლეტარული ლიტერატურის, მხატვრული კრიტიკის და პოეზიის ქართული სამჭედლო“ (ყურნ. „ქურა“, № 1, 1922 წ.).

თავისი მაღალი იდეალების განხორციელებისათვის პროლეტარულ მწერლობას მოუხდა მძიმე ბრძოლები გადაეტანა ანტირევალისტურ-დეკადენტურ ლიტერატურულ დაჯგუფებებთან. ზოგიერთი მათგანი, როგორც მაგალითად, ქართველ სიმბოლისტთა — „ცისფერყანწელთა“ ლიტერატურული ორდენი, ჯერ კიდევ რევოლუციამდე. 1915 წელს შეიქმნა, მაგრამ ხელსაყრელი კლასობრივი ვითარების გამო ისევ განაგრძობდა არსებობას, ხოლო ე. წ. „აკადემიური ასოციაცია“ და „ლევდი“ ანუ ფუტურზმი ჩამოყალიბდა საქართველოში საბჭოთა ხელისუფლების დამყარების შემდეგ,



როგორც კლასობრივი ძალების ახალი განლაგების რეზულტატი. თუ „აკადემიურ ასოციაციაში“ თავი მოიყარეს პროლეტარიატის გამარჯვებით უკმაყოფილო ელემენტებმა, საზოგადოების ყველაზე რეაქციულ - ნაციონალისტური წრეების იდეოლოგებმა, სამაგიეროდ ქართველი ფუტურისტები მოქმედებდნენ რევოლუციის სახელით და პროლეტარულ მწერლებზე უფრო მეტად ცხვენ პოზიციას ჩემულობდნენ. ფუტურისტების ასეთ საქციელს „სრული გაუგებრობა“ უწიდა ცნობილმა ქართველმა კრიტიკოსმა ივ. გამართელმა და ასეც იყო ფაქტიურად ისინი, როგორც ანტირეალისტი მწერლები, რეაქციის წისქვილზე უშვებდნენ წყალს და სიმბოლისტებთან და „აკადემიკოსებთან“ ერთად ქმნიდნენ ერთიან ფრონტს პროლეტარული მწერლობის წინააღმდეგ.

თავისთავად ცხადია, პროლეტარული მწერლობა ისე ვერ განვითარდებოდა, ისე ვერ დაიპყრობდა მბრძანებელ მწვერვალს ლიტერატურაში, თუ ვერ მიიგერიებდა სამივე ამ ანტირეალისტურ-დეკადენტური ლიტერატურული დაჯგუფების შემოტევას, თუ ვერ დაძლედა მათ გააფთრებულ წინააღმდეგობას. ამდენად, ქართული პროლეტარული მწერლობის დამკვიდრება-განმტკიცების პროცესი მიმდინარეობდა მძაფრ ბრძოლებში, რაშიც თავის გამოხატულებას პოულობდა მთელ საქართველოში გაჩაღებული მწვავე კლასობრივი ბრძოლა, ბრძოლა ძველსა და ახალს, მომაკვდავსა და განვითარებადს შორის.

საბედნიეროდ, აჭარაში მსგავსი ანტირეალისტურ-დეკადენტური ლიტერატურული დაჯგუფებანი არ ყოფილა და პროლეტარული მწერლობის შექმნა-დამკვიდრების პროცესიც რამდენადმე თავისებურად წარიმართა. რა თქმა უნდა, აჭარაშიც იგივე კლასები არსებობდა, მათ შორისაც ისეთივე მძაფრი ბრძოლა წარმოებდა, როგორც მთელ საქართველოში, მაგრამ თუ მაინც არ წარმოქმნილა ურთიერთ დაპირისპირებული ლიტერატურული დაჯგუფებანი, ეს ორი უმთა-

ვრები გარემოებით უნდა აიხსნას: ერთი, იმ დროს, ე. ი. ოციანა წლებიდან დადგეს ბათუმში თითო-ორილა მწერალი მოღვაწეობდა, მთელი ლიტერატურული ცხოვრება დღედა და გადმოღეღედა მხოლოდ თბილისში, სადაც თავმოყრილი იყო ქართველ მწერალთა აბსოლუტური უმრავლესობა; შემდეგ, ბათუმში არ იყო სახელმწიფო გამოცემლობა, არ გამოდიოდა არც ერთი ლიტერატურული ჟურნალი ან გაზეთი. მართალია, დრო და დრო მწერალთა ჯგუფი უშვებდა ლიტერატურულ ჟურნალებს, მაგრამ კადრებისა და ლიტერატურული პროდუქციის სიმცირის გამო ისინი ერთი-ორი ნომრის გამოსვლას შემდეგ არსებობას წყვეტდნენ. ამდენად, ლიტერატურული ჟურნალის სახელით ცნობილი „ისპირი“, „კანდელი“ და სხვა გამოცემები ფაქტიურად აღმანახი იყო და არა პერიოდული ორგანო.

მაშასადამე, თუმცა აჭარაში იყო ობიექტური პირობები ურთიერთ დაპირისპირებული ლიტერატურულ დაჯგუფებათა წარმოსაქმნელად, მაგრამ ისინი არ წარმოშობილან სუბიექტური ფაქტორების უკმარობის გამო. რაც შეეხება ბეჭდვითი ლიტერატურული ორგანოების უქონლობას, ეს აფერხებდა საერთოდ მთელი ლიტერატურული ცხოვრების აზვირთებას, ხელს უშლიდა მწერალთა ახალი კადრების აღზრდა-გამოვლინებას, საბოლოო ანგარიშით კი პროლეტარული მწერლობის განვითარებასაც.

ამ მხრივ ფრიად დამახასიათებელი იყო სამხატვრო-საილუსტრაციო ჟურნალი „აჭარისტანის“ რედაქციის განცხადება:

„აჭარისტანი ისე, როგორც საქართველოს ყოველი კუთხე, მდიდარია შემოქმედებით ძალებით. თუ აქამდე ქართულ ლიტერატურაში აჭარელი მწერალი არა ჩანს, ეს მხოლოდ იმიტომ, რომ აჭარისტანი ყველასაგან მივიწყებული კუთხე იყო. ყველაზე ნაკლებად აჭარისტანის მცხოვრებთათვის ლიტერატურის ასპირეზი იყო გახსნილი. ეს საკითხი აქამდეც მოუგვარებელია. ბათუმში ჟურნალი არ

იყო ამდენხანს. თბილისი კი შორს არის. ესეც არ იყო, ძნელია ახალგაზრდისათვის ჟურნალში შესვლა... განსაკუთრებით ეს ძნელია პროვინციისათვის, რომელიც ცენტრს დაშორებულია“ (№ 1, 1926 წ.).

როგორც ვხედავთ, ლიტერატურული ცხოვრების ჩამორჩენის უმთავრეს მიზეზად „აჭარისტანის“ რედაქცია თვლიდა საკუთარი ბეჭდვითი ლიტერატურული ორგანოს უქონლობას, რაც განსაკუთრებით აფერხებდა ახალგაზრდობის მიზიდვას ლიტერატურაში. საინტერესოა, რომ ამ ნაკლის აღმოსაფხვრელად ჟურნალს უცდია შემოეღო სპეციალური განყოფილება „ახალი ძალების გამოფენა“, სადაც უნდა დაბეჭდილიყო საზოგადოებისათვის სრულიად უცნობ ავტორთა თხზულებანი. ამასთან დაკავშირებით რედაქცია წერდა: „შეიძლება ბევრი ამ განყოფილებაში მოთავსებულთაგანი უნიჭო და უშედეგო დარჩეს, მაგრამ რედაქციას სჯერა, რომ აჭარისტანში ბევრი ხალასი ნიჭი აღმოჩნდება, რომ ჩვენი ჟურნალი ბევრს გაუყავდევს ლიტერატურული კარიერის ძნელ დასაწყისს. ხოლო აჭარისტანში რომ ბლომად არიან პოეტური ნიჭით დაჯილდოებულნი, ამას მოწმობს მდიდარი სახალხო პოეზია.“ სამწუხაროდ, ჟურნალს არ დაცალდა თავისი დაპირების შესრულება, რადგან ვაიზიარა თავის წინამორბედთა ბედი — სულ მალე არსებობა შეწყვიტა.

ასე შეიქმნა რაღაც მოჯადოებული წრე — ლიტერატურული ახალგაზრდობის აღზრდისათვის აუცილებელი იყო სათანადო ბეჭდვითი ორგანოები, ხოლო ლიტერატურულ ჟურნალ-გაზეთებს ხანგრძლივი არსებობა არ ეწერა, თუ არ ეყოლებოდა ფართო აქტივი. სადღა იყო გამოსავალი ამ მოჯადოებული წრიდან?

გამოსავალი იპოვა პოლიტიკურ-საზოგადოებრივმა გაზეთმა „ფუხარამ“. სწორედ იგი გახდა ძირითადი ბეჭდვითი ორგანო, რომლის ირგვლივაც ირანხმებოდნენ მწერალთა ახალი კადრები. მან გულლიად და სტუმართმოყვარულად გაუღო კარები ახალგაზრდა, დამწყებ ავ-

ტორებს, განსაკუთრებით იმ პერიოდში როდესაც გაზეთს რედაქტორობდა პროლეტარულ პოეტთა პირველი თაობის ერთ-ერთი ყველაზე თვალსაჩინო წარმომადგენელი ნოე ზომლეთელი. თვითონ პოეტი და ნიჭიერი პარტიული ლიტერატორი, ნოე ზომლეთელი, ბუნებრივია, საგანგებო ყურადღებას აქცევდა ლიტერატურასა და ხელოვნებას, სისტემატურად ბეჭდავდა ლექსებს, მოთხრობებს, მხატვრულ ნარკვევებს, ლიტერატურულ-კრიტიკულ სტატიებს და ამით ახალისებდა ახალგაზრდა ავტორებს, ხელს უწყობდა მათს აღზრდასა და გამოვლინებას. აქ საყურადღებოა მეორე მომენტიც. იმის გამო, რომ ლიტერატურული ცხოვრების აღმავლობას სათავეში ჩაუდგა პარტიული ორგანო „ფუხარა“, ხოლო მის საქმიანობას წარმართავდა პროლეტარული პოეტი ნოე ზომლეთელი, ჩვენი მწერლობა თავიდანვე წარმართა ერთი გარკვეული მიმართულებით — ხალხის უანგარო სამსახურის გზით და თავიდანვე მიიღო მკაფიოდ გამოკვეთილი კომუნისტური მიზანარსი.

ასეთი ყოველდღიური ზრუნვისა და ყურადღების შედეგად ლიტერატურული ცხოვრება აჭარაში თანდათან გამოცოცხლდა. ასპარეზზე გამოვიდნენ ახალგაზრდა ლიტერატორები და მალე შესაძლებელი გახდა მწერალთა ორგანიზაციული გაერთიანებაც. 1927 წელს შეიქმნა პროლეტარულ მწერალთა ასოციაციის აჭარის განყოფილება. ეს იყო უმნიშვნელოვანესი მოვლენა, უმნიშვნელოვანესი ეტაპი აჭარაში მხატვრული სიტყვის განვითარების ისტორიაში. იგი მოასწავებდა ლიტერატურული ძალების კონსოლიდაციის დამთავრებას პროლეტარული მწერლობის დროშის ქვეშ და ამ ისტორიის ახალი თავფურცელებს გადაშლას.

აი როგორ აფასებდა აჭარის ლიტერატორთა წარმატებას ერთ-ერთი პროლეტარული მწერალი ვ. მახარაძე, რომელიც თვითონ მოჰყვა ახალ ლიტერატურულ ტალღას. „ღია წერილში“ თავისი კოლეგებისადმი იგი წერდა: „სისტემატურად ვკითხულობ თქვენს ლექსებს გა-

ზეთ „ფუნარაში“. მომწონს მათი შინა-
არსი. ჩანს, რომ ოდესღაც სიბუნელით
მოცულ მხარეში გამოდიან მწერლები
და პოეტები, რომლებიც ადრე თუ გვი-
ან უფროდღებას მიიპყრობენ და დავას-
დებიან. არ მოველოდი აჭარისტანში
პროლეტარული მწერლობის ამ დონემდე
განვითარებას. სულ ერთი წელი არც კი
იქნება მის შემდეგ, რაც ბათუმელი
მწერლები, ზოგი ძველი და ზოგი ახალი,
პროლეტარული მწერლობის დროშის
ქვეშ დაიარაღმნენ და გწვეიან მუშაობას.
მას აქეთ დიდი მიღწევები გაქვთ... საზო-
გადოება დაარწმუნდა, რომ აჭარისტანში
ძალებია, რომლებსაც შეუძლია თავისი
სიტყვა თქვას ქართულ და საერთოდ
პროლეტარულ ლიტერატურაში“ („სიტ-
ყვა ტრიბუნიდან“, 1928 წ.).

**ამრიგად, 1921-1927 წლები იყო აჭა-
რის ლიტერატურული კადრების აღზრ-
დისა და პროლეტარული მწერლობის
დროშის ქვეშ მათი კონსოლიდაციის
წლები.**

* * *

ახალი, პროლეტარული მწერლობის
განვითარება აჭარაში, როგორც
ვთქვით, შედარებით უმტკივნეულოდ მი-
მდინარეობდა, რამდენადაც არ არსებობ-
და მისდამი მტრულად განწყობილი ლი-
ტერატურული დაჯგუფებანი. მაგრამ შე-
ცდომა იქნებოდა გვეფიქრა, თითქოს
პროლეტარული მწერლობის დამკვიდრე-
ბის პროცესი აქ კარჩაკეტილად მიმ-
დინარეობდა, საერთო ლიტერატურულ-
ი ცხოვრებისაგან მოწყვეტით. არა,
ასე არ ყოფილა. აჭარაში არა მარტო დი-
დი ინტერესით ადევნებდნენ თვალ-
ყურს ზოგადქართული ლიტერატურული
მოვლენების განვითარებას, არამედ თა-
ვისი წვლილიც შეჰქონდათ ანტირეალის-
ტური, ანტისაბჭოური ლიტერატურული
დაჯგუფებების წინააღმდეგ ბრძოლაში.
საკმარისია ითქვას, რომ უფროსი „აჭა-
რისტანის“ მარტო პირველ ნომერში
მოთავსებული იყო ორი სტატია ლიტე-
რატურის იდეური სიწმინდის, მისი ხალ-
ხურობისა და პარტიულობის დასაცა-
ვად. მათგან შვარციის სტატია „წარსუ-

ლის ნანგრევებზე“ („ტანჯვის ბარძიმი“)
მიმართული იყო „აუღმეური ასურ-
ციის“ ერთ-ერთი მთავარი შენაკადის —
ყოფილი „დემოკრატიული“ პოეზიის წა-
რმომადგენელთა (ხ. ვარდოშვილი, ალ.
აბაშელი) იდეური პოზიციის წინააღ-
მდეგ, ხოლო მიმოძიებულის სტატია
„ლიტერატურული საქართველო“ ამხი-
ლებდა ქართველ ფუტურისტთა ფორმა-
ლისტურ ჩხირკედელაობას, მათი პოე-
ზიის ყალბ რევოლუციონიზმს. გარდა
ამისა, უფროსი დაბეჭდილია სტატიე-
ბი ხელოვნების, ქართული თეატრის გან-
ვითარების პრობლემებზე; გამოჩენილი
რუსი პოეტის ს. ესენინის თვითმკვლე-
ლობის გამო და ა. შ. ეს ერთი მაგალი-
თიც კი, ვფიქრობ, ცხადყოფს იმ
ფაქტს, რომ აჭარის მხატვრული სიტყვის
ოსტატები სრულიადაც არ ეწეოდნენ
განცალკევებულ ცხოვრებას, ფეხდაფეხ
მიჰყვებოდნენ როგორც ქართულ, ისე
რუსულ და საერთო საკავშირო ლიტერა-
ტურულ მოვლენებს.

სწორედ ამ გარემოებამ განაპირობა,
რომ მომდევნო პერიოდში — 1928-1934
წლებში, როცა ჩვენს ქვეყანაში დაიწყო
მასობრივი სოციალისტური გარდაქმნე-
ბი, აჭარის მწერლები აღმოჩნდნენ ახ-
ლისათვის მებრძოლთა პირველ რიგებში
და თავისი წვლილი შეიტანეს სოცია-
ლისტური მშენებლობის დიად საქმეში.

1928 წელს პროლეტარულ მწერალთა
აჭარის განყოფილებამ გამოსცა თავისი
პირველი ალმანახი „სიტყვა ტრიბუნი-
დან“, რომელშიც უკვე ოცდაათამდე
ავტორი მონაწილეობდა. კრებულში და-
ბეჭდილი იყო პ. რურუსა, ნ. მალაზო-
ნიას, გრ. შავიშვილის, ნ. იმედაშვილის,
თ. ლეჟავას, ხ. კომახიძის, ჯ. ნოღაიდ-
ლის, ზ. ქემხაძის, ლ. შარაშიძისა და
სხვთა ლექსები. ბ. თაველშაძის, დ.
ჭანჭავთელის, გრ. გრიგორიანის, ალ. მე-
ლაძის, პ. ლორიას, ვ. მახარაძის მოთხ-
რობები, დოც. ნ. ქუთათელაძის, ირ. ფე-
რაძის კრიტიკული სტატიები და ა. შ. სა-
გულისხმოა, რომ კრებულში დაბეჭდი-
ლი თითქმის ყველა ლექსი და მოთხრო-

მა მხოლოდ თანამედროვეობას ასახავს, წარსულს მასში სრულიად უმნიშვნელო ადგილი უკავია.

სამწუხაროდ, კრებულის „სიტყვა ტრიბუნიდან“ მხატვრული დონე დაბალია. ვერც პოეტები და ვერც პროზაიკოსები ბოლომდე ვერ ახერხებენ იდეის მხატვრულ განსჯეულებას და ხშირად კმაყოფილდებიან მშრალი პუბლიცისტიკით, ლიტონი დეკლარაციით. მოთხრობათა სიუჟეტები მიაბიტურია, თემატიკა კი ძლიერ დარიბი და ერთფეროვანი. ასე, რომ სრულიადაც არ გვეჩვენება გადაჭარბებულად კრებულის სარედაქციო კოლეგიის აღიარება: „ახალ ლიტერატურას, რომელიც პროლეტარული მწერლობის სახელწოდებით შედის პოეზიის მაღალ ტაძარში, საესებით ჯერ კიდევ არა აქვს დაურეზებული ფორმალური ხერხები... ამჟამად კი მოცემული სახე პროლეტარული მწერლობის ზრდისა და მუშაობის პროცესშია. ამიტომ მკითხველი კრიტიკული თვალთ უნდა დებულობდეს (მით უმეტეს აჭარბების სინამდვილეში) ამ კრებულში მოცემულ ნაწარმოებთ. როგორც ჯერ კიდევ მაღალი პრეტენზიებით მოშორებულ თეზისს. პროლეტარული მწერლობის შემოქმედება მკითხველთა ბზარზე გამოდის ისე, რომ მას სჭირდება ნაჯახის და წალდის დახმარებით აგება და გათლა...“

ნაწარმოები, რომელსაც დაბეჭდვის შემდეგაც კი ესაჭიროება ნაჯახითა და წალდით გათლა, რა თქმა უნდა, ძნელია მივაკუთვნოთ მხატვრულ ლიტერატურას. მაგრამ აღმანახი „სიტყვა ტრიბუნიდან“ მაინც თვალსაჩინო მოვლენად უნდა მივიჩნიოთ ჩვენს ლიტერატურულ ცხოვრებაში. უთუოდ მართალი იყო მისი სარედაქციო კოლეგია, როცა ამ კრებულის ისტორიულ მნიშვნელობას ასე განსაზღვრავდა: „პროლეტარული მწერლების ასეთი კოლექტიური დარაზმვა კრებულის სახით აჭარბებისათვის პირველი მერცხალია, რომელმაც გაზაფხული უნდა მოიყვანოს“.

ეს იყო აღიარება, რომ აღმანახი „სიტყვა ტრიბუნიდან“ არ ჰქონდა პროლეტარატურის პრეტენზია, იგი მხოლოდ აჯამებდა წინა პერიოდში გაწეულ მუშაობას ჩვენი მწერლობის აღორძინებისათვის. და დღეს, ორმოცი წლის შემდეგ, შეგვიძლია დავადასტუროთ, რომ ეს მუშაობა მართლაც ფრიად ნაყოფიერი და თვალსაჩინო იყო, განსაკუთრებით მწერალთა კადრების რაოდენობრივი ზრდის თვალსაზრისით. პირველი ნაბიჯი ყოველთვის ძნელია და სასიხარულო იყო, რომ იგი გადაიდგა მტკიცედ, რწმენით, გამარჯვების იმედით. ლიტერატურის კარები შემოაღეს მუშებმა და გლეხებმა ან ამ სოციალური წრეების ღვიძლმა შვილებმა, რომლებსაც საბჭოთა ხელისუფლებამ გაუღვია სულიერი ინტერესები და მწერლობის სიყვარულიც. ამ მხრივ ძლიერ კოლორიტულ ფიგურას წარმოადგენდა ხასან (ხარტიონ) კომახიძე, აღმანახის ერთ-ერთი აქტიური მონაწილე. იგი ჩვეულებრივი ბოზოყვათელი გლეხი იყო, უნდოდა სწავლა, მაგრამ უსახსრობის გამო ვერ შეძლო. წერა-კითხვა ისწავლა უკვე მოწიფულმა ვაჟაკმა, როცა ოცდაათ წელს გადააბიჯა.

პროლეტარულ პოეტთა შორის, რომლებიც აღმანახში „სიტყვა ტრიბუნიდან“ მონაწილეობდნენ, თავისი ბიოგრაფიით ხასან კომახიძე გამოჩაყლისი როდი იყო, პირიქით, მასზე ოდნავ უფრო ნასწავლი იყო პარმენ ლორია, რომელმაც სოფლის ორკლასიანი სკოლის დამთავრება მაინც მოახერხა. ისიც გლეხი იყო, შემდეგ მუშა, ჯარისკაცი, ოციან წლებში კი, როცა აქტიურად ჩაება ლიტერატურულ ცხოვრებაში, — რიგითი მილიციელი. და თუ მან გაცილებით მეტი გააკეთა, ვიდრე მისმა თანამოკალმებებმა, ამას თვითგანვითარებას უნდა უმაღლოდეს. ასეთივე ბიოგრაფია და განათლება ჰქონდა ბევრ სხვა პროლეტარულ მწერალსაც, რომლებმაც ჩვენი პირველი, მართალია, სუსტი, მაგრამ მაინც ლიტერატურა შექმნეს. კარგად თქვა ამის შესახებ ერთ-ერთმა პროლეტარულმა მწერალმა: „ბეზი-

მენსკები ჩვენში (ე. ი. აჭარაში — შ. ქ.) ჯერ არაა, მაგრამ არიან პატარა ბეზიმენსკები“. ცხადია, პატარა პოეტობაც არ არის ცული.

ასეთი კრიტიკული დამოკიდებულება საკუთარი შემოქმედებითი მოღვაწეობისადმი, ჯერ ერთი, მოწმობდა, რომ პროლეტარულ მწერალთა პირველი თაობა მხოლოდ გულის კარნახით წერდა, არ ეძიებდა სახელსა და დიდებას; შემდეგ, იგი მოასწავებდა ახალი ხანის, ახალი ეტაპის მოახლოებას, როცა მშრალი აგრესია და ლიტონი დეკლარაცია საკმარისი აღარ იქნებოდა, როცა მწერლობის წინაშე გაცილებით უფრო რთული ამოცანები დადგებოდა. სწორედ 1928 წელს დაიწყო დიდი გარდატეხა, გრანდიოზული სოციალისტური რევოლუციონერული მილიონობით ადამიანის საუკუნეობით განმტკიცებელი შეგნებისა და ფსიქოლოგიის გარდაქმნა. საჭირო იყო ცხოვრების სიღრმისეული მოვლენების ასახვა, მათ არსში ჩაწვდომა და ახალი ადამიანის — სოციალიზმის მშენებლის სულიერი სამყაროს, მისი გართულებული ფსიქოლოგიის ჩვენება. სხვანაირად მწერლობა ვერ გახდებოდა სოციალიზმის მშენებლობის აქტიური მონაწილე, ვერ მოახდენდა ჯეროვან გავლენას მოვლენათა მსვლელობაზე. ეს კი მწერლისაგან მაღალ ოსტატობას მოითხოვდა. მეორე მხრივ, ჩვენს ქვეყანაში განხორციელებული კულტურული რევოლუციის შედეგად თვალსაჩინოდ ამოღდა მოსახლეობის კულტურული დონე. შესაბამისად გაიზარდა მკითხველის მოთხოვნილებაც. ის, რაც აკმაყოფილებდა მცირემცოდნეს, ვერ დააკმაყოფილებდა განათლებულ მკითხველს. ამით აიხსნება, რომ 1928-34 წლების მანძილზე აჭარის მწერალთა შემდგენლობაში დიდი ცვლილება, დიდი გადახალისება მოხდა — მწერალთა პირველი თაობის აბსოლუტური უმრავლესობა ჩამოშორდა ლიტერატურას. მათ აღარ ხელეწიფებოდათ ახალი მკითხველის გაზრდილ მოთხოვნილებათა დაკმაყოფილება. ეს ცხადი გახდება, თუ ერთ-

მანეთს შევადარებთ ამ პერიოდის პირველი ალმანახის „სიტყვა ტრიბუნისა“ (1928 წ.) და უკანასკნელი კრებული „ლიტერატურული აჭარისტიანის“ (1934 წ.) ავტორთა სიას. ახალ ალმანახში ძველ ავტორებიდან დარჩნენ მარტო პ. ლორია, პ. რურუა და ნ. მაღაზონია, აგრეთვე ჯ. ნოლაიდელი და ლ. შარაშიძე, მაგრამ ეს უკანასკნელნი უკვე წარმოდგენილი არიან არა ლექსებით, როგორც წინათ, არამედ მეცნიერული და ლიტერატურულ-კრიტიკული სტატიებით.

კრებული „ლიტერატურული აჭარისტიანი“ გამოსცა აჭარისტიანის მწერალთა კავშირმა, რომელიც შეიქმნა სკკპ ცენტრალური კომიტეტის 1932 წლის 23 აპრილის ისტორიული დადგენილების შესაბამისად. ამ დადგენილებით, როგორც ცნობილია, გაუქმდა პროლეტარულ მწერალთა ასოციაცია და სხვა ლიტერატურული დაჯგუფებანი. მათ ნაცვლად ჩამოყალიბდა სსრ კავშირის საბჭოთა მწერლების კავშირი, რომელიც აერთიანებდა უკლებლივ ყველა მწერალს, ვინც კი აღიარებდა და მხარს უჭერდა საბჭოთა ხელისუფლების პლატფორმას. ეს იყო უაღრესად დროული და ბრძნული გადაწყვეტილება. მან ბოლო მოუღო გვეფთობრიობას და უპრინციპო ბრძოლას ლიტერატურაში, მწერალთა კადრების დაქსაქსვას და უზრუნველყო ლიტერატურის ახალი მძლავრი აღმავლობა, ყველა მწერლის თავმოყრა მარქსიზმ-ლენინიზმის დროშის ქვეშ. მაღე, სულ ორიოდ წლის შემდეგ, 1934 წელს გაიმართა მწერალთა კავშირის პირველი სრულიად საკავშირო ყრილობა, რომელსაც ხელმძღვანელობდა დიდი პროლეტარული მწერალი მაქსიმ გორკი. და აი ამ ღირსწესანიშნავ მოვლენას — მწერალთა პირველ საკავშირო ყრილობას მიუთქვამდა აჭარის მწერალთა ორგანიზაციამ კრებული „ლიტერატურული აჭარისტიანი“.

ეს კრებული წინა ალმანახებისაგან უპირველეს ყოვლისა განირჩევა მეტი კონკრეტულობით, მეტი საგნობრიობით, ხალხის ცხოვრებასთან მჭიდრო კავშირით.



თითქმის ყველა თხზულებას თავისი საგანი, თავისი მისამართი აქვს. თუ ერთ პოეტს ადლებდნენ ჩელუსკინელთა ეპოპეა, მეორე წერს ოჩხამურზე, მის ჩაის პლანტაციებზე, მესამე უმღერის აწვესს, მეოთხე — ქარხნის მუშას და ა. შ. კიდევ უფრო კონკრეტული, ცხოვრებისეული მასალა უდევს საფუძვლად ნარკვევებს, რომლებიც განსაკუთრებით უხვად არის წარმოდგენილი კრებულში. ნარკვევის ყანარის ასეთი ფართოდ გაერცელება სრულიადაც არ ყოფილა შემთხვევითი. არის რა უაღრესად ოპერატიული, მხატვრული ნარკვევი საშუალებას აძლევს მწერალს დაუყოვნებლივ გამოეხმაუროს ამა თუ იმ მოვლენას, დააყენოს იგი ყურადღების ცენტრში. რამდენადაც ოცდაათიან წლებში ყოველი დღე აღსვს იყო ახალ-ახალი მოვლენებით, მიმდინარეობდა ძველის მსხვერვა და ახლის დამკვიდრება, ნარკვევი ყველაზე უფრო მოქნილ ქანარად ჩანდა და მწერლებმა მასობრივად მიმართეს მას. დამახასიათებელია, რომ „ლიტერატურულ აპარისტანში“ არ არის არც ერთი მოთხრობა, ნოველა, მინიატურა — ყველა პროზაული ნაწარმოები ნარკვევია. საინტერესოა თვით ამ ნარკვევების თემა, მისამართი: პ. ლორია თავის ნარკვევს უძღვნის ბათუმელ მენავეთობებს, მ. მეგრელიძე — აწვესს, რ. მენაბდე და პ. ზამბახიძე — ჩაქვის ჩაის საბჭოთა მეურნეობას, ე. ხელაშვილი — კვირიკის ლიმონ-მანდარინის საბჭოთა მეურნეობას და სხვ.

ყველაფერი ეს ცხადყოფს, რომ აპარის მხატვრული სიტყვის ოსტატები ცდილობდნენ მკიდროდ დაკავშირებოდნენ ხალხის ცხოვრებას, აესახათ იგი თავისი კონკრეტული გამოვლინებით, ეჩვენებინათ, როგორ დევნიდა ახალი ძველს საუკუნეობრივი პოზიციებიდან, როგორ გარდაქმნიდა ხალხი ბუნებას და მასთან ერთად თავის თავსაც. სასიამოვნოა იმის აღნიშვნაც, რომ მათ თვალსაჩინოდ აიძალეს მხატვრული ოსტატობის დონე. კრებულში დაბეჭდილი თხზულებები ამ თვალსაზრისით შესამჩნევად სჯობს ძველი აღმა-

ნახების თხზულებებს — მათში პროტესიონალიზმი იგრძნობა. განსაკუთრებით სასიხარულო იყო, რომ ამ პერიოდში ჩვენს ლიტერატურას შეემატა სამი ნიჭიერი პოეტი — მ. ვარშანიძე, შ. იოსელიანი და ლ. ძიმიტარიშვილი (ლ. ტბაუერი), რომელთა ბედი სულ სხვადასხვანაირად წარიმართა. თუ ერთი დღესაც ნაყოფიერად მოღვაწეობს, მეორე დიდ სამამულო ომში დაიღუპა, ხოლო მესამე — 1937 წელს.

ამრიგად, 1928-1934 წლები — ეს იყო ჩვენი ლიტერატურის დავაუკაცების და წინსვლის წლები, როცა მწერლობა შეიჭრა ცხოვრებაში და დაიწყო მისი კონკრეტული ასახვა. პირველი თაობის ბევრი მწერალი ჩამოშორდა ლიტერატურას: მათ ნაცვლად მოვიდნენ ახალგაზრდები, რომლებსაც ნიჭთან ერთად ჰქონდათ საკმაოდ ფართო განათლებაც.

* * *

ახალი მძლავრი აღმავლობით აღინიშნა ჩვენს ლიტერატურაში 1935-1941 წლები.

ეს იყო პერიოდი, როცა ჩვენს ქვეყანაში არაჩვეულებრივი შრომითი ენთუზიზმით გრძელდებოდა დიდი სოციალისტური გარდაქმნები, სახეს იცვლიდნენ არა მარტო ცალკეული სოფლები და ქალაქები, არამედ მთელი მხარეები და რესპუბლიკები. ადამიანთა შეგნებაში ძირითადად აღმოიფხვრა კაპიტალისტური გადმონაშთები. ჩვენი საზოგადოება გახდა მორალურ - პოლიტიკურად ერთიანი, არსებითად შეიცვალა მისი კლასობრივი სტრუქტურა. პირველად კაცობრიობის ისტორიაში მოიხსოვა ყველა ექსპლოატორული კლასი. ასეთ ვითარებაში საჭირო გახდა ძველი კონსტიტუციის შეცვლა. საყოველთაო-სახალხო განხილვის შემდეგ საბჭოების მე-8 საგანგებო ყრილობამ ერთსულოვნად, უდიდესი აღფრთოვანებით მიიღო სსრ კავშირის ახალი კონსტიტუცია. მეგობრული კლასები — მუშები და გლეხები, აგრეთვე ახალი, სახალხო ინტელიგენცია ხელიხელჩაი-

დებულები ქმნიდნენ ახალ ცხოვრებას. ჩამოყალიბდა ახალი ადამიანი, რომლის მსგავსი არ იცოდა ისტორიამ. მაღალი მორალური თვისებები, რომლებიც მოწინავე მონაზროვნეებს იდეალურად მიაჩნდათ, მისი საკუთრება გახდა. მას უწყობდა საბჭოთა ადამიანი, მაგრამ უკვე ამ დროს იგრძნობოდა მომავალი ომის სუსხი. 1939 წელს ევროპაში დაიწყო მეორე მსოფლიო ომი, რომელიც თანდათან უახლოვდებოდა ჩვენს სამშობლოს. დაიწყო ომისათვის იდეოლოგიური მომზადება და განსაკუთრებული ყურადღება დაეთმო ადამიანთა პატრიოტულ აღზრდას, სოციალისტური სამშობლოს სიყვარულის დანერგვა - განმტკიცებას.

საბჭოთა მწერლობა ცხოვრების აქტიური მონაწილე გახდა. იგი ზედისზედ იბყრობდა ახალ-ახალ მწვერვლებს. დიდი ძვრები მოხდა ქართულ ლიტერატურაშიც. ევროპა, აჭარის მხატვრული სიტყვის ოსტატებმა შექმნეს ნაწარმოებები, რომლებმაც საყოველთაო ყურადღება მიიპყრეს.

განსაკუთრებით ხაზგასასმელია, რომ სწორედ ამ პერიოდში დაიწერა აჭარისა და აჭარელთა ცხოვრების ამსახველი პირველი რომანები. გამოჩნდა „დიდი“ დრამატურგიაც. თუ წინათ უმთავრესად წერდნენ ვოდევილებს, სკეტჩებს და საერთოდ „მცირეფორმიან“ პიესებს, ახლა უკვე ფართო ტილოებს მოჰქიდას ხელი — დაიწერა პირველი დრამები, კომედიები. ამავე დროს განუწყვეტლივ ვითარდებოდა პოეზია და ლირიკის გვერდით გამოჩნდა ეპოსიც. ამასთან ერთად მწერლობაში მოვიდნენ ნიჟიერი ახალგაზრდები, მათ შორის ქალებიც. აღმანახში „საბჭოთა აჭარა“, რომელიც 1936 წელს გამოიცა, უკვე ორი პოეტი ქალი — სურთე პაუნიანიშვილი და ფატყუმი დადიანი მონაწილეობდნენ. მალე მათ შეემატა ნანა გვარნიშვილი, რომელიც დღეს ცნობილი ქართველი პოეტია. ამავე პერიოდში გამოაქვეყნეს თავისი პირველი ნაწარმოებები გ. სალუქვაძემ, კ. რუსიძემ და სხვ.

ცალკე და საგანგებოდ უნდა აღვნიშნოთ ჩვენი მსოფლიო მწერლის ლორიას დამსახურება. სწორედ მან დაწერა აჭარისა და მისი ადამიანების ამსახველი პირველი რომანი. ეს იყო დილოგია „ჩაი“. წიგნს არაჩვეულებრივი წარმატება ხელა და პ. ლორიას მთელ საქართველოში მოუპოვა ფართო პოპულარობა. მისი გმირები — მოწინავე ადამიანები მხურვალედ შეიყვარა ქართველმა მკითხველმა. თუ „ჩაი“ ასახავდა სოციალისტურ გარდაქმნებს აჭარაში ოცდაათიან წლებში და მათ საფუძველზე ახალი ადამიანის ფორმირების პროცესს, რომანს „განთიადი ხევი“ გადაეყვარა ქრონოლოგიურად უფრო აღინდელ ხანაში — ოციან წლებში, როცა აჭარის სოფლებში მკვიდრდებოდა და მტყიცდებოდა საბჭოთა ხელისუფლებამ. თსულების გმირები მურადი, ნაოლე, ანდრო ახლისათვის მებრძოლთა შთამბეჭდავი მხატვრული სახეებია.

აქტიურ პოეტურ მოღვაწეობას განაგრძობდა მუშა პოეტი პარმენ ოღნელორთრუა. იგი სამწერლო ასპარეზზე ჯერ კიდევ რევოლუციამდე — 1911 წელს გამოვიდა და სიკვდილამდე ხელიდან არ გაუგდია კალამი. ოცდაათიან წლებშიც იგი მუშა იყო — ოპერატორად მუშაობდა ბათუმის ნავთობგადამამუშავებელ ქარხანაში, შემდეგ კი მსახურობდა აჭარის სახელგამში. სიცოცხლის უკანასკნელ წლებში იგი პენსიაში იმყოფებოდა. პარმენ რურუა წერდა ლირიკულ-მოქალაქეობრივ ლექსებს, მოღვაწეობდა საბავშვო ლიტერატურის დარგშიც და ნორჩ მკითხველებს დაუტოვა ბევრი კარგი ლექსი და რამდენიმე პოემა.

პროზასა და პოეზიაში ნაყოფიერ მოღვაწეობას განაგრძობდნენ ნ. მალაზონია, მ. ვარშანაძე, ნ. გვარნიშვილი, გ. სალუქვაძე, მ. მეგრელიძე, ა. კაკიაციშვილი, შ. იოსელიანი, ხ. ოქროპირიძე, მ. გოვაძე, შ. შუბლაძე და სხვ. აქვე უნდა მოვიხსენიოთ ნიჟიერი ახალგაზრდა პოეტი ლ. ძიმისტარიშვილი, რომელსაც არ დასცალდა სრულად გამოეკვინებინა თავისი შემოქმედებითი შესაძლებლობანი.

როგორც უკვე ვთქვით, 1935-1941 წლებში დიდი აღმავლობა განიცადა ჩვენმა დრამატურგებმა. პირველი პიესები აჭარის ცხოვრებიდან დაწერა პ. ლორიამ, მაგრამ ისინი უმთავრესად გამიზნული იყო სოფლის სცენისა და აგიტმხატვრული ბრიგადებისათვის. ამდენად ისინი ე. წ. „მცირე“ დრამატურგებს განეკუთვნებოდნენ. პირველი პიესა აჭარის ცხოვრებიდან, რომელიც სახელმწიფო თეატრის სცენაზე წარმოადგინეს და წარმატებაც ხვდა, ეს იყო კ. კალაძის „ხატიჯე“, რომელიც კ. მარჯანიშვილმა დადგა ქუთაის-ბათუმის თეატრში. მას შემდეგ ეს ტრადიცია განაგრძო დრამატურგმა ამირან შერვაშიძემ.

ამირან შერვაშიძე სამწერლო ასპარეზზე გამოვიდა 1928 წელს, სრულიად ახალგაზრდა. მისი პირველი ნაწარმოები იყო პატარა მოთხრობა „ფატმა“, რომელიც ცალკე წიგნად გამოიცა, ხოლო პირველი პიესა, რომელშიც ახალგაზრდა დრამატურგმა სცადა აეჩახა აჭარის ცხოვრება, იყო „პატარა შეცდომა“. ეს პიესა მიმართული იყო აჭარაში ჯერ კიდევ შემორჩენილი ძველი ადათ-ჩვევების წინააღმდეგ. უფრო მნიშვნელოვანია ა. შერვაშიძის ისტორიულ-რევოლუციური პიესა „მზე“. იგი 1941 წელს დადგა ბათუმის თეატრმა და მიუძღვნა საბჭოთა საქართველოს ოცი წლისთავს. „მზეში“ გადმოცემულია მასების ბრძოლა კომუნისტური პარტიის მეთაურობით საბჭოთა ხელისუფლების დასამყარებლად აჭარაში. განსაკუთრებით ძლიერ შთაბეჭდილებას ტოვებს ღარიბი აჭარელი გლეხის — ახმედის მხატვრული სახე. უფრო ადრე — 1940 წელს უკრაინის ოცამდე თეატრმა დადგა ა. შერვაშიძის დრამა „კრავჭუკის ცრემლები“. იგი მიეძღვნა საბჭოთა არმიის მიერ დასავლეთ უკრაინის განთავისუფლებას 1939 წელს და უკრაინის სახელმწიფოებრივ გაერთიანებას, რასაც მთელი უკრაინელი ხალხი უდიდესი სიხარულით შეხვდა.

ჩვენი ლიტერატურის წარმატებებში მნიშვნელოვანი წვლილი შეიტანეს ლიტერატურის კრიტიკოსებმა და ლიტერა-

ტურისმცოდნეებმა ალ. ჩავლეიშვილმა, ლ. შარაშიძემ, ნ. პიჭაძემ და სხვ. ისინი მარქსიზმ-ლენინიზმის შუქზე განიხილავდნენ აჭარის მწერალთა ცალკეულ წიგნებს თუ შემოქმედებას.

თუ შევაჯამებთ ზემოთქმულს, შეგვიძლია დავასკვნათ, რომ დიდი სამამულო ომის წინ აჭარაში უკვე არსებობდა საკმაოდ მაღალხარისხის მხატვრული ლიტერატურა, რომელიც ქართული მწერლობის სულ უფრო მძლავრი შენაკადი ხდებოდა.

* * *

დიდმა სამამულო ომმა შეწყვიტა საბჭოთა საზოგადოების მშვიდობიანი განვითარება. ფაშისტური ბანდების თავდასხმამ მომავლდინებული საფრთხე შეუქმნა ჩვენს სამშობლოს და სოციალიზმის მონაპოვრებს. დადგა მსოფლიოში პირველი სოციალისტური სახელმწიფოს ყოფნა-არყოფნის საკითხი. მშობლიური კომუნისტური პარტიის მოწოდებით მთელი საბჭოთა ხალხი აღსდგა სოციალიზმის სამშობლოს დასაცავად, ევროპისა და მთელი კაცობრიობის გადასარჩენად მიხაკისფერი ჭირისაგან. ჩვენი ლიტერატურა ომის პირველი დღიდანვე ჩაღდა ხალხის სამსახურში და ყველაფერს აკეთებდა მტერზე გამარჯვებისათვის. თავისი მხატვრული თხზულებებით საბჭოთა მწერლები ზრდიდნენ პატრიოტულ გრძნობას, უნერგავდნენ მკითხველებს ჩვენი გარდუეალი გამარჯვების რწმენას. ბევრმა მწერალმა კალამთან ერთად ხელში აიღო შაშხანა და იარაღით ებრძოდა მომხდურ მტერს. მათ შორის იყვნენ მ. ვარშანიძე, შ. იოსელიანი და სხვ.

ომის დაწყების წინ გამოვიდა პ. ლორიას რომანი „მეგლუდი“, რომელიც ასახავდა ცნობილი აჭარელი ყაჩაღის მეგლუდ დასამიძის ცხოვრებას, მისი რაზმის ბრძოლებს სოციალური და ეროვნული თავისუფლებისათვის. თავისი იდეებით მწერლის ახალი რომანი ეხმაურებოდა დროის მოთხოვნას და მას დიდი წარმატებაც ხვდა. ომის პერიოდშივე გამოაქვეყნა პ. ლორიამ რამდენიმე საინ-

ტერესო მოთხრობა და ნარკვევი, ხოლო ერთ-ერთ ახალ რომანში „ალისფერი დილა“ სცადა აესახა საბჭოთა ადამიანების გმირობა და პატრიოტიზმი დიდ სამამულო ომში.

საბჭოთა ხალხის ერთიანობას, ფრონტისა და ზურგის ურღვევ კავშირს მიუძღვნა კ. რუსიძემ რომანები „იწერებოდა სისხლით“, „ყვირ დედე“, ხოლო უფრო გვიან საკმაოდ სქელტანიანი რომანი „გამარჯვება“. მხატვრული თვალსაზრისით ეს ნაწარმოებები არ წარმოადგენს თვალსაჩინო მოვლენას, მაგრამ მათ მაინც გარკვეული როლი შეასრულეს და ხელი შეუწყვეს მკითხველთა პატრიოტულ აღზრდას.

ომის წლებში განსაკუთრებული ძალით ძღვრდა ნ. მალაზონის პოეტური ჩანგი. თავისი შეიარაღებული ძალებისადმი საბჭოთა ხალხის უსაზღვრო სიყვარულს შესანიშნავად გადმოგვცემს მისი ლექსი „წყვილი წინაა“; სამამულო ომის სახელოვან გმირებს განადიდებდა ლექსები „სიმღერა“, „მფრინავის ბარათი“ და სხვ. შინაგანი ტკივილებით, დიდი უშუალობითა და ემოციურობით წარუშლელ შთაბეჭდილებას ახდენს ნ. მალაზონისა ლექსი „მოდიან, შვილო, ჯარისკაცები“. მიძღვნილი პოეტის ერთადერთი ვაჟისადმი, რომელიც გმირულად დაიღუპა დიდი სამამულო ომის ფრონტზე. ყველა ეს ლექსი შეტანილია კრებულში „გულის ხმა“, რომელსაც მკითხველი საზოგადოებრიობა ძლიერ გულთბილად შეხვდა.

პირველივე ლექსით „სიმღერა ისრაფილ ჯინჭარაძეზე“ მიიქცია მკითხველის ყურადღება ფრიდონ ხალვაშმა, რომლის ლიტერატურული დებიუტი დიდი სამამულო ომის მრისხანე დღეებში შედგა. პოეტის ომისდროინდელი ლექსები ღრმად პუბლიცისტურია, მაგრამ არ აკლია ემოციურობა, შინაგანი დრამატიზმი და მუსიკალობა. სწორედ ამის გამო მოხდა, რომ ახალგაზრდა მეგობრის ლექსი ხალხმა სიმღერად აქცია და მას დღესაც კი მღერაინ.

ფრონტზე, ყუმბარების გრაილსა და ტყვიების წვიმში პოეტური მოღვაწეობა

არ შეუწყვეტია მამია ვარშანიძეს და საზიზლარ მტერს ერთდროულად კალმითაც ებრძოდა და ხიშტითაც. ამით აიხსნება, რომ პოეტის ლექსებმა შეიძინეს ღრმე ემოციურობა და დიდი უშუალობითაც გამოირჩეოდნენ: მ. ვარშანიძე ხომ მათ ქმნიდა ფრონტზე, პირადად განცდილია და თვალთ ნანახის საფუძველზე!

პატრიოტულ გრძნობებს უღვიძებდნენ, მტერზე გამარჯვების რწმენით მსჭვალავდნენ მკითხველებს პ. რურუას, გ. სალუქვაძის, ნ. გვაჩიშვილის და სხვ. ლექსები.

პროზასა და პოეზიას არ ჩამორჩა დრამატურგიაც. კერძოდ, ა. შერვაშიძემ დაწერა დრამა „მხედართმთავარი ბაგრატიონი“, რომელმაც მაშინვე მიიქცია ყურადღება თავისი პატრიოტული სულსკვეთებით და ხალხთა მეგობრობის იდეის აქცენტირებით. დიდი წარმატებით განახორციელა ეს პიესა სცენაზე ბათუმის სახელმწიფო თეატრმა. იგი დადგა საქართველოს სსრ ხელოვნებას დამსახურებულმა მოღვაწემ შ. ინასარიძემ. სექტაკლში ბრწყინვალე თამაშით თავი ისახელებს საქართველოს სსრ სახალხო არტისტებმა ი. კობალაძემ (ბაგრატიონი), მ. ხინკიძემ (ნაპოლეონი), ნ. თეთრაძემ (სკაერონსკაია), საქართველოს სსრ დამსახურებულმა არტისტებმა გ. ახვლედიანმა (სუვოროვი), ზ. ღლონტმა (კუტუხოვი) და სხვ. უფრო გვიან ა. შერვაშიძემ ჰეროიკული პიესა „სიმღერა შეგარდენზე“ მიუძღვნა დიდი სამამულო ომის სახელოვან გმირს ი. ჯინჭარაძეს.

გარდა ამისა, მწერალთა კავშირი მთელი ომის მანძილზე დიდ საშეფო-ორგანიზაციულ მუშაობას ეწეოდა. პოსპიტლებში, ჯარის ნაწილებში და მოსახლეობაში ხშირად იმართებოდა ლიტერატურული დილა-სადამოები და სხვ.

მიუხედავად ომის მძიმე პირობებისა, შეიძლება თამამად ითქვას, რომ ლიტერატურის განვითარება აჭარაში არ შეფერხებულა. იგი განაგრძობდა წინსვლას და ჩვენმა მხატვრული სიტყვის ოსტატებმა ღირსეულად მოიხადეს თავისი მოვალე-

ობა სამშობლოს, ხალხის, პარტიის წინა-
შე.

* * *

უკანასკნელი ოცწლეული—1947-1967 წლები აჭარაში მხატვრული სიტყვის არაჩვეულებრივი წინსვლის წლებია. ლიტერატურულ ცხოვრებაში მოხდა როგორც არადენობრივი, ისე თვისებრივი ცვლილებები. მწერლობაში შემოვიდნენ ნიჭიერი ახალგაზრდები ვ. კანდელაკი, მ. გორგილაძე, შ. როყვა, ჯ. ჯაყელი, ალ. ჩხაიძე, ქ. მკავია, ი. რურუა. უფრო გვიან მათ შეემატნენ ლ. გელაძე, ლ. სეიდიშვილი, ზ. გორგილაძე, რ. ართილაკვა, ნ. მოდებაძე, გ. სანადირაძე, გული სალუქვაძე, ალ. სამოსნია, ნ. ჩხაიძე, აგრეთვე ი. ფაღავა, გ. ლორთქიფანიძე, ი. მელია და სხვ. დღევანდელი ახალგაზრდული მწერლობის ბირთვს კი ქმნიან შ. ზოიძე, გ. ქუთათელაძე, ნ. ძირკვაძე, ც. ანთაძე და სხვ.

ჩვენს ლიტერატურულ ცხოვრებაში დიდი მოვლენა იყო აჭარის ლიტერატურისა და ხელოვნების დეკადა თბილისში 1957 წელს, რომელსაც წილად ხვდა არაჩვეულებრივი წარმატება. არავინ მოელოდა, თუ ეს დეკადა ესოდენ ბრწყინვალედ ჩაივლიდა. ყოველი ლიტერატურული საღამო, სპექტაკლი თუ კონცერტი მიმდინარეობდა ხალხით გაჭვიდილ დარბაზში. აჭარის ლიტერატორთა თხზულებები განიხილებოდა მწერალთა კავშირის ცალკეულ სექციებში და, როგორც წესი, მაღალ შეფასებას იღებდა. განხილვაში მონაწილეობდნენ გამოჩენილი ქართველი მწერლები კ. ლორთქიფანიძე, ა. ბელიაშვილი, მ. მრევალიშვილი, ს. ჭილაია, ბ. უდენტი, ი. სიხარულიძე და ბევრი სხვა. ყოველ ლიტერატურულ სხდომაზე ესწრებოდნენ კ. გამსახურდია, შ. დიდიანი, გ. ქიქოძე, დ. შენგელაია, ლ. გოთუა და სხვ. მწერალთა კავშირის გამგეობის პრეზიდიუმმა სპეციალურ სხდომაზე განიხილა აჭარის ლიტერატურისა და ხელოვნების დეკადის შედეგები, მაღალი შეფასება მისცა მას და საჭიროდ ჩასთვალა აჭარას ჰქონოდა საკუთარი ლიტერა-

ტურულ-მხატვრული ორგანო. ამ დღეებში ნილებს საფუძველზე 1958 წელს გამოვიდა

„ლიტერატურული აჭარის“ პირველი ნომერი. მიმდინარე წლის დეკემბერში, როგორც ვხედავთ, ჩვენს ჟურნალს არსებობის ათი წელი უსრულდება. ეს პირველი შემთხვევაა, რომ აჭარაში ლიტერატურულ-მხატვრულმა ორგანომ ამდენხანს იარსება და რეგულარულად გამოდის. ჩანს, ჟურნალს გააჩნია მწერალთა სათანადო აქტივი და იგი უკვე მტკიცედ დადგა ფეხზე.

აჭარის მწერალთა ძირითადი თემა თანამედროვეობაა. საგულისხმოა, რომ ისტორიულ თხზულებებშიც კი იგრძნობა თანამედროვეობა — ყველა ისტორიული ფაქტი დანახული და გაშუქებულია თანამედროვე ადამიანის თვალთახედვით. ჩვენი მწერლები თავის უშუალოდ მოვალეობად თვლიან იყენენ საბჭოთა საზოგადოების სასიცოცხლო საფუძვლის—პარტიის პოლიტიკის განუხრელად გამტარებელნი, პარტია კი მიგვიითითებს კიდევ უფრო დავუახლოოთ ლიტერატურა ხალხის ცხოვრებას, ვუჩვენოთ თანამედროვე საბჭოთა ადამიანის მდიდარი სულიერი სამყარო, აღვზარდოთ მკითხველები უმთავრესად დადებით მაგალითზე. ლიტერატურა ღრმად უნდა შეიჭრას ხალხის ცხოვრებაში და უაღრესად აქტიური მონაწილეობა მიიღოს ახალი ადამიანის აღზრდაში.

ამ ამოცანებს ემსახურება პ. ლორიას რომანები და მოთხრობები. დიდი ინტერესით შეხვდნენ მკითხველები მის ახალ რომანებს „ნაირა“, „მადარობში“, „შვილები“, „დაზვიდან დაზამდე“, „ჩემი პატარა ოჯახი“, რომლებიც მწერალმა ბოლო თხუთმეტი წლის მანძილზე გამოაქვეყნა. მოწონება ხვდა რომანსაც „საიმედო მომავალი“, რომელიც შარშან გამოვიდა. ვერ ვიტყვით, რომ ეს რომანები თანაბარი მხატვრული ღირებულების ან უნაკლონი იყვნენ, მაგრამ არ შეიძლება უარყვით, რომ მწერალი დიდი პოპულარობით სარგებლობს არა მარტო ქართველ მკითხველთა შორის. რუსულად თარგმნილმა მისმა რომანებმა „ჩაი“ და „გა-



ნთიადი ხევში“ მილიონობით რუსი მკითხველის აღტაცება დაიმსახურა, რასაც მოწმობს უამრავი წერილი, რომლებსაც მწერალი იღებს მოსკოვიდან, ლენინგრადიდან, ტამბოვიდან, ხარკოვიდან, ფრუნზედან და ა. შ. ბევრი მკითხველი ჰყავს პ. ლორიას მოთხრობებს, რომლებიც „ლიტერატურულ აპარაში“ იბეჭდებიან.

„მორევი“, „პროვინციელი“, „მახინჯაურელი ჭაბუკი“ — აი რა ახალი პროზაული თხზულებანი დაწერა და გამოაქვეყნა ა. შერვაშიძემ ბოლო წლებში. მწერალმა უკვე დაამთავრა და რუსულ ენაზე მოსკოვში მალე გამოვა ისტორიული-ბიოგრაფიული რომანი „ბაგრატიონი“. ნაწყვეტები ამ რომანიდან დაიბეჭდა „ლიტერატურულ აპარაში“ და მას კარგად იცნობს ჩვენი მკითხველი. ამავე ყურნალში დაიბეჭდა ა. შერვაშიძის იუმორისტული მოთხრობები „უკუღმართი.“ „კოლო“ და სხვები, რომლებიც რუსულ ენაზეც ითარგმნა.

დიდი ნაყოფიერებით გამოირჩეოდა პროზაიკოსი კ. რუსიძე. აპარაში მოღვაწეობის დროს მან ზედიზედ გამოსცა რომანები „მოუსვენარი ადამიანები“, „ბეწვის ხიღბე“, „ნახობროლა“, „ჭიდილი მთებში“, აგრეთვე ბევრი მოთხრობა. მათგან განსაკუთრებით საგულისხმოა „მოუსვენარი ადამიანები“, რომელიც ეხება პარტიულ-ორგანიზაციული მუშაობის ცალკეულ პრობლემებს პარტიის მეოცე ყრილობის გადაწყვეტილებათა შუქზე. ცალკეული ნაკლოვანებების მიუხედავად, ინტერესით იკითხება კ. რუსიძის „ჭიდილი მთებში“, რომელიც აპარის დღევანდლობას ასახავს.

პრემიებით აღინიშნა ალ. ჩხაიძის მოთხრობები „მეგობრობა“ და „როცა ბავშვობა მთავრდება“. მასვე ეკუთვნის ვრცელი მოთხრობა „ზღვისპირა ქალაქში“ და მხატვრულ-ბიოგრაფიული ნარკვევა „ზღვის შვილი“, რომელსაც საფუძვლად უდევს სახელოვანი კაპიტანის ელიზბარ გოგიტიძის ცხოვრება და მოღვაწეობა. მალე „ნაკადული“ გამოიცემს ალ. ჩხაიძის ახალ წიგნს ოთხ

გმირ მესღვეურ ქალზე, რომელიც დიდი სამამულო ომის წლებში ლეს სამშობლო.

ახალი მოთხრობებითა და რომანებით გაამდიდრეს ჩვენი ლიტერატურა პოეტებმა ფრ. ხალვაშმა, ჯ. ჯაყელმა, შ. როყვამ, პროზაიკოსებმა ი. რურუამ, ალ. სამსონიამ, ნ. მოდებაემ, ნ. ჩხაიძემ, გ. სანაღირაძემ და სხვ. აღსანიშნავია ი. ფაღავას გაბედული ცდა, მან პირველმა სცადა აესახა აპარის შორეული წარსული, აპარელთა თავდადებული ბრძოლა ქართველობის შენარჩუნებისა და დედა-საქართველოსთან კვლავ შეერთებისათვის. სასიხარულოა, რომ ი. ფაღავას წარმატება ხვდა. მისი რომანები „ჩაუჭრობელი კერა“ და „ქედუხრელი“ დიდად პოპულარული მთელ საქართველოში. მწერალს ხშირად იწვევენ საქართველოს სხვადასხვა ქალაქში და აწყობენ მისი წიგნების განხილვას. ერთი ასეთი განხილვა ამას წინათაც გაიმართა ქუთაისში.

დიდი დანაკლისი განიცადა ჩვენმა პოეზიამ მსოფლიო პოეტის პ. რურუსის, განსაკუთრებით კი ლ. გელაძის მოულოდნელი გარდაცვალებით. ლ. გელაძე ფრიალ ნიჭიერი შემოქმედი და საუკეთესო მოქალაქე იყო. მან დაწერა არაერთი შესანიშნავი ლექსი და ჩვენ მისგან ბევრს, ძალიან ბევრს მოველოდით, მაგრამ უბედურმა შემთხვევამ არ დაცალა პოეტს გაფურჩქნა თავისი ნიჭი.

მიუხედავად ხანდაზმულობისა, ნ. მაღალაშვილი კვლავ განაგრძობს ნაყოფიერ შემოქმედებითს მოღვაწეობას. მისი ბოლოდროინდელი ლექსები გვხიბლავს ცხოვრების დიდი გამოცდილებით, მოხუცების სიბრძნით. მან სახელი მოიხვეჭა თავისი საბავშვო ლექსებითაც. პოეტის ნორჩმა მკითხველებმა ზეპირად იციან მისი ბევრი გულშიჩამწვდომი ლექსი და მას თავის უახლოეს მეგობრად თვლიან.

ქართველმა საზოგადოებრიობამ ძლიერ გულთბილად აღნიშნა მამია ვარშანიძის დაბადების ორმოცდაათი წლისთავი და



ნიჭიერ პოეტს ახალი შემოქმედებითი წარმატებანი უსურვა. მ. ვარშანიძე ლირიკოსია, მისი ლირიკის უმთავრესი თემა კი სამშობლოს სიყვარულია. სულ ახლახან გამოვიდა მისი ახალი ლექსების კრებული, რომელსაც საყოველთაო მოწონება ხვდა. მ. ვარშანიძე პირველი პოეტი იყო, რომელმაც მხატვრულ ლიტერატურაში დაამკვიდრა აჭარაში ეროვნულ - განმათავისუფლებელი მოძრაობის ერთ - ერთი სახელოვანი მეთაური სელიმ ხიმშიაშვილი. მთავრად პოემა „ხიხინის არწივები“ ასახავს იმ ბრძოლის ეპიზოდებს, რომელსაც აჭარალები ეწეოდნენ ს. ხიმშიაშვილის მეთაურობით თურქ დამპყრობთა ბატონობისაგან განთავისუფლებისათვის. პოემას მაღალი შეფასება მისცეს მკითხველებმა და ლიტერატურულმა კრიტიკამ, მათ შორის აწ გამსვენებულმა მსცოვანმა კრიტიკოსმა ი. ვართავამ.

კრებულიდან კრებულამდე იზრდება ლირიკოსი პოეტი ნანა გვარამიშვილი. მისი მთავარი თემაა აჭარელი ქალი, მისი ყოფაცხოვრება, საქართველოს ბუნება და სიყვარული. კარგი ლექსები დაწერა პოეტმა ქალმა მშვიდობაზე, მშვიდობისათვის ბრძოლაზე. დიდი წარმატებით მუშაობს ნ. გვარამიშვილი საბავშვო პოეზიაშიც. ფართოდ ცნობილია მისი საბავშვო პოემები „თითისტოლა“, „მელია და წიწილა“, „ორი კივი“ და სხვ. განსაკუთრებით მნიშვნელოვანია პოემა „დედა-ენა“, რომელიც მთელი ქართული საბავშვო პოეზიის სერიოზულ შენაძენად მიიჩნის კრიტიკოსებმა ვ. ზამბახიძემ, ვ. ჯიბუტმა, პოეტმა მ. მრევლიშვილმა და სხვ.

ოცამდე წიგნის ავტორია ფრ. ხალვაში. მას, როგორც ერთ-ერთ ნიჭიერ ქართველ პოეტს, კარგად იცნობს ჩვენი მკითხველი. დიდი პოპულარობა მოიპოვა მთელ საქართველოში მისმა ლირიკულმა ლექსებმა „მე არ ვიქნები შენი სტუმარი“, „გენაცვალე“, „სიტყვა მთავარი“, „ომი იქნება?“ და სხვ. წელს „საბჭოთა საქართველომ“ გამოსცა მისი რჩეული ნაწარმოებების კრებული, რომელშიც

შევიდა ბოლო ათი წლის მანძილზე მოქვეყნებული პოეტის ლექსები და პოემები. ფრ. ხალვაშის ლექსები იბეჭდება „პრავდაში“, გამოდის ცალკე კრებულებად რუსულ ენაზე.

ცნობილი ლირიკოსია გ. სალუქვაძე, რომლის ბევრ ლექსზე ქართველმა კომპოზიტორებმა რ. ლალიძემ, ა. ფარცხალაძემ, ბ. კვერნაძემ და სხვ. შექმნეს ფრიალ პოპულარული სიმღერები. მან სახელი გაითქვა აგრეთვე რუსული პოეზიის ცალკეული ნიმუშების შესანიშნავი თარგმანებით. განსაკუთრებით კარგად თარგმნის იგი რუსი პოეტების ს. ესენინა და ვეკ. ვეტუშინკოს ლექსებს.

ნაყოფიერად მოღვაწეობენ აგრეთვე პოეტები ლ. სელიძეშვილი, ჯ. ჯაყელი, ჯ. ქათამაძე, შ. როყვა, ქ. მჭავია, ზ. გორგილაძე, ი. მელია, რ. ართილაყვა, ბ. მეტრეველი. ახალგაზრდა პოეტებიდან დაწინაურდნენ შ. ზოიძე და ც. ანთაძე.

შეუწელებელ აღმავლობას განიცდის ჩვენი დრამატურგა.

დრამატურგმა ა. შერვაშიძემ უკანასკნელ წლებში დაწერა რამდენიმე პიესა, რომელთაგან პირველ რიგში აღსანიშნავია პეროიკული დრამა „ვივა-კუბა!“ („სანტიაგოელი ქალიშვილი“). ეს პიესა პირველად დადგა სევასტოპოლის შავი ზღვის ფლოტის თეატრმა, იმ დღეებში, როცა კარბის ზღვის რაიონში ფრიალ დაძაბული ვითარება შეიქმნა — 1962 წელს, „ვივა კუბა!“ სევასტოპოლელთა დადგმით გადასცა ცენტრალურმა ტელევიზიამ და იგი მილიონობით მაყურებელმა ნახა. პიესას და სექტაკლს მაღალი შეფასება მისცა მოსკოვის პრესამ, კერძოდ, გაზეთებმა „სოვეტსკაია კულტურა“, „კულტურა ი. ჟიზნ“ და სხვ.

რამდენიმე საკურადღებო კომედია დაწერა ვ. კანდელაკმა ბათუმში მოღვაწეობის დროს. დიდი წარმატებით იდგმებოდა მისი „ამაღლებული სოფელი“. მაგრამ დრამატურგის ყველაზე თვალსაჩინო ნამუშევარია „მაია წყნეთელი“. ეს პიესა წლების მანძილზე მიდიოდა მარჯანიშვილის სახელობის თეატრში და მუდამ უამრავი მაყურებელი ჰყავდა.



ბოლო წლებში დიდი აღმავლობით მუშაობენ დრამატურგიის რთულ ჟანრში ფრ. ხალვაში, ალ. სამსონია, შ. როყვა, ალ. ჩხაიძე. ამ უკანასკნელის პიესამ პრემია დაიმსახურა ამას წინათ გამართულ რესპუბლიკურ კონკურსში, ხოლო ალ. სამსონიას კომედია — დიპლომი. ბათუმის თეატრში დიდი წარმატებით მიდიოდა ფრ. ხალვაშის „ვაზის ტირილი“, ამჟამად კი ალ. სამსონიას „ჩემი შვილი სიმონი“, „ზღვა და სიყვარული“, შ. როყვას „დედა“. მკურნებელმა უკვე ნახა ალ. ჩხაიძის ახალი პიესა „სიბრძნე სიკვდილისა“ კოლა ლომთათიძის მოტივების მიხედვით. აღსანიშნავია, რომ ბათუმელ დრამატურგთა პიესები საქართველოს ბევრ თეატრში იდგმება.

ცალკე უნდა აღინიშნოს კინოდრამატურგ ს. ჟღენტის წარმატება. მისი სცენარით შექმნილმა კინოფილმმა „ჯარისკაცის მამა“ მსოფლიო მოიარა. მას 108 ქვეყნის კინოთეატრებში უჩვენებენ.

განუწყვეტლივ ვითარდებოდა ლიტერატურული კრიტიკა და ლიტერატურის-

მცოდნეობა. ალ. ჩაველიაშვილმა, ნ. დუმბაძემ, დ. ნაცვალაძემ, პ. ჯორბენაძემ, ნაცვლიაშვილმა, ლ. აბაშიძემ, აგრეთვე დ. ჭანტურიაშვილმა და ი. რურუამ, რომლებიც შემდეგ თბილისში გადავიდნენ სამუშაოდ, ბევრი საინტერესო სტატია და წიგნი გამოაქვეყნეს.

* * *

ასეთია გზა, რომელიც განვლო მხატვრულმა ლიტერატურამ აჭარაში. ასეთია მიღწევები, რომლითაც ვხვდებით დიდი ოქტომბრის სახელოვან ორმოცდაათი წლისთავს. მხოლოდ პარტიისა და ხელისუფლების ყოველდღიური მზრუნველობითა და ხელის შეწყობით იყო შესაძლებელი ასეთი ნახტომი იმ კუთხეში, სადაც ამ ნახევარი საუკუნის წინათ წერაკითხვის მცოდნეთა რიცხვი თითებზე ჩამოითვლებოდა.

ლიტერატურისა და ხელოვნების სწრაფი აღმავლობა აჭარაში ერთი მკაფიო მაგალითია იმისა, თუ რა მისცა საბჭოთა ხელისუფლებამ ჩვენს ხალხს.



ინა ლეინა

სინამდვილის რომანტიკის მისაღვრობა

ხელოვნება კარგის გაგების
ერთ-ერთი საშუალებაა.

ლ. ტოლსტოი.

საქართველო ძველთაგანვე იზიდავდა რუს მწერლებსა და პოეტებს. ყოველი მათგანი, ამ საკვირველ ქვეყანაში რომ მოხვედებოდა, შემოქმედებითს აღტკინებას განიცდიდა. ეს კავკასიის მომაჯადოებელი ბუნების, ხალხის „რომანტიკული სინაზის“ წყალობა იყო. ასეთი გავლენა აღუნიშნავს რუსული სიტყვის ყველა ოსტატს. შემთხვევითი როდია, რომ სწორედ ჩვენში, საქართველოში, ა. გრიბოედოვი წარმატებით მუშაობს თავის უკვდავ კომედიაზე „ვაი ჭკუისაგან“; კავკასიაში მოგზაურობის უშუალო შთაბეჭდილებით ქმნის მ. ლერმონტოვი თავის საუკეთესო პოემებს „მწირსა“ და „დემონს“; თბილისში ჰკიდებს კალამს ხელს ლ. ტოლსტოი — აქ შეუდგა თავისი პირველი ნაწარმოების „ბავშვობის“ წერას; პოეტურ საშობლოს უწოდებდა საქართველოს საბჭოთა ლიტერატურის ფუძემდებელი მაქსიმ გორკიც.

საბჭოთა მწერლებისათვის საქართველო მართოდენ ლამაზი ბუნებისა და პოეტური ლეგენდების ქვეყანა როდია. მათს ყურადღებას იპყრობდა ახალგაზრ-

და საქართველოს შრომითი ცხოვრება. აქ ისინი უხვად პოულობდნენ სოციალისტური მშენებლობის, ცხოვრების გარდაქმნის, ადამიანთა ახალი ურთიერთობის ჩამოყალიბების მასალებს.

რუსი საბჭოთა მწერლებიდან ჩვენს რესპუბლიკას ერთ-ერთი პირველი ეწვივნენ ი. ბაბელი და კ. პაუსტოვსკი. ისინი აქ მოცილილ მოგზაურებად როდი ჩამოსულან.

ი. ბაბელმა თანამშრომლობა დაიწყო გაზეთ „ზარია ვოსტოკაში“ და 1922 წლის ივნისიდან დეკემბრამდე საქართველოსადმი მიძღვნილი რამდენიმე ნარკვევი გამოაქვეყნა.

კ. პაუსტოვსკი 1924 წელს რედაქტორობდა ბათუმის გაზეთ „მაიას“ და თანამშრომლობდა გაზეთებში „ტრუდოვოი ბატუმ“ და „გუდოკ ზაკავაზია“.

როგორც ერთი, ისე მეორე მწერლის შემოქმედებას კეთილნაყოფიერი კვალი დაჩნია საქართველოში ყოფნამ.

კ. პაუსტოვსკი საბჭოთა ლიტერატურის ისტორიაში შევიდა როგორც სილამაზის მომღერალი და რომანტიკის ერთ-



გული „რაინდი“. მისი, ხელოვანის წარმოდგენა „მშვენიერზე“ ერთბაშად როდი ჩამოყალიბებულა. მწერლის პირველ ნაწარმოებებს ახასიათებს ოცნებამორღული მგზნებარება. ნათელი, უჩვეულო ცხოვრებისადმი მისწრაფება, პოეტური სიყვარულის სევდა. ეს თქმის, კერძოდ, მის მოთხრობაზე „რომანტიკოსები“, რომელზეც კ. პაუსტოვსკი 1916 წლიდან 1923 წლამდე მუშაობდა.

თავდაპირველად წარმოდგენა „მშვენიერზე“ უპირატესად ეგზოტიკურ უჩვეულობას უკავშირდებოდა. ეს აიხსნებოდა ცხოვრებისეული გამოცდილების უქონლობით. მას წარმოსახვა ცვლიდა.

წარმოსახვა დიდძალ შემოქმედებით მასალას აძლევს ყოველ ხელოვანს. მაგრამ ხელოვნების ნამდვილი ნაწარმოების შესაქმნელად მხოლოდ წარმოსახვა არ კმარა. საჭიროა სინამდვილის საფუძვლიანი ცოდნა, ფართო ცხოვრებისეული დიაპაზონი, ფაქტების შეკვრებისა და განზოგადების უნარი. მხოლოდ ასეთ ნიადაგზე შეიძლება შეიქმნას ხელოვნების ჭეშმარიტი ნაწარმოები.

კ. პაუსტოვსკიმ საჭირო ცხოვრებისეული გამოცდილება შეიძინა, როცა თანამშრომლობა დაიწყო ოდესის გაზეთ „მორიაკში“. აქ რედაქციის დავალებით ხშირად უწევდა მოგზაურობა როგორც კორესპონდენტს. სევასტოპოლი, იალტა, ფეოდოსია, ნოვოროსისკი, სოხუმი, ბათუმი, თბილისი—ასეთი იყო მისი მარშრუტი. გაზეთში მუშაობამ დაუახლოვა მწერალი ცხოვრებას, ხელი შეუწყო მისი პოლიტიკური და მოქალაქეობრივი შეგნების ამაღლებას.

„მორიაკის“ კორესპონდენტად ყოფნისას მწერალი ხანგრძლივად დარჩა ბათუმში და აქ გაზეთ „მაიაკის“ თანამშრომელთა შორის მისი ყურადღება მიიპყრო გრავიორმა, რომელმაც თავისი ცხოვრების ამბავი მოუთხრო.

ამ ამბავმა შესძრა კ. პაუსტოვსკი და 1924 წლის ზამთარში აქვე დაწერა მოთხრობა „ეტიკეტები კოლონიური საქონლისათვის“ — ადრეული პერიოდის ერთ-ერთი საუკეთესო ნაწარმოები. მო-

თხრობაში წინა პლანზე წამოწეული წარმოდგენა „მშვენიერზე“ და ემირდება თემას „ოცნების როლი ადამიანის ცხოვრებაში“. მთავარი გმირია გრავიორი, რომელიც მწერალს გამოყვანილი ჰყავს იოსებ შირინის სახელით.

ამ გმირის ბავშვობამ სულშემსთავება კლევციში განვლო. თითქოს დაბადებისთანავე განისაზღვრა მისი ცხოვრების წრე. საპნისა და საბაყლოს სულშემსთავი სუნით გაუღვნილი ლუქანი, ქანცის გამწყვეტი ბრძოლა არსებობისათვის. ასე ცხოვრობდნენ თაობიდან თაობამდე მისი წინაპრები, ასეთივე ცხოვრება ეწერა იოსებს, პატარა დაბის ებრაელს, ბავშვობიდანვე დაბეჩავებულს „შე ურისას“ შეძახილებით. ცხოვრების საყრდენების ურღვეველობა შიფრინის ნაამბობაში გადმოცემულია ერთი ფრიად მეტყველი დეტალით.

დაბას დილიდანვე აღვიძებდა იოსკამეტლის ეკიპაჟზე გამობმული ვედრო, იგი თითქოს თავისებური ნაბათი იყო. „იოსკა რომ მოკვდა, ვედრო სხვა ეტლს გამოაბეს. დაბას არ შეეძლო უვედროოდ ცხოვრება. ვედრო რახარახებდა და ისინი გრძნობდნენ თავისი არსებობის აზრს, გრძნობდნენ, რომ ზეცაში არის ღმერთი, ხოლო დედამიწაზე—„ურყევი წესრიგი“, რომლის დარღვევას ვერასოდეს ვერავინ ვერ გაბედავდა.

და ანაზღად ბიჭმა მამისაგან შეიტყო, რომ კლევციის გარდა, არსებობს სოცარი ქვეყანა ინდოეთი, ხოლო კონსერვის ეტიკეტზე იხილა „ლილასავით“ სქელი ზეცა და ზღვა, რომელმაც წარმოსახვა გაუღიზიანა.

რამდენად საგულისხმოა, რომ ეს ეტიკეტიანი ქილა დედამ გაყიდა, ბავშვს წაერთვა შესაძლებლობა სურათზე მაინც ეხილა თუნდაც ერთი ციკქნა ნაჭერი სხვა სამყაროსი.

ბავშვობის შთაბეჭდილებანი სიღრმით გამოირჩევა და ამიტომ განსაკუთრებულ ვავლენას ახდენს ხასიათის ჩამოყალიბებაზე. ასე გაუღვიძა ბიჭს მოგზაურობის წყურვილი მამის ნაამბობმა ინდოეთზე და ნახულმა სურათმა.



ეს ვნება თავისებური პროტესტი იყო „წვიმებითა და ცხენის ქაფიანი შარდით წალეკილი ვიწრო ებრაული დაბების წინააღმდეგ, იოსკას ეტლზე გამობმული თუნუქის ვედროს გულის გამაწყალებელი რახახის წინააღმდეგ“.

და რაც უფრო სულშემხუთავი იყო გარემო, მით უფრო ფერადოვანი იყო ყმაწვილის წარმოდგენა სხვა ცხოვრებაზე, სინათლით, მოძრაობით, სილამაზით აღსავსე ცხოვრებაზე.

წარმოდგენა „მშვენიერზე“ მცხუნვარე მზით განათებული შორეული ქვეყნების კონკრეტულ სახეს იძენდა. მაგრამ შიფრინი, რომელიც ისწრაფის თავი დააღწიოს დამყაყებულ ყოფას, საკუთარი წარმოსახვის ტყვეობაში ექცევა. ეს წარმოსახვა არსებობდა მიჯნავს მას ცხოვრებისაგან, საშუალებას არ აძლევს დაინახოს დედამიწის სფერო.

შიფრინის პროტესტი უხამსი ზინამდვილის წინააღმდეგ პასიური იყო. ამან ჩამოაშორა იგი დიდ ცხოვრებას, რომელიც საღდაც ახლოს, გვერდით დუღდა, და ომების, რევოლუციების სახით გაიბრინა. ფანტიკურ გატაცებას ზედზედ მოჰყვა უბედურება: ჯერ ცოლის, შემდეგ ერთადერთი ქალიშვილის სიკვდილი, ბოლოს დადილობა და სულიერი სიცარიელე.

კრიტიკულ ლიტერატურაში შეიქმნა აზრი, რომ კ. პაუსტოვსკის ეს გმირი პასიური ადამიანია, რომელსაც არ აღმოაჩნდა უნარი ებრძოლა თავისი ოცნების განსახორციელებლად. ჩვენ კი ვფიქრობთ, შიფრინს პასიურობა არ უნდა დაეწამოთ. იგი ერთ წუთსაც არ ყოფილა უქმად, ცდილობდა ხორცი შეესხა თავისი განზრახვებისათვის, ქანცს იწყვეტდა მუშაობით და ისე აგროვებდა გზის ფულს. შიფრინი დიდი გულმოდგინებით სწავლობდა საზღვაო რუკებს, ბოლოს კი დალეული, უსახური სპორტს მიეტანა, ეჩვეოდა სიცივეს, მკაცრ ცხოვრებას. ყოველივე ამით იგი მკვეთრად გამოირჩევა მანილოვისებური მეოცნებებისაგან.

მოთხრობის მამხილებელი პათოსი კავშირებულია იმ იდეალის შინაარსთან, რომელსაც შიფრინი ამკვიდრებს, და არა ამ იდეალისთვის ბრძოლის ხაზთან. შიფრინის წარმოდგენას „მშვენიერზე“ ახასიათებს უკიდურესი ბუნდოვანება და ჰკვეთად გამოხატული ინდივიდუალიზმი. „ყოველი დღე, — ამბობს შიფრინი, — მიახლოვებდა იმას, რასაც ველოდი, — თეორ შუაღლებს, მწვანე ხმელთაშუა წყალს, ხომალდების მაგარ გემბანებს“.

ამ ოცნებას ფაქტიურად შინაარსი არა აქვს. გმირი მხოლოდ ფორმის მოჩვენებლის სილამაზეს გაუტაცია. შიფრინმა არ შეიწყნარა კლევციის დახვედრული ცხოვრება, დაემალა მას, თავის თავში ჩაიკეტა. მისთვის აღარ არსებობდნენ ადამიანები, ყველაზე მახლობელი და ერთგულნიც კი. მან თავის ოცნებას შესწირა ცოლი და ქალიშვილი. მაგრამ ყოველგვარი მსხვერპლი გამართლებულია მხოლოდ მაშინ, თუ იგი დიად, მაღალ მიზნებს ეწირება.

ასე გამოვლინდა კ. პაუსტოვსკის ერთ-ერთ აღრინდელ ნაწარმოებში იდეალის შეფასების კრიტერიუმი — ადამიანების სამსახური, აქტიური პუმანიზმი.

ავტორი გმობს შიფრინს, თავის ვიწრო სამყაროში ჩაეტილ კაცს, რომელსაც არაფერი არ აკავშირებს ადამიანებთან. ავტორის პოზიციას გამოხატავს მთხრობელი. იმ დროს, როცა გრავიორს უცხო ქვეყნების წარმოსახული სილამაზე იტაცებდა, მთხრობელი სინამდვილის სილამაზით ტკბება:

„გარეთ გამოვედი და მძაფრმა ქარმა სახეში მომაფრქვია მშვენიერი, მობობოქვე ზღვის სურნელება“.

იგი აღსავსეა ენერგიით, მას უხმობს მჩქეფარე ცხოვრება, და იგი მზად არის მის შესახვედრად.

განსაკუთრებით დიდ აზრობრივ დატვირთვას შეიცავს მოთხრობის თავი „შემოდგომის სიმქრქალე“. მასში ვადმოცემულია მთხრობელის სასინარულო-პოეტური აღქმა ცხოვრებისა. მისთვის უცხო როდია ოცნება „ოკანზე, ვერცხ-



ლისფერ გაზაფხულზე, უცხო და უდაბური ნაპირების ყვითელ ქვიშაზე“. მაგრამ ამავე დროს ფაქიზად გრძნობს ბათუმის თავზე მოქანავე ლურჯი ჰაერის სილამაზეს, პოეტურად აღიქვამს შემოდგომას.

მაგრამ მოხრობელის იდეალი კონკრეტულად არ არის გამოხატული მოთხრობაში. მკითხველი მხოლოდ ეუბნით გრძნობს, რომ ეს გმირი ისწრაფის აქტიურად იმოქმედოს, რომ მისი ბათუმიდან გამგზავრება გამოწვეულია სურვილით — გადაეშვას რევოლუციური ეპოქის მოვლენათა ორომტრიალში. ახალი წარმოდგენა იდეალისა და მისი მიღწევის გზებზე მხატვრულად შეისხამს ხორცს მწერლის უფრო მოგვიანო ნაწარმოებში.

მაგრამ უკვე ოციანი წლების დამდეგს შეინიშნება კავშირი „მშვენიერზე“ წარმოდგენასა და სინამდვილისადმი აქტიურ დამოკიდებულებას შორის. ამ მხრივ მოთხრობა „ეტიკეტები კოლონიური საქონლისათვის“ შეიძლება საპროგრამო ნაწარმოებად ჩაითვალოს.

დაუცბრომლად იბრძვის რა მშვენიერია და ამაღლებული ოცნებისათვის, მწერალი, რომელმაც ისაღის იყო დაიწყო თავისი შემოქმედებითი გზა, ამკვიდრებს პრინციპს: მშვენიერია თავად ცხოვრება, მშვენიერია იმალება ჩვენს ირგვლივ, აღონდ, მოჩვენებითი სილამაზით გატაცებულად ადამიანო, გვერდი არ აუქციო მას.

შემოქმედებისათვის ძვირფასი ფაქტები იპოვა საქართველოში ოციანი წლების პირველ ნახევარში მეორე საბჭოთა მწერალმაც ი. ბაბელმა. 1932 წელს თავის „შემოქმედებითი ლაბორატორიის“ შესახებ რომ ლაპარაკობდა, ი. ბაბელმა შემთხვევით როდი გაიხსენა 1922 წელი, თბილისის ვაზეთ „ზარია ვოსტოკაში“ თანამშრომლობის დრო. „რეპორტაჟზე მუშაობამ, — აღნიშნა მწერალმა, — არაჩვეულებრივად ბევრი რამ მომცა მასალის მხრივ და შემოქმედებისათვის ძვირფას უამრავს ფაქტს გადაამყარა“.

ამ მუშაობის წყალობით მწერალმა რეალურად შეიგრძინო რევოლუციური რაქმანათა შემოქმედებითი ხასიათი. მან მოინახულა აჭარისა და აფხაზეთის სოფლები, და ყოველივე ნახულზე მოგვიცხრო თავის ნარკვევ-ნოველებში, რომლებიც აღბეჭდილია ბაბელის სტილის შემოქმედებითი განუყოფლობით.

ი. ბაბელი მიეკუთვნება პირველ საბჭოთა მწერალ-რომანტიკოსებს.

გარე სამყარო მის ნაწარმოებებში ჩვეულებრივ გმირთა გრძნობების ასახვის მეშვეობით არის ნაჩვენები. ამიტომ მათში ჭარბობს ლირიკულ-ემოციური თხრობა. ლირიკულ-რომანტიკული ნაკადი გასდევს მწერლის „ქართულ“ ნარკვევებსაც. ბათუმში ყოფნისას ბაბელი მოწამე იყო რევოლუციის დროს საზღვარგარეთ ქურდულად გატაცებული გემების დაბრუნებისა. ახალმა „პატრონებმა“ იქ გეზები ხელახლა შედებეს, სახელი გამოუცვალეს, მაგრამ ეს ფაქტი არ გაუვიდათ და აჭარის სახალხო სასამართლოს დადგენილებით ისინი დაუბრუნეს საბჭოთა სახელმწიფოს.

ეს ამბავი დაედო საფუძვლად ნარკვევს „კამო და შაუმიანი“, რომელიც გამსჭვალულია გემების დაბრუნებით გამოწვეული სიხარულით, ასე რომ ესაჭიროებოდა ჩვენს ქვეყანას, განსაკუთრებით იმ წლებში.

გემები საშობლოს დაუბრუნეს ახალგაზრდა რიგითმა მშრომლებმა, რომელთაც გამოიტანეს განაჩენი და აღასრულეს იგი. ამ გაბედულებამ აღაფრთოვანა ი. ბაბელი, ვინაიდან კერძო შემთხვევაში მან მშრომელთა — თავისი ქვეყნის ნამდვილ ბატონ-პატრონთა ნების გამოხატულება დაინახა.

აქ ყოველი დეტალის აღწერაში იგრძნობა სისიხარულო განწყობილება. განსაკუთრებით დღესასწაულებრივი იყრი აქეთ თოვლივით ქათქათა გემბანიან და ანძებიან გემებს, „რომლებიც მწყობრად და მძლავრი ხაზით კვეთენ ჰორიზონტს“.



ი. ბაბელმა დაათვალიერა აქარის ჩაის პლანტაციები და ნახაბი თუ გაგონილი აღწერა ნარკვევში „ჩაქვეში“. აქ იგრძნობა დაძაბული შრომა ახალი, სოციალისტური მეურნეობის შესაქმნელად, ცხად-ლივ ჩანს პირველი წარმატებები — ჩაისა და ციტრუსოვანთა პლანტაციების დიდი შემოსავალი.

მწერალი აღაფრთოვანა არა მხოლოდ რესპუბლიკის სამეურნეო წარმატებებმა, იგი, როგორც სილამაზის ტრფიალი, მოაჯადოვა აქარის ბუნებამ და ეს მხატვრულად აისახა ამ ნარკვევში. „ქამერფსები და ძვირფასი პალმები უძრავ არშიად შემოვლებიან სათამაშო გზებს. ევკალიპტების ვერცხლისფერი მტვრიანი ფოთლები კვეთენ შემწიფებულ ცის მინდვრებს — და მთელი ეს ხუჭუჭა, შეკრეპილი მშვენიერება ათრობს სულს, იაპონური აბრეშუმისა და აფერადებული მარაოების უფაქიზესი ხაზებით“.

ბუნების მშვენიერებით გატაცება ხელს არ უშლიდა მწერალს შეხებოდა რესპუბლიკის სამეურნეო ცხოვრების პრაქტიკულ საკითხებს. ასე, მაგალითად, ი. ბაბელმა ნარკვევში „თამბაქო“ მძაფრად გააკრიტიკა აფხაზეთის თამბაქოს პლანტაციებში შექმნილი მდგომარეობა.

კრიტიკოსები დიდხანს ფიქრობდნენ, რომ ბაბელი თავის შემოქმედებაში ისწრაფის დაძლიოს სინამდვილე და ეს მისწრაფება წარმოშობს ცხოვრების რომანტიკულად შეფერადებას.

ძნელია დაეთანხმო ასეთ შეხედულებას. ი. ბაბელს უყვარს ცხოვრება და სრულიად არ ცდილობს გაექცეს მას. ასე, მაგალითად, ნარკვევი „გაგრა“ რომანტიკულად აღზევებული თხრობაა მიყრუებულ პატარა ქალაქზე, „რომელიც წვიმიითა და ტლაპოთი გაპრცენილ ლამაზს ქალსა ჰგავს, ან კიდევ ვოლგის დამშუულ სოფლებში საგასტროლოდ ჩამოსულ ესპანელ მოცეკვავე ქალთა გუნდს“. ზე-

აწეული ეგზოტიკური აღწერა აქ აღწერილებს რღვევის შთაბეჭდილებას, რომელიც უნდა დაიძლიოს. სწორედ ამ მიზანს ისახავს ბაბელის ნარკვევი. იგი მოგვაგონებს, რომ „უგუფუნრთა“ ამ წლებში დაცილი სასახლები მილიონობით მშრომელს უნდა ემსახურებოდეს.

ბაბელის თითქმის ყველა მხატვრულ ნაწარმოებში თხრობა წარმოებს მთხრობელის სახელით, რომელიც ნაწარმოების გმირი ხდება. ამ გმირის აღქმის პრიზმით წარმოებს სინამდვილის „გადაღება“. ასეთსავე გმირ-მთხრობელს ვხვდებით ი. ბაბელის ნარკვევებშიც.

ავტორი-მთხრობელი უშუალოდ მონაწილეობს მოვლენებში, გვიჩვენებს თავის დამოკიდებულებასა და გრძნობებს. ერთ-ერთ ნარკვევში ჩვენ ვხედავთ ოდნავ დამცინავ ლირიკოსს, მეორეში — ხუმარას, მწვევე ოხუნჯობის მოყვარულს, ან აღფრთოვანებულ რომანტიკოსს, ან კიდევ მრისხანე კრიტიკოსს, მაგრამ ყველა ნარკვევში გაისმის მწერალი-მოქალაქის მგზნებარე ხმა. ჩვენ ვგრძნობთ მის სიყვარულსა და მღელვარებას, მის სწრაფვას ცხოვრებისადმი.

ი. ბაბელის „ქართულ“ ნარკვევებს აერთიანებს მთავარი თემა, რომელიც თითოეულ მათგანში თავისებურად გადატყდება ხოლმე — ეს არის ახალგაზრდა რესპუბლიკის მშენებლობის თემა — მშენებლობისა ყველა ფრონტზე.


თვითონ მშენებლობის პროცესი არ არის ასახული, და მაინც ეს მშვენიერი მინიატურები გვაგრძნობინებენ დაძაბულობასა და დიად გარდაქმნებს. და რა დაბრკოლებებსაც არ უნდა ხვდებოდნენ აღამიანები თავიანთ გზაზე, — მათი მიზანი მშვენიერია და მომავალიც მათია. ასეთია ი. ბაბელის ნარკვევების ლაიტ-მოტივი.

ადამიანები, მათი შრომა და ბუნება ამ ნარკვევებში უჩვეულოდ ლამაზ შენაღ-ნობად წარმოგვიდგება, ისინი აღბეჭდი-ლია მწერლის ნიჭიერებით, მწერლისა, რომელსაც დამსახურებულად უწოდებენ სიტყვათა „მომთვინიერებელს“.

რა შორსაც არ უნდა იყოს შინაარსითა და ფორმით ი. ბაბელის მხატვრული ნა-რკვევები კ. პაუსტოვსკის ნოველისაგან „ეტიკეტები კოლონიური საქონლისათ-ვის“, მათ აახლოებს, აერთიანებს ორივე ავტორის მისწრაფება — ჩ ა ს წ ვ დ ნ ე ნ

ცხოვრების სილამაზეს. ეს საფუძველს გვიქმნის ვთქვათ, რომ მათი სახით ისინი მიაღწენ სინამდვილის რომანტიკას.

სასიამოვნოა, რომ კ. პაუსტოვსკისა და ი. ბაბელის შემოქმედებისათვის ესოდენ მნიშვნელოვანი პროცესი საქართველოში დაიწყო, და უსაფუძვლო როდია ვა-რაუდი, რომ კავკასიის განუმეორებლად ლამაზმა ბუნებამ, მისი ხალხის დაძაბუ-ლმა შემოქმედებითმა შრომამ ახალი ცხოვრების ასაშენებლად ერთგვარად განსაზღვრა ეს მნიშვნელოვანი შემოქმე-დებითი გარდაქმნები.





მიხეილ მშვილდრაძე სულიერი ნათესაობა

„ვეფხისტყაოსანთან“ ნ. ბარათაშვილის პოეზიის დამოკიდებულების
საკითხისათვის

რუსთაველისა და ბარათაშვილის პოეტური ურთიერთდამოკიდებულების საკითხი არაერთხელ ქცეულა მსჯელობის საგნად და ბევრი საყურადღებო აზრიც გამოითქვა. მათი გაცნობა დაგვეხმარება უკეთ გავითვალისწინოთ „ვეფხისტყაოსნისა“ და „მერანის“ უკვდავი ავტორების სულიერი ნათესაობა.

ჯერ კიდევ 1852 წელს გაზეთ „კავკაზში“ ქართული თეატრის შესახებ გამოქვეყნებულ სტატიაში ქართველმა პოეტმა და თეატრალურმა მოღვაწემ მიხეილ თუმანიშვილმა შოთა რუსთაველისა და ნიკოლოზ ბარათაშვილის ენა ეროვნული რეპერტუარის შექმნის სტიმულად მიიჩნია. გავიდა რამდენიმე წელი და თავის პირველსავე სტატიაში „ორიოდე სიტყვა თავად რევაზ შალვას ძის ერისთავის კახლოვის მიერ „შე-

შლილის“ თარგმნაზედა“ ილია ჭავჭავაძემ ერთ სიბრტყეზე დააყენა რუსთაველისა და ბარათაშვილის შემოქმედება. „როცა ვკითხულობდით თარგმნილ „შეშლილს“, — წერდა იგი, — სწორედ უნდა მოგახსენოთ, ხან გვეცინებოდა და ხან გვეწუხებოდა, რომ ეგრეთ უენო ენად ვნახეთ ჩვენი საყვარელი ენა, ის ენა, რომელზედაც დაილიღინა ჩვენმა უკვდავმა რუსთაველმა თავისი უკვდავი „ვეფხისტყაოსანი“, ის ენა, რომელზედაც დაიგალობა თავისი ღვთიური სიმღერები თავად ალექსანდრე ჭავჭავაძემ, ის ენა, რომელზედაც თავად ნ. ბარათაშვილმა, მაგ უდროოდ დამარხულმა ჩვენმა იმედმა ჰარმონიულად და ნაღვლიანად დაიმღერა „ქართლის ბედი“ და თავისი მართლა და ზეგარდმო შთაგონებული წვრილი ლექსები! რომ არა გვეყან-

დნენ რუსთაველი, ალ. ჭავჭავაძე, ნიკოლოზ ბარათაშვილი, გრიგოლ ორბელიანი, კიდევ ჰო! რომ გვეყვანან, რატომ არა ვსწავლობთ იმათ მშვენიერს ლექსებში მშვენიერს ენას?“

ამავე სტატიიში დიდი ილია „ვეფხისტყაოსანს“ რომანტიკულ ნაწარმოებად თვლის, ხოლო რუსთაველის მიმბაძველებს ცრუ-კლასიკოსებად აცხადებს. ამ დებულებას დღეს ვერ გავიზიარებთ, რადგან რომანტიზმი გაცილებით გვიანდელი მოვლენაა. ქართული საზოგადოებრივი ცხოვრების ისტორია ასცდა იმ ობიექტურ მიზეზებს, რომლებმაც განაპირობეს კლასიციზმ-სენტიმენტალიზმის განვითარება რუსულ და ევროპულ ლიტერატურაში. მაგრამ „ვეფხისტყაოსნის“ რომანტიკულ ნაწარმოებად გამოცხადების თვით ფაქტი დიდად საგულისხმოა, რადგან რომანტიკოს ნ. ბარათაშვილის პოეტური სტილი მართლაც დავალებულია ამ ნაწარმოებით.

სტატიიში „რამდენიმე სიტყვა „ჩანგურის“ შესახებ“ („ცისკარი“, 1865, № 9) აკაკი წერეთელმა დასვა ქართული მწერლობის მეცნიერული შესწავლის ამოცანა და ხაზგასმით აღნიშნა: „ის კაცი, რომელსაც წინ უდევს რუსთაველი, ბარათაშვილი და ჭავჭავაძე, სტყუა ამ სიტყვებით, არაფერი გვაქვსო!“ ფრიად საყურადღებოა აკაკი წერეთლის მსჯელობა ნ. ბარათაშვილის პოეზიის მაღალ მოქალაქეობრივ პათოსზე, რაც გამოიხატა აფორიზმში „არც

კაცი ვარგა, რომ ცოცხალი მკვდარსა ემსგავსოს, იყოს სოფელში და სოფლისთვის არა იზრუნვოს“. ამ დიდი აზრით აღფრთოვანებული აკაკი წერდა: „ამ გზით მიდიოდნენ ზღაპრული გმირები უკვდავების წყაროს მოსატანად. ამ გზით იარა ნესტან-დარეჯანის მძებნელმა ტარიელმაც: მინდვრად მეკობრენი უხვდებოდნენ, ტყეში — მხეცები, შამბნარში — ლომ-ვეფხვი და ქვაბში — დეკები, მაგრამ არ შეუშინდა ბედს!.. მხლებელნი გაუწყვიტეს და თვითონ-კი მაინც გადარჩა და გამოიხსნა სათაყვანო. აი, ამ გზით, სწორედ ამ სახიფათო გზით გაივლის მომავალი ტარიელი, ჩვენის ცხოვრების საერო გმირიც, და ჩვენ-კი, როგორც ტარიელს მისმა მხლებლებმა, ხელი უნდა შეუწყუთ მის გმირობას და თავი მსხვერპლათ დავდვათ!“

რუსთაველის გენიას ნ. ბარათაშვილი პირველად ღვიმელმა გაუტოლა. „წაიკითხეთ გონების თვალით, გულდასმით რამდენჯერმე იმის ლექსები, — წერდა 1865 წელს „ცისკარში“ ღვიმელი, — გაიგეთ ნამდვილი იმათი მნიშვნელობა და მაშინ, გარწმუნებთ, ყველა ერთხმად დასძახებთ, რომ „ჩვენი ნ. ბარათაშვილი გენიით რუსთაველის ძმააო“. ამ გვარო ჩემგან შედარება ბევრს ემწუთებთ თუ როგორ გავბედე! მაგრამ რა გაეწყობა, ჩემო ბატონებო!“

ამ საკითხის მეცნიერული ახსნით არც აკაკი დაინტერესებულა, მაგრამ ნ. ბარათაშვილის ნეშტის



ვანჯიდან თბილისს გადმოსვენებისას წარმოთქმულ სიტყვაში მან ეს ორი დიდი პოეტი კონგენიალურად მიიჩნია. „აქომამდე, — ამბობდა აკაკი, — ჩვენ წარმოვიდგენდით თამარს თავზედ ძლევა-მოსილი გვირგვინით, რომელსაც გვერდით უდგა ძლიერი ჩანგით საკადრისი მისი მღერალი რუსთველი. დღეიდან უფრო დასრულებული იქნება ეს ხატი. მეორე გვერდით ედგომება ბარათაშვილი“.

პოემის „ბედი ქართლისა“ გმირ ქალს სოფიოს აკაკი თამამად აყენებდა ნესტან-დარეჯანისა და თინათინის გვერდით. ამაზე მიგვანიშნებს მისი ფრაზა: „ძველად ჩვენი ქალები არ ტატიანობდნენ, ნესტან-დარეჯანობდნენ, თინათინობდნენ და სოფიაობდნენ“. მისი აზრით, რუსთაველსა და ბარათაშვილს ისა აქვთ საერთო, რომ ორივე ზუსტად იცავს ჭეშმარიტი ხელოვნების არსებით ნიშანს — სიტყვისა და აზრის კომპაქტურობას, გამოხატვის საშუალებათა სიძუნწესა და ეკონომიურობას.

1870 წელს პროფ. ალ. ცაგარელმა გაზეთ „დროებაში“ გამოაქვეყნა სტატია „ჩვენი უბედური მწიგნობრობა ამ საუკუნეში“, რომელშიც XIX საუკუნის ქართული მწერლობის ზოგადი დაზარალება სცადა. ამ სტატიაშიც საყურადღებო მოსაზრებანია გამოთქმული რუსთაველისა და ბარათაშვილის პოეზიის ურთიერთდამოკიდებულებაზე. ალ. ცაგარელი საგანგებოდ ჩერდება ნ. ბარათა-

შვილის პოეტურ ოსტატობაზე და აღნიშნავს, რომ გრძნობის ძალითა და სიმაღლით, პოეტური წარმოსახვის სიმდიდრით, ლექსის თავისუფალი, ძალდაუტანებელი მდინარებით, საგნის მონოლითურად გამოხატვით, ადამიანის გულის მოძრაობის ოსტატური გამოთქმით, მცირე სიტყვით ბევრის თქმით, მკითხველის სულში ღრმად ჩაწვდომის უნარით ნ. ბარათაშვილი ძნელი შესაღარებელია ყველა ჩვენს პოეტთან, გარდა რუსთაველისაო.

გაზეთ „ნოვოე ობოზრენიეს“ 1884 წლის 12 (24) აგვისტოს ნომერში გამოქვეყნდა ნ. ბარათაშვილის პოეტური შედეგების „მერანის“ პირველი რუსული თარგმანი. იგი ეკუთვნოდა ქართული მწერლობის მოამაგეს თ. ტხორევესკის, რომელმაც უფრო მოგვიანებით გამოსცა კრებული „გრუზინსკიე პოეტი ვ ობრაზცახ“. გაზეთმა „დროებაში“ აღნიშნა, რომ თ. ტხორევესკიმ შესანიშნავად დაიცვა „გულის მომტაცი და ვნებათა ამღელვებელი, სამოქალაქო დარდითა და ვარამით ავსებული აღმაფრენა ნ. ბარათაშვილის პოეზიისა“. ლექსის ტონის მიმკემი სტროფი „ცუდად ხომ მაინც არ ჩაივლის“... ისეა თარგმნილი, რომ დედანს არ ჩამოუფარდებო. შემდეგ გაზეთი ეხება ტხორევესკის სურვილს „ვეფხისტყაოსნის“ რამდენიმე კარის რუსულად თარგმნის თაობაზე და დაბეჯითებით ამტკიცებს, რომ „ბარათაშვილის „მერანის“ გადამთარგმნელს რუ-

სთაველის პოეზიის შეგნებაც აღარ გაუჭირდება.“

1889 წელს ილია ჭავჭავაძის გაზეთ „ივერიაში“ დაიბეჭდა მიხეილ ვეზირიშვილის გამოკვლევა „ნიკოლოზ ბარათაშვილი და მისი პოეზია“, რომელიც კრიტიკოსის აღმზრდელმა პეტრე უმიკაშვილმა შეაფასა, როგორც „მშვენიერი წერილი“. ნ. ბარათაშვილის შემოქმედების მაგალითზე კრიტიკოსმა გვიჩვენა, „თუ რის შემძლებელი ყოფილა ქართული ენა“. გამოკვლევაში ზუსტად არის დახასიათებული ნ. ბარათაშვილის ენა და ნაჩვენებია იმ აზრის უსაფუძვლობა, „ვითომ ქართული ენა იყოს ღარიბი“. რუსთაველიც რომ არ გვყოლოდა, წერს კრიტიკოსი, მარტო ბარათაშვილის ლექსები საკმაო საბუთია, რომ სამუდამოდ გაფანტოს ეს ტყუილი მითქმამოთქმამო.

მრავალმხრივ საყურადღებოა ცნობილი ლიტერატორის იონა მეუნარგიას ნაშრომი „ცხოვრება და პოეზია ნიკოლოზ ბარათაშვილისა“. მასში წამოყენებულია მოსაზრება ნ. ბარათაშვილის „მერანისა“ და ადამ მიცკევიჩის პოემა-ბალადის „ფარისის“ მსგავსების შესახებ. ამ ორი ნაწარმოების თავისებური ანალიზით ი. მეუნარგიამ გამოიტანა უმართებულო დასკვნა, რომ პირველი მეორის მიბაძვაა. მაგრამ მან შენიშნა რუსთაველისა და ბარათაშვილის პოეტურ გააზრებათა შეხვედრაც, რასაც „რუსთაველის ტაეპის გახსენება“ უწოდა. მოიტანა რა „მე-

რანის“ სტრიქონები („ნუ დავიმართლებ რხო ჩემსა მამულში“), იონა მეუნარგიამ აღნიშნა, რომ ეს აზრით ვით რუსთაველს არა აქვს ბარათაშვილზე უკეთესად გამოთქმული ავთანდილის ცნობილ ანდერძშიო („თუ საწუთრომან დამამხოს“...). ყოველ შემთხვევაში, დასკვნა იგი, „ამ ორი სტროფიდან უკეთესის ამორჩევა გემოვნებაზეა დამოკიდებულიო“.

თანამედროვე ქართულმა ლიტერატურისმცოდნეობამაც „მერანის“ შორეულ სათავეს რუსთაველის შთაგონებაში დაუწყო ძიება. შემჩნეულია, რომ ავთანდილსაც და ბარათაშვილის ლირიკულ გმირსაც ერთი მიზანი ამოძრავებთ—მეგობრის, მოძმის დახმარება. დაიძებნა სხვა შემხვედრი მასალაც. მაგალითად:

„სად დამიღამდეს, იქ გამოთენდეს,
იქ იყოს ჩემი მიწა სამშობლო,
მხოლოდ ვარსკვლავთა თანამავალთა
ვამცნო გულისა მე საიდუმლო.“
(„მერანი“)

„რა შეუღამდეს, ვარსკვლავთა
ამოსვლა იამებოდის,
მას ამსგავსებდის, ილხენდის,
უპვრეტდის, ეუბნებოდის.“
(„ვეფხისტყაოსანი“)

„შავი ყორანი გამითხრის საფლავს,
მდელითა შორის ტილი მინდვრის...
ჩემთა ნათესავთ გლოვისა ნაცვლად
მივალალებენ სევანი მყვიარნი“.
(„მერანი“)

„შენთვის მოკვდები, გავხდები
ყორანთა დასაყვიარად“.
(„ვეფხისტყაოსანი“)

ეს ტაეპები ნათელყოფს, რომ „მერანი“ მართლაც დავალებულია შოთა რუსთაველის გენიალური ქმნილებით.

1898 წელს ჟურნალ „მომხე-ში“ დაიბეჭდა კიტა აბაშიძის ეტიუდი „ნიკოლოზ ბარათაშვილი“. მასში გაზიარებულია ქართულ ლიტერატურულ კრიტიკაში გამოთქმული მოსაზრება რუსთაველისა და ბარათაშვილის სულიერ ნათესაობაზე, ოღონდ იგი ახალი შტრიხით არის შევსებული. კიტა აბაშიძემ, კერძოდ, აღნიშნა, რომ ნ. ბარათაშვილმა რუსთაველისაგან ისესხა ზნეობრივი აზრი სიკვდილის შესახებ.

1904 წელს ბათუმში სპ. ჭელიძემ გამოსცა ნ. ბარათაშვილის ლექსები. „წინასიტყვაობაში“ იგი შეებრძოლა მის მიერ ცალმხრივად გაგებულ კ. აბაშიძის გამონათქვამს, ნიკოლოზ ბარათაშვილის გაჩენა ჩვენს ცხოვრებაში „შემთხვევითობის“, „ბუნების ყინიანობის“ შედეგად. ამის საწინააღმდეგოდ სპ. ჭელიძე ამტკიცებდა: „რომ ბარათაშვილისთანა პოეტი წარმოშობოს რომელიმე ერმა, საჭიროა ისეთი ისტორიული წარსული და კულტურა ჰქონდეს, როგორცა გვაქვს ჩვენ, ქართველებს“. და აი იმის დასამტკიცებლად, რომ ქართული ლიტერატურა განვითარების მაღალ საფეხურზე იდგა, კრიტიკოსმა მოიშვე-

ლია „ვეფხისტყაოსანი“ და ვითიანი“. „ბარათაშვილის დროედე, — წერს იგი, — ჩვენი ისტორიის ჰორიზონტზე მწერლობის სფეროში ორი დიდებული ფიგურა მოჩანს: შოთა რუსთაველი და დავით გურამიშვილი. აი ჩვენი ეროვნული მწერლები, თავთავის ეპოქის ღვიძლი შვილები. მათ გვერდში ამოუდგა ნ. ბარათაშვილი, იგი გახდა მამამთავარი მეცხრამეტე საუკუნის ქართული ლიტერატურის“.

თვალსაჩინო ქართველი პედაგოგი ილია ფერაძე სტატიაში „ნიკოლოზ ბარათაშვილი (ცხოვრების აღწერითი ცნობები)“, რომელიც 1912-1913 წლებში ჟურნალ „განათლებაში“ დაიბეჭდა, სხვა საკითხთა შორის ნ. ბარათაშვილის სატრფიალო ლირიკასაც შეეხო და თქვა, რომ დიდი რომანტიკოსი პოეტი მტკიცედ იცავს რუსთაველის შეხედულებას სიყვარულის შესახებ, რუსთაველი კი უმღეროდა წმინდა სიყვარულს და მის განდიდებას მიუძღვნა თავისი უკვდავი პოემაო.

ასე იდგა რუსთაველის „ვეფხისტყაოსანთან“ ბარათაშვილის პოეზიის დამოკიდებულების საკითხი რევოლუციამდელ ქართულ ლიტერატურულ კრიტიკაში.



ახელ სურგულაძე

აჭარა ოქრობების ჩავოღუხიისათვის
ბრძოლაში

დიდი ოქრობების სოციალისტური რე-
ვოლუციის გამარჯვებამ პეტროგრადში
დიდი გავლენა მოახდინა იმპერიის განა-
პირა კუთხეებში რევოლუციური მოძ-
რაობის აზვირთებაზე. საბჭოების მეორე
ყრილობის მოწოდებებმა „მთელი ძალა-
უფლება საბჭოებს!“, „ფაბრიკები და
ქარხნები — მუშებს!“, „მიწა — გლე-
ხებს!“, „მშვიდობა — მსოფლიოს!“ მძლავ-
რად დაიქუხა ჟკიდევანო რუსეთში და
ფეხზე დაყენა ჩაგრული მასები. კომუ-
ნისტური პარტიის ხელმძღვანელობით
გაჩაღდა ბრძოლა ადგილებზე საბჭოთა
ხელისუფლების დასამყარებლად. ბრძო-
ლაში ჩაება აჭარაც.

ეს არ იყო შემთხვევითი. პირველმა
მსოფლიო ომმა მოშალა აჭარის მრეწვე-
ლობა, დასცა სოფლის მეურნეობა, ეპი-
რობა. ამას დაერთო გაუმართლებელი
პოლიტიკური რეპრესიები, რამაც მოსახ-
ლეობის დიდი უკმაყოფილება გამოიწვია
და არსებული წყობილების წინააღმდეგ
აამხედრა. სამწუხაროდ, ეს ბრძოლა აჯა-
ნყებაში არ გადაზრდილა. ცარიზმმა ჟერ
კიდევ ომამდე სერიოზული დარტყმა
მიაყენა აჭარის მშრომელთა ავანგარდს

— ბათუმის ბოლშევიკურ ორგანიზაციას.
ამიტომ აღნიშნავდა ვ. ი. ლენინი პრადის
პარტიულ კონფერენციაზე (1912 წ. ია-
ნვარი), რომ „ბათუმში არალეგალური
მუშაობა არააო“.1 მართალია, მომდევნო
პერიოდში ბოლშევიკური ორგანიზაცია
აღსდგა, მაგრამ აღრინდელ ძლიერებას
ვეღარ მიადწია. ამან, აგრეთვე მუშათა
ძველი კადრისა და რევოლუციონერთა
უმრავლესობის ჟარში გავწევამ ბათუმში
1917 წლისათვის მენშევიკების გაბატო-
ნება გამოიწვია. ამის გამო მშრომელთა
ადგილობრივმა ორგანიზაციებმა ვერ გა-
მოიყენეს ხელსაყრელი პირობები და
ბრძოლის ნაცვლად დროებითი მთავრო-
ბისათვის მხარდაჭერის გზა აირჩიეს. მა-
გალითად, ბათუმის საეპრო ფლოტის
მეზღვაურთა კომიტეტის 1917 წლის 14
აპრილის რეზოლუცია ხალხს ურჩევდა:
„მოვიკრიბოთ ძალები და უარყვით ყვე-
ლა წვრილმანი უთანხმოება ომის გამარ-
ჯებამდე მისაყვანად, რადგან საბოლო-
ოდ მხოლოდ მაშინ შევძლებთ სისხლით

1 უტრნ. „პროლეტარსკაია რევოლუ-
ცია“, № 1, 1941, გვ. 149.

მოპოვებული თავისუფლების განმტკიცებასო.²

ცარიზმის დამხობით გამოწვეული პირველი აღფრთოვანება მალე გაქრა. დრო გადიოდა, მდგომარეობა კი, დაპირების მიუხედავად, არ იცვლებოდა. ბათუმის მუშები ძველებურად 12-14 საათს მუშაობდნენ: არ ეძლეოდათ შვებულება, არ ჰქონდათ დაზღვევის უფლება, არავინ ზრუნავდა მათი საბინაო პირობების გაუმჯობესებისათვის. ანალოგიური იყო ვითარება სოფლადაც. მიწა კვლავ გაბატონებული წოდების ხელში რჩებოდა, გლეხობას სულს უხუთავდა ათასგვარი ბეგარა-გადასახადი. მართალია, აგარაული მოძრაობის დასუსტების მიზნით ხელისუფლებამ სცადა ზოგიერთი ღონისძიების განხორციელება, მაგრამ უმნიშვნელო დათმობას არ შეეძლო გლეხთა მდგომარეობის გარდაქმნა, მით უმეტეს, რომ 1917 წლის შემოდგომა მეტად მოუსავლიანი დარჩა. ვაზ. „სოციალ-დემოკრატის“ კორესპონდენტი კიდევ წერდა: „საერთოდ აჭარაში არასდროს საყოფი სიმინდი არ ყოფილა, მაგრამ წელს კი მთლად უნუგემო მდგომარეობაში ჩავარდა. ხშირია ისეთი სოფელი, რომ დღეს არა აქვს სიმინდი. და როგორ პირობებში იქნებიან ისინი მარტში, ეს თვით მკითხველმა წარმოიდგინოს“ (№ 209, 1917). ამის გამო სოფლის გარეგოლუციონერება დღითიდღე შესამჩნევი ხდებოდა.

ასეთ პირობებში დიდი მნიშვნელობა ჰქონდა ბათუმის დამოუკიდებელი ბოლშევიკური ორგანიზაციის გაფორმებას (1917 წლის ივნისი). შეიქმნა საორგანიზაციო ბიურო, რომელმაც ფაქტიურად კომიტეტის ფუნქცია იკისრა. ამით ბოლშევიკების საქმიანობას ორგანიზებული სახე მიეცა. უკვე 2 ივლისს ვაზეთი „კავკასკი რაბოჩი“ წერდა: „მუშაობა ბათუმში ბოლშევიკური ორგანიზაციების შექმნისათვის ფრიალ წარმატებით მიდის. ბოლშევიკი ამხანაგების მოღვაწეობის

შედარებით მოკლე დროში მუშაობა იმდენად კარგად წარიმართა, რომ... მგრძობთა რიცხვი არაჩვეულებრივი სისწრაფით იზრდება. შეიქმნა ჩვენი ფრაქციის საკმაოდ მნიშვნელოვანი ჯგუფი ძველი, გამოცდილი ამხანაგებისა, რომელთაც უკვე ჰქონდათ რამდენიმე შეკრება: გამოტანილია შესაბამისი რეზოლუციები მომენტისა და სოციალ-დემოკრატიული რევოლუციის ტაქტიკის საკითხებზე, დაარსებულია ცალკეული უჯრედები, სადაც ნაყოფიერად მოღვაწეობენ ჩვენი ჯგუფის პრობაგანდისტთა კოლეგიის წევრები. საორგანიზაციო ბიურო ყველა ზომას ხმარობს მიტინგების მოსაწყობად. რამდენიმე ასეთი მიტინგი უკვე გაიმართა, სადაც დიდი წარმატებით გამოვიდნენ ჯგუფის წევრები“. შემდეგ ვაზეთი აღნიშნავდა: „ჯგუფი იმედოვნებს უმოკლეს ხანში შემოიკრიბოს ყველა ჰემარტი რევოლუციონერი სოციალ-დემოკრატი. განზრახულია მუშებისა და ჯარისკაცებისათვის მოეწყოს რამდენიმე საჯარო ლექცია მიმდინარე მომენტის ყველა საკითხზე ბოლშევიკთა შეხედულების განმარტებისათვის. ამას გარდა... უკანასკნელ ხანს ჯგუფმა დიდი ყურადღება მიაქცია ბარტიული ლიტერატურის გავრცელებას. გამოწერილია საჭირო რაოდენობის ვაზეთი „პრავდა“, განზრახულია გამოიცეს ბაზელისა და ციმერვალდის ორივე კონფერენციის რეზოლუციების შინაარსი, შექმნილია განსაკუთრებული საგამომცემლო სექცია“ (№ 89, 1917).

რევოლუციური მუშაობის გაშლამ დააჩქარა პროფკავშირთა საბუქოს ბოლშევიზაცია. ახლა იგი აქტიურად ჩაება მუშათა მდგომარეობის გაუმჯობესებისათვის ბრძოლაში. მაგალითად, პროფსაბუქოს ინიციატივით თეატრში გაიმართა ქალაქის საწარმოების მუშა-მოსამსახურეთა კრება, რომელმაც განიხილა და დაამტკიცა კაპიტალისტებისათვის წარსადგენი მოთხოვნები: 8-საათიანი სამუშაო დღის დაწესების, ხელფასის გაზრდის, შვებულების შემოღებისა და სხვ. შესახებ, ეს მოთხოვნები არ დააკმაყოფილეს. ამიტომ

² ვაზ. „დენ სვობოდი“, № 9, 1917.



პროფსაბჭომ დაადგინა 16 ივლისს გაფიცვის გამოცხადება. მუშათა დებუტატების საბჭო, რომელშიც მენშევიკები სკარბობდნენ, გაფიცვის წინააღმდეგ გამოვიდა. მაშინ პროფსაბჭომ მიღებული გადაწყვეტილება გააცნო სპეციალურად მოწვეულ მუშათა კრებას. მ. კახიანი და პროფსაბჭოს რევოლუციონერი მუშაკები ფაქტობრივი მასალის ანალიზის საფუძველზე ასაბუთებდნენ გაფიცვის მიზანშეწონილობას და სარგებლიანობას. მენშევიკების წინააღმდეგობის მიუხედავად, მუშებმა ერთხმად მოიწონეს იგი და გაფიცულთათვის დახმარების ფონდში 500 მანეთიც შეიტანეს.³

ეს ფაქტი თვალსაჩინო დადასტურება იყო არა მარტო პროფსაბჭოს ბოლშევიზაციისა, არამედ მასების გამოფხიზლებისაც. აშკარად ჩანდა, რომ ხალხს აღარ აკმაყოფილებდა არსებული წყობილება და მის წინააღმდეგ ირავებოდა. ამის გამოხატულება იყო ბათუმის ბოლშევიკური ორგანიზაციის 20 ივლისს მოწოდება ძალაუფლების აღების შესახებ. მასში, კერძოდ, ნათქვამი იყო: „მუშათა, ჯარისკაცთა და გლეხთა დებუტატების საბჭოს ხელში ძალაუფლების გადასვლის აუცილებლობა წარმოადგენს რევოლუციური სოციალ-დემოკრატიის ერთ-ერთ მორიგ ამოცანას.“⁴ ასეთი მოთხოვნებით გამოდიოდნენ პარტიის სხვა პირველადი ორგანიზაციებიც.

პეტროგრადის რევოლუციის შესახებ პირველი ცნობა თბილისში 25 ოქტომბერს დილის 9 საათსა და 30 წუთზე მოვიდა.⁵ იმავე დღესვე იგი გაიგეს ბათუმშიც. ქალაქის ბოლშევიკური ორგანიზაცია, ერთ-ერთი პირველი საქართველოდან, მხურვალედ მიესალმა რუსეთის რევოლუციას. დებუშაში ნათქვამი იყო: „ბოლშევიკური ჯგუფი, რომელიც გამო-

ხატავს თავის თანაგრძნობას და მხარეობს თოვანებას, ვალდებულებას კისრულობს მხარი დაუჭიროს საბჭოების ხელისუფლების პროგრამას... გაუმარჯოს მშვიდობას, რადგან მას ჩვენთვის მოაქვს გამარჯვება, მუშებისათვის პური, გლეხებისათვის მიწა და ყველა მშრომელისათვის კაპიტალის უღლისაგან განთავისუფლება.“⁶

ამის მიუხედავად, ბევრმა ჯერ კიდევ არაფერი იცოდა რევოლუციის შესახებ. ამიტომ ბოლშევიკებმა აგიტატორები დაგზავნეს საწარმოებში, მახლობელ სოფლებში და ახსნა-განმარტებითი მუშაობა გაჩაღდეს. 26 ოქტომბერს კი მოიწვიეს საქალაქო მიტინგი (ესწრებოდა 1.500 კაცი, მათ შორის გლეხობაც), რომელმაც განიხილა სოციალისტური რევოლუციის მიზანი, მოიწონა იგი და დაადგინა მისაღმებოდა პეტროგრადის პროლეტარიატს. ამასთან, მიტინგის მონაწილეებმა გამოთქვეს იმედი, რომ „მხოლოდ საბჭოების ხელისუფლებას შეუძლია იხსნას ქვეყანა ეკონომიური კატასტროფისაგან, მისცეს პური მშვიდ და ზავი სისხლისმღვრელი იმპერიალისტური ომით განაწამებ არმიასა და სახელმწიფოს. ახალი მუშურ-გლეხური მთავრობა, რომელმაც... გამოსცა დეკრეტი ზავის შესახებ და მთელი მიწა სამიწათმოქმედო კომიტეტებს გადასცა, თავის მუშაობას წარმართავს კეშმარტივად დემოკრატიული სულისკვეთებით. სახელდობრ: განაზოცელებს კონტროლს წარმოებაზე და პროდუქტების განაწილებაზე, გააერთიანებს ბანკებს ერთ ნაციონალურ ბანკად და დააწესებს მასზე საყოველთაო-სახალხო კონტროლს, შემოიღებს საყოველთაო შრომით ბეგარას.“⁷

ანალოგიური რეზოლუციები მიიღეს სხვა ქალაქების მშრომელთა მრავალრიცხოვან მიტინგებზეც, მაგრამ მაშინ საქართველოში არ დასმულა აჯანყების გზით ძალაუფლების დაპყრობის საკითხი. ქვეყნის კოლონიური მდგომარეობა და მისი აგრარული ხასიათი, მრეწველობის

³ გაზ. „კავკასსკი რაბოჩი“, № 133, 1917.

⁴ იქვე, № 104, 1917.

⁵ მ. ჯიჯიშვილი, ბრძოლა საბჭოთა ხელისუფლებისათვის აჭარაში, 1957, გვ. 18.

⁶ გაზ. „კავკასსკი რაბოჩი“, № 194, 1917.

⁷ გაზ. „ბურევესტნიკი“, № 8, 1917.

დაბალი დონე და პროლეტარიატის სისუსტე, ბურჟუაზიულ-ნაციონალისტური პარტიების აქტიურობა და კონტრრევოლუციის მტკიცე კავშირი დასავლეთის სახელმწიფოებთან, ჩანს, გამორიცხავდა სოციალიზმისათვის ბრძოლის წარმატებას. ამით ისარგებლეს მენშევიკებმა, დაშნაკებმა და მუსავატებმა და ძალების კონსოლიდაციის მიზნით 1917 წლის 12 ნოემბერს შექმნეს კოალიციური მთავრობა — „ამიერკავკასიის განსაკუთრებული კომისარიატი“ („ოზაკომი“). ახალმა სამხარეო ხელისუფლებამ მაშინვე სასტიკი ბრძოლა გააჩაღა რევოლუციური მოძრაობის დათრგუნვისათვის, ამიერკავკასია ჩამოაშორა რუსეთს და საერთაშორისო რეაქციასთან კავშირში იგი საბჭოთა მთავრობის წინააღმდეგ ბრძოლის პლაცდარდად აქცია. და მაინც, რევოლუციური პეტროგრადის ზეგავლენით, ამიერკავკასიის ბურჟუაზიულ-ნაციონალისტური პარტიების ანტიხალხური საქმიანობისა და უცხოელი იმპერიალისტების ანტისაბჭოთა მოქმედების გაძლიერების გამო 1918 წლის დამდეგისათვის ჩვენშიც თანდათან იქმნება პირობები სოციალისტური რევოლუციისათვის. ასეთ ვითარებაში ბოლშევიკების უპირველესი ამოცანა გახდა მასების საბრძოლველად მომზადება. საამისოდ დიდ მუშაობას ეწეოდნენ ბათუმშიც. რევოლუციური გაზეთების — „ბურვეესტნიკის“ და „ხარავისის“, შემდეგ „მუშის სიმართლის“ (გამოდიოდნენ 1917-1918 წლების მიჯნაზე) ფურცლებზე სისტემატურად ქვეყნდებოდა წერილები, რომლებიც ამხილებდნენ „ოზაკომის“ საქმიანობას და ხალხს ბრძოლისაკენ მოუწოდებდნენ.

რევოლუციურ მოძრაობაში აქტიურად ჩაება ახალგაზრდობაც (ამ მხრივ გაძლიერა მუშაობა ახალგაზრდულმა ორგანიზაციამ „სპარტაკმა“). მალე ფრონტიდან დაბრუნებულ ჯარისკაცთაგან შეიქმნა წითელგვარდიელთა რაზმი, რომელიც გახდა დასაყრდენი ხელისუფლებისათვის ბრძოლაში. ამ ამოცანის შესასრულებლად მზად იყვნენ აგრეთვე ბათუმის

სამხედრო გარნიზონის ზოგიერთი ნაწილი და ნავსადგურში მდგომი გემების მეზღვაურები.

რევოლუციური მოძრაობის უკეთ ხელმძღვანელობისა და ძალაუფლებისათვის წარმატებითი ბრძოლის მიზნით 1918 წლის 11 თებერვალს გაერთიანდნენ ბათუმისა და გურიის პარტიული ორგანიზაციები. ჩამოყალიბდა ერთიანი საოლქო ბიურო (ვ. ბახტაძე, ს. ვანშინი, მ. კახიანი, გ. პიასეკვი, კ. ბერძენიშვილი და სხვ.), რომელმაც სწორად შეაფასა ქვეყანაში შექმნილი ვითარება, არ დააყენა აჯანყებისათვის ადგილზე არსებული ხელსაყრელი პირობების გამოყენება და ორგანიზაციულ-პროპაგანდისტული საქმიანობა ამ მიზნის განხორციელებისათვის წარმართა. იმავე წლის 20-23 თებერვალს დასავლეთ ამიერკავკასიის ბოლშევიკური ორგანიზაციების კონფერენციამ დაადგინა შეიარაღებული აჯანყების ორგანიზება და შექმნა კიდევ ხელმძღვანელი შტაბი ს. გეგეჭკორის მეთაურობით, მაგრამ აჯანყება არ შედგა.

1918 წლის 3 მარტს გაფორმდა ცნობილი ბრესტის ხელშეკრულება, რომლითაც ბათუმი და ბათუმის ოლქი, როგორც ოკუპირებული ტერიტორია, თურქეთის განკარგულებაში გადადიოდა. ასეთ პირობებში ბოლშევიკებმა დღის წესრიგიდან მოხსნეს შეიარაღებული აჯანყების საკითხი, მაგრამ განაცხადეს სურვილი და მზადყოფნა დაეცვათ ქალაქი ოკუპაციისაგან, თუ ამაში „ამიერკავკასიის განსაკუთრებული კომისარიატი“ დაეხმარებოდა. ირკვევა, რომ საბჭოთა მთავრობა, პირადად ვ. ი. ლენინი და ი. ბ. სტალინი, ბრესტის შეთანხმების გაფორმების მიუხედავად, წინააღმდეგი იყვნენ თურქეთისათვის ბათუმის გადაცემისა და ვარაუდობდნენ მის დაცვასაც, თუ ადგილობრივი ძალებით ეს მოხერხდებოდა. სამწუხაროდ, „ოზაკომს“ ამის გავრუნებაც არ სურდა. მას აშინებდა ბათუმის რაიონში ბოლშევიკების, წითელრაზმელებისა და რევოლუციური ფლორის გავლენისა და ძლიერების არაჩვეულებრივი ზრდა, მით უმეტეს, რომ მოსალოდნელი



ყო სევისტოპოლიდან „ცენტროფლოტის“ დამხმარე ძალების მოსვლაც. ამიტომ მთავრობამ უმჯობესად მიიჩნია ბოლშევიკების განადგურება, ფლოტისა და წითელრაზმელების განიარაღება. ამ მიზნით 4 მარტს ბათუმში ჩამოვიდნენ ნ. ჟორდანიასა და ნ. რამიშვილი, რომლებმაც სპეციალური თათბირი ჩაატარეს ბოლშევიკების წინააღმდეგ ბრძოლის ღონისძიებათა შესახებ. იმავე დღეს, ღამით, ხელისუფლების ერთგულმა სამხედრო ნაწილებმა ალყა შემოარტყეს ნავსადგურს, შემდეგ კი იერიში მიიტანეს აქ განლაგებული რევოლუციური ფლოტის ზომადებზეც. 5 მარტს დილისთვის, სამსაათიანი ბრძოლის შემდეგ, მოიერიშეებმა ხელთ იგდეს ფლოტი (რამდენიმე გემის გარდა), დიდძალი შეიარაღება, დაატყვევეს 300-მდე მეზღვაურიც. მენშევიკური გაზეთი „საქართველო“ ზეიმიით იუწყებოდა: „ჩვენმა მამაცმა ჯარმა ბოლშევიკური ფლოტი დაიპყრო, ფლოტის ბოლშევიკური ეკიპაჟი დაატუსაღა და თვით ფლოტი ჩვენს მოქმედ საომარ ძალებში ჩაირიცხა“ (№ 50, 1918). წახ-

ლისებული მთავრობა შეტევაზე გადავიდა, აკრძალა ბოლშევიკური გაზეთები („ბურევესტიცი“, „მუშის სიმართლე“), რეპრესიები გააჩაღა კომუნისტებისა და წითელრაზმელების მიმართ (ძალების შენარჩუნების მიზნით, დაპატიმრებას გადაარჩენილნი, პარტიული ცენტრის მითითებით, გადავიდნენ ჩრდილოეთ კავკასიაში, სადაც აქტიურად მონაწილეობდნენ საბჭოთა ხელისუფლების დამყარებისათვის ბრძოლაში).

ბოლშევიკებთან ანგარიშსწორებამ მნიშვნელოვნად დაასუსტა ქალაქის დამცველთა ძალები. ამით ისარგებლეს თურქებმა და 1918 წლის 1 აპრილს, თქმის უბრძოლველად, ბათუმის და ბათუმის ოლქის ოკუპაცია მოახდინეს. დაიწყო აჭარაში უცხოელთა (თურქებს შემდეგ ინგლისელები შეენაცვლნენ) ორწლიანი ბატონობა, რამაც არა მარტო გაართულა, არამედ ხანგრძლივი დროით შეაფერხა საბჭოთა ხელისუფლების დამყარება. ამის მიუხედავად, ხალხს უკეთესი მომავლისაკენ სწრაფვაზე უარი არ უთქვამს, პირიქით, უმძიმეს პირობებშიც კი მედგრად იბრძოდა ნათელი მომავლისათვის.

8 პ. ცქვიტარია, აჭარაში რევოლუციური მოძრაობის ისტორიის ნარკვევები, 1962, გვ. 85-86.



ალ. ლავიტაძე

აბდულ მიქელაძის ეპისკოპალური მემკვიდრეობიდან

იმ ქართველ მოღვაწეთა შორის, რომლებმაც ხალხის უანგარო სამსახურითა და თავდადებით გამოიჩინეს თავი, საბატო აღგილი უკავია აბდულ ხასანის-ძე მიქელაძეს.

ა. მიქელაძის ჟურნალისტური მემკვიდრეობა, რაც „ივერიის“, „დროებისა“ და სხვა გაზეთების ფურცლებში შემოგვინახა, საკმაოდ არის ცნობილი. ამჟამად ხელმისაწვდომი გახდა მისი ეპისტოლარული მემკვიდრეობაც. კერძოდ, ჩვენ ხელთა გვაქვს რამდენიმე წერილის ასლი, რომლებიც ა. მიქელაძეს გასული საუკუნის 80-90-ან წლებში გაუგზავნია პეტრე უმიკაშვილისათვის.

აბდულ მიქელაძეს იმ დროს მოუხდა საზოგადოებრივ სარბიელზე გამოსვლა, როცა აჭარაში რთული სოციალურ-პოლიტიკური მდგომარეობა იყო. ახლად გათავისუფლებულ მხარეში ოსმალეთის აგენტები განუწყვეტელ აგიტაციას ეწეოდნენ, რათა ადგილობრივი მოსახლეობა თურქეთში გაეტყუებინათ. აბდულ მიქელაძეს ნათლად ესმოდა ე. წ. „მუჰაჯირობის“ არსი და სწამდა, რომ აჭარლებს ოსმალეთში არაფერი ესაქმებოდათ და ვინც წავიდა, ისიც მალე დაბრუნდებოდა. ამის თაობაზე იგი პეტრე უმიკაშვილს სწერდა: „იმის შესახებ, რომ ხალხი ესახლებიან ოსმალეთში, უნ-

და მოგახსენო, რომ ის წამსვლელი ხალხი იყო ართვინის ოკრუგიდან და რამდენიმე გონიოს უჩასტიკიდანაც. ჩვენი აჭარიდან... არც ფიქრში აქვან წასვლა, თუ იმ ზედა მოხსენებულ ქვეყნებიდან კიდევ არ დაიწყეს გაზაფხულზე წასვლა და აგენსაც არ დაუწყვეს მოტყვილებით წაყვანა“.

შემდეგ წერილში იგი პეტრე უმიკაშვილს ატყობინებს: „ამას გარდა რაიცა შეეხება მოჰაჯირების გადასახლებაზე არავინ არ ფიქრობს, ყველანაშ დადევს გული და კიდევაც მუყაითობენ თავის ოჯახში... წასული სათათროში... უნდში, უნიაში, გირასონსა და სხვა სანჯაღებში ცხოვრობენ. ეხლა ჩვენ ისე გვემის, რომ იქაური ჰავა ვერ აიტანეს და ბევრიც მომკვტარან და ბევრიც ბრუნდებიან... ამ ახლო ხანშიდ ათი თორმეტი კაცი მოვიდნენ“.

აბდულ მიქელაძეს დამთავრებული ჰქონდა ტრაპიზონის სასულიერო სემინარია და მთელი თავისი ცოდნა და ენერჯია მოახმარა მშობლიური კუთხის კულტურულ დაწინაურებას, მოსახლეობის ეროვნული თვითშეგნების ამაღლებას. ხალხის უანგარო სამსახურში ხედავდა იგი ადამიანის უმაღლეს დანიშნულებას და თვითონ ყველაფერს აკეთებდა ამისათვის. მან გვიან ასაკში ზ.

ქიქინაძისაგან შეისწავლა ქართული წე-
რა-კითხვა და გახდა ქართული აზრის,
ქართული წერა-კითხვის გავრცელების
ერთ-ერთი ინიციატორი აჭარაში.

1881 წელს ა. მიქელაძე სწერდა პ.
უმეიკაშვილს: „დიდ მადლობას მოგახ-
სენებთ ბატონო იმისათვის, რომ ეს კი-
ნდამ ერთი წელიწადია რაც მე თქვენ-
გან გამოგზავნილს „ივერიას“ ვლობუ-
ლობდი. ამგვარად თქვენი წყალობით
იმდენი შევისწავლე ქართული წერა-კი-
თხვა, რომ ამ წიგნის მოწერა თქვენთან
მოვახერხე... თუმცაღა შეცდომილება
ბევრი იქნება შიდ მაგრამ თქვენის წყა-
ლობით სამერძობით უფრო კარგად დავს-
წერ თუ შემდგომ არ დამტოვებთ თქვენ
უხუტადღებოთ... დამაჩვიეთ თქვენ
„ივერიას“ კითხვას და იმედი მაქვს არ
მომავლებთ თქვენს წყალობას, მიიღებთ
ჩემს სიღარიბეს სახეში და მიწყალო-
ბით „ივერიას“ შემდეგშიდაც“.

ა. მიქელაძემ იცოდა, რომ აჭარის ამ-
ბებით დაინტერესებული იყო იმდროინ-
დელი ქართველი მკითხველი, ხედავდა
იმის აუცილებლობას, რომ „ივერიის“
ფურცლებზე დაბეჭდილიყო აჭარის
წინაშეწველი მოვლენები. პ. უმეიკაშვი-
ლის ერთი წერილის პასუხად იგი წერს:
„მწერთ რომ ამ წელიწადშიდაც რედაქ-
ცია გამომიგზავნის „ივერიას“, დიდათ
გმადლობთ მოწყალებისათვის. სხვა არა
შემიძლია რა... რაც ჩემს უსწავლეობას
შეედრება ვეცდები ცოტ-ცოტა ანბები
ვაგზავნო რედაქციაში“.

საგულისხმოა, რომ ქართული წერა-
კითხვის შესწავლით დაინტერესებული
ა. მიქელაძე „ივერიის“ რიგითი მკითხ-
ველიდან ამ გაზეთის კორესპონდენტი
გახდა. მის წერილებში ნათლად გამოს-
ქვივის მგზნებარე პატრიოტისა და ჰუ-
მანისტის სახე. იგი ყველაფერს აკეთებ-
და თავისი კუთხის კულტურული დაწი-
ნაურებისათვის და ქართულ ანბანს
ასწავლიდა ყველა დაინტერესებულ პირს.
ერთ-ერთ წერილში იგი მოახსენებს პე-
ტრე უმეიკაშვილს: „თქვენ რომ აზბუკე-
ბი მიბოძეთ იმიდგან დოჟირივე ამათ და
თქვენი შემწეობით მეც ყურადღებას ვა-

ძლევ... ყველას სურს რომ ისწავლოს
წერა-კითხვა ქართულის“. მის წერილში
ში ჩანს, თუ რა სწრაფად ვრცელდებო-
და ქართული ანბანი მოსახლეობაში.
„ჩემ გარეთ აჭარაში თორმეტმა ბოეშმა
ისწავლა ქართული წერა-კითხვა, ისინიც
სოფლებშიდ სხვა ბავშვებს ასწავლიან.
ერთი სიტყვით, ამ ახლო ხანში აჭარა-
შიდ გავრცელდება ქართული წერა-
კითხვა“. ქართული ანბანის გავრცელ-
ბას თან მოჰყვა პ. უმეიკაშვილის მიერ
გამოგზავნილი სახელმძღვანელოები.
„თქვენი გამოგზავნილი წიგნები ათ თორ-
მეტ ბავშვებსა მივეცი და ყველანამ... ქა-
რთული წერა-კითხვა შეისწავლეს. დღეს
აჭარაში (ქედაში — ა. დ.) თქვენი წყა-
ლობით ოცამდინ არის ქართული წერა-
კითხვის მცოდნე და კიდეცა სხვებიც ის-
წავლიან. ათი წელიწადიც არ უნდა, რომ
ყველაი შეისწავლის ძველებურს დედა-
ენას, ქართულ წერა-კითხვასა და ყველი
თქვენი ბატონობით განათლებული იქ-
ნებიან აქედგან“ (1891 წლის 22 იანვრის
წერილი).

თავის უანგარო შრომით მოსახლეო-
ბაში ქართული წერა-კითხვის გავრცე-
ლებით ა. მიქელაძემ საფუძველი მოუშ-
ვადა პირველი ქართული სკოლის გახ-
სნას ქედაში. ქართული სკოლის გახსნის
თაობაზე გაზეთ „ივერიამი“ იგი წერდა:
„მადლობა ღმერთს, რომ ჩვენ, ქართველ
მაჰმადიანებს ჩვენმა ძმებმა, ქართველმა
ქრისტიანებმა ყურადღება მოგვაქციეს და
ჩვენთვის წიგნებიც დაჰბეჭდეს... ღმერთ-
მა ხომ იცის, რომ დიდად მოწადინებულ-
ნი ვართ ჩვენსა და თქვენს შუა ძველებუ-
რი სიყვარული გაცოცხლდეს და ამით
ერთმანეთის პატივისცემა და შველა ვი-
ცოდეთ... მოგმართავთ თქვენ, ჩემო საყ-
ვარელო ძმებო, და გევედრებით, რომ
ქედაში სკოლა გაგვიმართოთ. კარგი
სკოლა აჭარისათვის წამალი იქნება, მის
საშუალებით აქეთ ქართული კითხვა
უფრო განმტკიცდება“ (გაზ. „ივერია“,
1892 წ. № 213).

კავშირი საქართველოს საზოგადო მოღ-
ვაწეებსა და მწერლებთან იმდენად დიდა

იყო, რომ ა. მიქელაძეს არ შეეძლო ერთი წუთითაც გაეძლო მათ გარეშე. მათგან იგი მოელოდა ცოდნის დაუშრეტელ წყაროს, რომელსაც თავის მხრივ ადვილობრივ მოსახლეობას აწოდებდა. იგი შეწუხებული იყო იმით, რომ „ივერიის“ მიღება დაუგვიანდა და პეტრე უმიკაშვილს წერდა: „თქვენ წერილი მოგწერეთ, მოგივიდა თუ არა მე ვერაფერი შევიტყვე, აგერ ერთი თვე არის რაც მე „ივერია“ არ მიმიღია და ძლიერად შეწუხებული ვართ, რომ სიცოცხლე კარგად გავატაროთ, რომ საქართველოს და ქვეყნის ამბავები წამეკითხა და ხალხისთვის... ვწაბულემა რა ყოფილა ჩამეგონებია“. როგორც შემდეგ გამოირკვა, „ივერიის“ დაგვიანება გამოწვეული ყოფილა ქედაში საფოსტო განყოფილების დახურვით, რაც ადგილობრივმა მმართველობამ გააკეთა.


პეტრე უმიკაშვილი დანტერესებულ იყო აჭარის ამბებით. იგი ეძებდა პროგრესულ პირებს, რათა მათი საშუალებით ქართული აზრი გაეგრძელებინა აჭარაში. მისი ერთ-ერთი წერილი, რომელიც გამოგზავნილია ქედელი, კერძოდ, სალორეთელი (ახლანდელი პირველი მისი) შაქირ-ეფენდისადმი, გამსჭვალულია ამ კუთხის მოსახლეობის დიდი სიყვარულით. წერილში ვკითხულობთ: „პირველად მრავალს მოკითხვას მოგახსენებთ, თუ არ დავეიწყებიათ ჩვენი ერთმანერთის ნახვა ამ ცხრა წლის წინათ აჭარაში, ქედლაში, მოიგონებთ ამ წიგნის მომწერსა. მე ამ ზაფხულს ვიყავი ბათუმში და მითხრეს, რომ შაქირ ეფენდი გემდურისო ქართულის ჩვენი გურჯიჯას წიგნის არ გაგზავნავსო. სიხარულით მოგართმევი წიგნსა, მაგრამ თქვენი ადრესი არ ვიცოდი და არც იმედი მქონდა, რომ ქართული წიგნი მე რომ გასწავლეთ აღარ დაგავიწყდებოდა... მე ამ წიგნს დიდროვან ასოებით ვწერ, მეშინია, იქნება ესეც ვერ წაიკითხოს და გაუჭირდესო...

ნეტავი თქვენ ისე იცოდეთ ქართული გურჯის წერა რაფრათაც ენა იციო და გეყურებათ. მაქაური ამბავი გვეცმის, ბათომის სანჯახში და აჭარაში წიგნსა სწავლობენ და იკითხავენ, ბევრმა ისწავლა დაბეჭდილი წიგნის კითხვა. ღმერთმა ინებოს ხალხში სწავლა მოიფინოს, რომ კეთილი ისწავლოს და უცოდნელი არ დარჩეს. თქვენი კეთილის მონატრე პეტრე უმიკაშვილი. ტფილისი, 20 იანვარს, 1888 წელსა“.

ამ წერილებშიც ჩანს, თუ როგორ ისხამდა ფრთებს ქართული აზრი, თუ როგორ დგებოდა კალაპოტში ქართული კულტურის, ქართული სიტყვის აკვანი აჭარა, სამხრეთი საქართველო.

ა. მიქელაძე მართო ქართული წერაკითხვის გაგრძელებით როდი კმაყოფილებოდა. იგი იყო მასწავლებელი, ექიმი და პოლიტიკური მოღვაწე. იმ მიზნე პირობებში, როდესაც მალარია ანადგურებდა მოსახლეობას, ა. მიქელაძე სანიტრის ჩანთით დადიოდა სოფლიდან სოფელში და თვითონ ატარებდა მოსახლეობაში აცრებს. მისმა მადლიანმა ხელმა ბევრი ბავშვი და მოზარდი იხსნა სიკვდილისაგან. „ა. მიქელაძეს უყვარდა თავისი კუთხის მკვიდრნი და ყველაფერს აკეთებდა მათი კულტურული დაწინაურებისათვის. უმადურმა ხელისუფლებამ აბუჩად აიგდო მისი ღვაწლი და სიბერის დღენი ციხეში გაატარებინა“ (ხ. ახვლედიანი, ჰაიდარ აბაშიძის „წერილების“ წინასიტყვაობა).

ა. მიქელაძე მგზნებარე პატრიოტი იყო. მან მთელი თავისი ენერჯია მოახმარა აჭარის ნათელი მომავლის შექმნას, მემედ აბაშიძესთან ერთად დიდი წვლილი შეიტანა ცნობილი „განმათავისუფლებელი კომიტეტის“ მუშაობაში. უბედურმა შემთხვევამ აღარ აცალა ა. მიქელაძეს ენახა საბჭოთა აჭარის მიღწევა — იგი ტრაგიკულად დაიღუპა 1919 წელს.



ხელმოწერილია დასაბეჭდად 6/VI, 1967 წ. საბეჭდი 6, საგამომცემლო 5 თაბახი,
შეკვეთის № 3385, ემ 00624. ქაღალდის ზომა 60X90. ტირაჟი 1830.

* * *

საქართველოს სსრ მინისტრთა საბჭოს ბეჭდვითი სიტყვის კომიტეტის
მთავარპოლიგრაფმრეწვის ბათუმის სტამბა № 9 (ლუქსემბურგის, 22).

0 17/126



3360 40 333.

ЛИТЕРАТУРНО-ХУДОЖЕСТВЕННЫЙ
И ОБЩЕСТВЕННО-ПОЛИТИЧЕСКИЙ ЖУРНАЛ
„Литერатуриლი Аджара“
ОРГАН АДЖАРСКОГО ОТДЕЛЕНИЯ
СОЮЗА ПИСАТЕЛЕЙ ГРУЗИИ
ИНДЕКС 76118